

8.56. A. 5

Porto Alegre

562 -



Ex Bibliotheca
majori Coll. Rom.
Societ. Jesu

~~4610
4
10~~

8.56.17.5

DE ARTE

BENEMORIENDI

LIBRI DVO.


Auctore

ROBERTO

S. R. E. CARD.

BELLARMINO

è Societate IESV



Ad Illustriss. & Reuerendiss. D.

FRANCISCVM

S. R. E. CARD.

SFORTIAM

Bell. Soc
Episc. Albanen. *Call. Romae*

Call. Romae



T. S. C.
M. P. S. C.

ROMAE, Typis Bartholomæi Zannetti. 1620.

Cum Privilegio. & Superiorum permissu.

*Imprimatur si videbitur Reuerendissimo
P. Magistro Sac. Pal. Apost.*

Cæsar Fidelis Vicefg.

*Imprimatur . Fr. Hyacinthus Petro-
nius Ord. Præd. Sac. Apost. Pal.
Magister .*

FRANCISCO

SFORTIAE

S. R. E. CARDINALI

EPISCOPO ALBANENSI.

ROBERTVS CARD.

BELLARMINVS

S. P. D.



CRIPSI ante pau-
cos menses, opu-
sculum de arte
bene moriendi,
tum vt ipse me ad mortem,
iam maturum, compararem:
tum vt ea, quæ mihi vtilia
visa sunt ad negocium nego-
ciorum omnium maximum,
cum fratribus, vel Dominis

a

2

meis

meis libenter, vt mihi solitum
est, communicarem. Hoc au-
tem opusculum duabus de cau-
sis, Tibi, FRANCISCE SFOR-
TIA, Cardinalis optime, di-
candum esse censui. Prior mi-
hi causa fuit, vt per te memoria
sancta GREGORII XIII. Pon-
tificis Maximi æternitati com-
mendetur. Tu enim solus iam
superes ex tot lectissimis Car-
dinalium creationibus, quibus
Collegium hoc nostrum Sa-
pientissimus Pontifex illustra-
uit: & tu idem solus ex nobili-
tate Romana Familiam Bon-
compagnam, & ipsam quoque
nobilem affinitate contingis.
Porro hic idem Gregorius, Re-
ligioni

ligioni Societatis I E S V , quæ mihi ab annis sexaginta pia mater est, non solùm Dominus clementissimus, sed etiam pater amantissimus semper fuit. Is enim diplomata multa Societati attribuit, quibus eius privilegia à Superioribus Pontificibus concessa, vel explicavit, vel auxit. Idem ipse Collegium Romanum magno sumptu extruxit: nec minori liberalitate sumptus, quibus collegæ sustentarentur, attribuit. Idem ipse Sanctissimus Pontifex pro eo quo ardentissimè flagrabat desiderio propagandæ catholicæ fidei, multis in locis Collegia extruxit; atq; in primis Romæ

Germanicum, & Hungaricū.
cuius administrationem pro-
priam Societatis I E S V esse
voluit. Huius igitur vigilan-
tissimi Pontificis memoriam
colit quidem Romæ Societas
anniuersarijs sacrificijs, ac lau-
dationibus. Sed visum mihi
est, huic etiam epistolæ adiun-
gere beneficia tanti Pontificis
in Societatem I E S V; vt ea
quoque redundent in laudem,
decusq; Illustrissimi Principis,
cui libros meos, ipsi dicatos,
non ingratos esse desidero. Ve-
nio nunc ad alteram rationem,
quæ me potissimum impulit,
vt hos libros Tibi præcipuè,
Cardin. Amplissime, nuncu-

pa-

parem. Argumentum operis
mei, non allicit ad legendum,
sed absterret potius, præsertim
viros magnos, siue principatu
politico, siue sacro: non enim
continet liber hic meus artem
philosophicam, vel oratoriam,
vel poeticam, quæ mentem do-
ceat, vel linguam expoliat, vel
aures delectet; sed hortatur
ad meditationem mortis, & ad
ea sæpè cogitanda, quæ viris ma-
gnis placere plerunq; non so-
lent: qualia sunt paupertas,
humilitas, patientia, & aliæ
christianæ, verissimæq; virtu-
tes. Elegi ergo Te, virum Prin-
cipem, principatu politico, &
sacro; & fretus humanitate tua

singulari, dicaui Tibi libros de arte bene moriendi, libros exiguæ eruditionis, sed magnæ utilitatis: & fretus benignitate tua spem bonam concepi, & abs Te faciliè legendos libros non prolixos, & ad imitationem tuam non defuturos, qui id ipsum agant. Erit id mihi res planè gratissima; nec me arbitrabor, Tibi munusculum obtulisse, sed abs te munus amplissimum accepisse. Vale.

IN

IN PRIMO LIBRO

hæc sunt Capita.

Cap. 1. **D**E primo præcepto
artis bene moriendi, quod est, ut qui
cupit bene mori, bene
viuat.

Cap. 2. De secundo præcepto
artis bene moriendi, quod
est mori mundo.

Cap. 3. De tertio præcepto ar-
tis bene moriendi, quod
est de tribus virtutibus
theologicis.

Cap. 4. De quarto præcepto ar-
tis bene moriendi, quod
continet tria documenta
Euangelica.

Cap. 5. De quinto præcepto ar-
tis bene moriendi, in quo
detegitur error diuitum,

a 5 huius

Index Cap.

huius mundi.

Cap. 6. *De præcepto sexto artis bene moriēdi, quo explicantur tres virtutes morales.*

Cap. 7. *De septimo præcepto artis bene moriendi, quod est de oratione.*

Cap. 8. *De octauo præcepto artis bene moriendi, quod est de Ieiunio.*

Cap. 9. *De nono præcepto artis bene moriendi, quod est de eleemosyna.*

Cap. 10. *De decimo præcepto artis bene moriendi, quod est de sacramēto baptismi.*

Cap. 11. *De præcepto undecimo artis bene moriendi, quod est de confirmatione.*

Cap. 12. *De duodecimo præcepto artis bene moriendi, quod est de Eucharistia.*

Cap. 13. *De præcepto decimo-tertio*

Index Cap.

tertio artis bene moriendi, quod est de Pœnitentia.

Cap. 14. *De præcepto decimoquarto artis bene moriendi, quod est de sacramento Ordinis.*

Cap. 15. *De quintodecimo præcepto artis bene moriendi, quod est de Matrimonio.*

Cap. 16. *De præcepto decimosexto artis bene moriendi, quod est de sacramento Vnctionis extremae.*

IN SECVNDO LIBRO

hæc sunt Capita.

Cap. 1. **D**E primo præcepto artis bene moriendi, vicina iam morte, quod est de meditatione mortis.

a 6 Cap.

Index Cap.

- Cap. 2. *De secundo præcepto artis bene moriendi, vicina iam morte, quod est de Iudicio extremo.*
- Cap. 3. *De tertio præcepto artis bene moriendi, vicina iam morte, quod est de gebenna.*
- Cap. 4. *De quarto præcepto artis bene moriendi, vicina iam morte, quod est de gloria Beatorum.*
- Cap. 5. *De quinto præcepto artis bene moriendi, vicina iam morte, quod est de testamento condendo.*
- Cap. 6. *De sexto præcepto artis bene moriendi, vicina iam morte, quod est de confessione peccatorum.*
- Cap. 7. *De præcepto septimo artis bene moriendi, vicina iam morte, quod est de sa*

Index Cap.

sacrosancto viatico.

Cap. 8. De præcepto octauo artis bene moriendi, vicina iam morte, quod est de unctiōe extrema.

Cap. 9. De nono præcepto artis bene moriendi, vicina iam morte, quod est de prima tentatione Diaboli, idest, de hæresi.

Cap. 10. De decimo præcepto artis bene moriendi, vicina iam morte, quod est de secunda tentatione, idest, de desperatione.

Cap. 11. De præcepto undecimo artis bene moriendi, vicina iam morte, quod est de tertia tentatione, idest, odio Dei.

Cap. 12. De duodecimo præcepto artis bene moriendi, vicina iam morte, quod est de

Index Cap.

de remedio primo aduersus tentationes Diaboli.

Cap. 13. *De praecepto tertio-
decimo artis bene morien-
di, vicina iam morte, ,
quod est de secundo reme-
dio aduersus tentationes
Diaboli.*


Cap. 14. *De praecepto quarto-
decimo artis bene morien-
di, vicina iam morte, quod
est de ijs, qui non ex con-
suetudo morbo, sed ex alia
causa moriuntur.*

Cap. 15. *De felici morte eo-
rum, qui artem bene mo-
riendi didicerunt.*

Cap. 16. *De infelici morte eo-
rum, qui artem bene mo-
riendi discere neglexerunt.*

Cap. 17. *Summa totius artis
bene moriendi.*

DE



DE ARTE

BENE MORIENDI.



PRAEFATIO.

COGITANTI mihi in solito meo recessu, in quo à negocijs publicis vacans, mihi ipse vaco, quæ causa sit, cur artem bene moriendi, quæ notissima omnibus esse deberet, paucissimi addiscere studeant; nihil occurrit aliud, nisi quod Sapiens ait, Stultorum infinitum esse numerum. Quæ potest

Eccles. 1.

Præfatio .

test enim fingi, vel cogitari stultitia maior, quàm artem illam negligere, ex qua bona summa, & sempiterna dependent: & artes plurimas, ac penè innumerabiles magno labore perdiscere, & non minore studio exercere, quibus peritura bona vel conseruantur, vel augentur?

Porro artem bene moriendi, artem esse artium omnium maximam, nemo negabit, qui attentè cogitare voluerit, in morte reddendam esse Deo rationem de omnibus, quæ toto vitæ spatio egerimus, dixerimus, cogitauerimus vsque ad verbum vnum otiosè prolatum, diabolo accusante, conscientia testificante, Deo iudicante, poena mortis æternæ, vel premio sempiterno nos expectante. Videmus quotidie cum
iudi-

Præfatio.

iudicium expectatur de rebus etiam minimis, litigantes quietem nullam capere ; sed nunc aduocatos adire, nunc procuratores, nunc iudices, nunc istorum ipsorum amicos, vel affines ; & in obitu, pendente causa coram summo Iudice, de vita, vel morte sempiterna, sæpè reus imparatus, & morbo oppressus, vix sui compos, cogitur rationem reddere de ijs rebus, de quibus dum benè valeret, fortasse nunquam cogitavit. Hinc turmatim miseri mortales in gehennam ruunt : & , vt loquitur Sanctus Petrus, *Si iustus vix saluabitur, impius & peccator ubi parebunt ?* Ego igitur operæpretium esse duxi, vt me ipse primùm, deinde fratres meos admoneam, vt artem bene moriendi magnificia-

1. Pet. 4.

Præfatio .

ciamus ; & si qui sint , qui ab alijs doctioribus magistris hanc artem nondum didicerint ea , saltem , quæ nos de hac arte ex libris sacris , & scriptis veterum magistrorum colligere curauimus , non despiciant .

Sed antequàm ad præcepta huius artis veniamus , operæpretium esse duxi de natura mortis quærere , vtrum mors in rebus bonis , vel malis reponenda sit . Et quidem si mors absolutè consideretur , sine vlla dubitatione , mala censenda est , quippe quæ vitæ opponitur , quam bonam esse negare non possumus . Accedit præterea , quod *Deus mortem non fecit , sed inuidia Diaboli mors intrauit in orbem terrarum* , vt Sapiens docet . cui subscribit Apostolus Paulus , cùm ait , *Per*

Unum

Sap. 1.
& 2.

Rom. 5.

Præfatio .

unum hominem peccatum in mundum intravit, & per peccatum mors, in quo omnes peccauerunt. Certè si Deus mortem non fecit, mors bona non est; cùm omne quod Deus facit, bonum sit, dicente Mose, Vidit Deus cuncta quæ fecerat, & erant valde bona. Gen. 1.

Quamvis autem mors in se bona non sit, tamen sapientia Dei sic mortem quasi condire nouit, vt ex morte multa bona oriri possint. Hinc Dauid canit, *Preiosa in conspectu Domini mors sanctorum eius.* Ps. 115. & Ecclesia de Christo loquens, ait: *Qui mortem nostram moriendo destruxit, & vitam resurgendo reparauit.* Certe mors, quæ mortem destruxit, & vitam reparauit, nisi valde bona esse non potuit: proinde si non omnis,

ris,

Præfatio .

nis , aliqua saltem mors bona ,
fuisse dicenda est . Itaque san-
ctus Ambrosius , librum *de bono
mortis* inscribere , non dubita-
uit : in quo libro satis apertè de-
monstrat , mortem , quamvis ex
peccato natam , suas habere
non exiguas utilitates .

Accedit denique ratio , quæ
mortem , quamvis in se malam ,
ex gratia Dei multa bona pro-
ducere posse demonstrat . Pri-
mùm enim , magnum bonum ex
morte colligimus , cùm ea finem
imponit miserijs plurimis , &
maximis huius vitæ . Iob san-
ctus disertis verbis queritur de
miserijs vitæ præsentis . *Homo ,*
inquit , natus de muliere , breui
viuens tempore , repletur multis
miserijs . Ecclesiastes ait , *Lau-*
daui magis mortuos , quàm vi-
uentes , & feliciorum utroque
iudi-

Iob 14.

Eccel. 4.

Præfatio .

*iudicari , qui nec dum natus est ,
nec vidit mala , quæ sub Sole
fiunt . Ecclesiasticus autem*

*Ecclesi.
40.*

*addit , & dicit , Occupatio ma-
gna creata est omnibus homini-
bus , & iugum graue super fi-
lios Adam à die exitus de ven-
tre matris eorum , vsque in diem
sepulturæ in matrem omnium .
Apostolus quoque de miserijs
huius vitæ conqueritur , & ait ,
Infelix ego homo , quis me libe-
rabit de corpore mortis huius ?*

Rom. 7.

His igitur testimonijs elo-
quiorum diuinorum satis pro-
batur , mortem id habere in se
boni , quòd liberet hominem
à miserijs plurimis huius vitæ .
Deinde , excellentius bonum
mors adfert , cùm ianua effici-
tur à carcere ad Regnum . Id
sancto Ioanni Euangelistæ &
Apostolo reuelatum est à Do-
mino ,

Præfatio .

Apoc. 14. *mino, cùm propter fidem exularet in Insula Pathmos, Audiui, inquit, vocem de celo dicentem mihi, Scribe, Beati mortui, qui in Domino moriuntur. Amodò iam dicit spiritus, ut requiescant à laboribus suis: opera enim illorum sequuntur illos.* Beata planè mors sanctorum est, quæ iussu cælestis Regis ab ergastulo carnis animam educit, & ad Regnum cæleste perducit; vbi defunctæ laboribus animæ sanctæ dulciter requiescunt, & pro mercede operum bonorum, coronam Regni percipiunt. Sed & animabus, quæ ad purgatorium deducuntur, non exiguum beneficium mors adfert, cùm eas à timore gehennæ liberat, & certas de futura, ac sempiterna felicitate constituit. *Quid? quod*
ipfis

Præfatio .

ipsis etiam reprobis hominibus mors adueniens aliquid utilitatis adferre videtur, dum eos à corpore separans, id efficit, vt mensura poenarum non amplius crescat. Propter has egregias utilitates mors hominibus pijs non ostendit faciem horrendam, sed blandam; non terribilem, sed amabilem. Hinc Apostolus Paulus securè clamat, *Mihi viuere Christus est*, Phil. 1. & *mori lucrum*. desiderium habens *dissolui*, & *esse cum Christo*. Et in Epistola priore ad Theffalonicenses, admonet 1. Thef. 4 Christianos, probos, vt non contristentur in mortibus charorū, neque eos, vt mortuos lugeant, sed vt dormientes aspiciant. Sed vixit etiam mulier quædam sancta auorum nostrorum memoria, nomine Catharina Adorna

Præfatio .

na Genuensis, quæ sic ardebat amore Christi, vt incredibili desiderio, cuperet dissolui, & ad dilectum migrare : hinc quasi mortis amore capta, eam sæpè vt pulcherrimam, & speciosissimam laudabat; id solum in ea reprehendens, quòd se quærentes fugeret, & se fugientes quæreret. Consulat Lector vitam B. Catharinæ Genuensis cap. vij.

Ex his igitur, quæ dicta sunt habemus, mortem vt prolem peccati, malam esse; sed ex gratia Christi, qui mortem subire pro nobis dignatus est, factam esse multis modis vtilem, & salutarem, amabilem, & desiderabilem.

LIBER

DE ARTE

BENE


MORIENDI

LIBER PRIMVS.



CAPVT I.

De primo præcepto Artis
bene moriendi: quod est,
vt qui cupit bene mori,
bene viuat.



GGREDIOR
nunc præcepta
artis bene mo-
riendi. Distribue-
mus autem hanc
artem in partes
duas : in priore trademus præ-
cepta, quibus vtendum erit dum

A bene

12 De arte bene mor.

bene valemus : in posteriore trademus ea, quibus opus erit, cum morbo periculoso laboramus, ut credibile fit, mortem esse præ foribus. ac in parte priore trademus primum præcepta, quæ pertinent ad virtutes; deinde ea, quæ pertinent ad sacramenta: his enim duobus maximè iuamur, tum ad bene viuendum, tum ad bene moriendum. Sed his omnibus præponendum esse videtur generale præceptum, ut bene viuatur, qui bene mori desiderat: nam cum nihil sit mors, nisi vitæ finis; certè omnis qui vsque in finem bene viuuit, bene moritur; neque potest malè mori, qui nunquam malè vixit; quemadmodum etiam, qui malè semper vixit, malè moritur, nec potest non malè mori, qui nunquam bene vixit. Id quod in omnibus similibus rebus cernimus; omnis enim, qui rectam viam tenet, ad locum, ad quem tendit, sine errore pergit: contra verò qui à recta
via

via aberrat, nunquam exitum
 viæ inueniet; & qui diligenter in
 studia scientiarum incumbit, breui
 doctus, vel etiam & doctor eua-
 dit: & qui scholas frequentat,
 sed ad percipiendas disciplinas
 animum non accommodat, oleum
 & operam perdit.

S E D obijciat fortasse aliquis
 boni latronis exemplum, qui sem-
 per malè vixit, & bene, beatèq;
 vitam finiuit. Non ita est, quin
 potius pius ille latro piè, sanctè-
 que vixit, & ea de causa piè quo-
 que, sanctèque mortem obiuit.
 Nam tametsi partem vitæ maio-
 rem in sceleribus consumpsit,
 tamen partem aliam vitæ vsque
 adeò sanctè traduxit, vt peccata
 præterita facile purgauerit, &
 merita eximia comparauerit. Nam
 & charitate in Deum flagrans
 Christum ab impiorum calumnijs
 palàm defendit; & charitate in
 proximum pariter flagrans, sode-
 lem suum blasphemantem admo-
 nuit, & corripuit, atque ad me-

4 De arte bene mor.

liorem vitam reuocare conatus est. viuebat enim vitam hanc mortalem; cùm sodali suo diceret, **Luc. 23.** *Neque tu times Deum, qui in eadem damnatione es? & Nos quidem iuste, nam digna factis recipimus: hic verò nihil mali gessit.* neque mortuus erat, sed viuebat idem ipse latro, cùm præclaram illam vocem emisit, Christum confitens, & inuocans, *Domine memento mei, dum veneris in Regnum tuum.* Itaque videtur hic vnus fuisse ex illis, qui ultimi venerunt ad vineam, & ante primos acceperere mercedem.

Vera igitur, & generalis est sententia illa, *Qui bene viuit, bene moritur: & illa etiam, Qui malè viuit, malè moritur.* Neque tamen negandum est, rem esse periculis plenam, differre ad vltimum vitæ conuersionem à peccatis ad iustitiam; & longè feliciores esse qui iugum legis Dei portare incipiunt *ab adolescentia sua*, vt Ieremias loquitur: & omni ex parte

A

te

Lib. I. Cap. I. 5

te felicissimos, qui empti sunt ex Apoc. 14.
hominibus primitiæ Deo, & Agno,
qui non solum cum mulieribus
non sunt coinquinati, sed nec in
ore eorum est inuentum menda-
cium, & sine macula sunt ante
thronum Dei. qualis fuit Iere-
mias Propheta, & plusquam Pro-
pheta Ioannes, & in primis Ma-
ter Domini, & alij, atque aliæ,
quos Dei solius scientia nouit.
Maneat igitur primum pronun-
ciatum, regulam bene moriendi
pendere à regula bene viuendi.

C A P. II.

De secundo præcepto artis
bene moriendi, quod est
mori mundo.

IAM verò vt quis benè uiuat,
necesse in primis est, vt mo-
riatur mundo, antequàm moria-
tur vitæ corporali. Omnes enim
qui mundo viuunt, mortui sunt

A 3 Deo;

6 De arte bene mor.

Deo; neque fieri vlllo modo potest, vt quis incipiat viuere Deo, nisi prius moriatur mundo. Hæc autem veritas in scripturis sanctis tanta euidentia prædicatur, vt nisi ab infidelibus, & incredulis in dubium reuocari possit. Ac vt in ore duorum, vel trium testium stet omne verbum, producam sanctos Apostolos, Ioannem, Iacobum, & Paulum, testes omni exceptione maiores, quippè in quibus Spiritus Sanctus, qui spiritus est veritatis, apertissimè loquebatur. Sic igitur scribit Ioannes Apostolus, & Euangelista

Io. 14. Christum ipsum loquentem inducens; *Venit Princeps huius mundi, & in me non habet quidquam.* Vbi, mundi Principem, intelligit Diabolum, qui Princeps est omnium iniquorum; & per, mundum, intelligit cœtum omnium peccatorum, qui diligunt mundum, & diliguntur à mundo. Idem paulò post, *Si mundus vos odit, scitote quia me priorem vobis odio habuit:*

Io. 15.

Lib. I. Cap. II. 7

buit: si de mundo fuissetis, mundus quod suum erat diligeret; quia vero de mundo non estis, sed ego elegi vos de mundo, propterea odit vos mundus. Et alio loco, Ego non pro mundo rogo, Io. 17. sed pro eis, quos dedisti mihi.

Vbi manifestè Christus pronunciat, mundi nomine, intelligi eos, qui cum Principe suo Diabolo audient in iudicio, *Ite maledicti in ignem æternum.* Idem in Epistola sua addit, *Nolite diligere mundum, neq; ea quæ in mundo sunt. Si quis diligit mundum, non est charitus Patris in eo: quoniam omne quod est in mundo, concupiscentia carnis est, & concupiscentia oculorum, & superbia vitæ, quæ non est ex Patre, sed ex mundo est: & mundus transit, & concupiscentia eius: qui autem facit voluntatem Dei, manet in æternum.* 1. Io. 2.

Audiamus nunc Coapostolum eius Iacobum, qui in Epistola sua sic loquitur, *Adulteri nescitis, quia* Iac. 4.

8 De arte bene mor.

amicitia huius mundi inimica est Dei? quicumque ergo voluerit amicus esse seculi huius, inimicus Dei constituitur.

Audiamus denique Coapostolum vtriusque Paulum, Vas electionis. Hic in epistola priorē ad Corinthios scribens fidelibus omnibus dicit, *Debueratis de hoc mundo exiisse.* & in eadem epistola addit, *Dum iudicamur, à Domino corripimur, et non cum hoc mundo damnemur.* Vbi manifestè pronunciat, mundum totum in die nouissimo esse damnandum. Proinde per mundum non intelligit cælum, & terram, neque omnes homines, qui sunt in mundo; sed eos tantum, qui diligunt mundum. Iusti enim, & pij mortales, in quibus charitas Dei, non carnis concupiscentia regnat; sunt quidem in mundo, sed non de mundo: iniusti autem & impij, non solum in mundo sunt, sed etiam de mundo, & per hoc, non *charitas Dei regnat in cordibus eorum;*

1. Cor. 5.
1. Cor. 11

Lib. I. Cap. II. 9

eorum, sed *concupiscentia carnis*, hoc est, luxuria; & *concupiscentia oculorum*, hoc est, auaritia; & *superbia vite*, hoc est elatio mentis, qua se efferunt super alios, & Luciferi arrogantiam, & superbiam, non Christi I E S V humilitatem, & mansuetudinem, imitantur.

Quæ cum ita sint, si quis velit artem bene moriendi verè perdiscere, oportet eum serìò, & non verbo & lingua, sed opere & veritate exire de mundo, immò etiam mori mundo, & cum Apostolo dicere, *Mihi mundus crucifixus est, & ego mundo*. Est autem negotium hoc, non ludus puerorum, sed res maxima, & difficillima. Et ideo Dominus interrogatus, an pauci sint qui saluantur; respondit, *Contendite intrare per angustam portam*, & apertius apud Matthæum, *Intrate per angustam portam, quia lata porta & spatiosa via est, quæ ducit ad perditionem, & mul-*

Gal. 5.

Luc. 13.

Matth. 7.

10 De arte bene mor.

ti intrant per eam. quàm angusta porta, & arcta via est; quæ ducit ad vitam, & pauci sunt, qui inueniunt eam.

In mundo viuere, & mundi bona contemnere; res est difficillima: videre res pulchras, & non amare; gustare dulcia, & non delectari; honores contemnere, labores appetere, nouissimum locum libenter tenere, gradus altiores alijs omnibus cedere; denique in carne quasi sine carne viuere, Angelica potius, quàm humana vita dicenda esse videtur. Et tamen Apostolus scribens ad Ecclesiam Corinthiorum, in qua pœnè omnes cum coniugibus suis vitam ducebant, ac per hoc non Clerici, non Monachi, non Anachoretæ; sed, vt nos nunc loquimur, seculares erant; sic tamen

1. Cor 7. *eos alloquitur, Hoc itaque dico fratres, tempus breue est. Reliquum est, vt qui habent uxores, tanquam non habentes sint; & qui flent, tanquam non flentes; & qui*

Lib. I. Cap. II. 11

qui gaudent, tanquam non gaudentes; & qui emunt, tanquam non possidentes; & qui utuntur hoc mundo, tanquam non utantur; præterit enim figura huius mundi. Quorum verborum hæc sententia est, ut hortetur Apostolus fideles, ut erecti ad spem cælestis felicitatis; rebus terrenis tam parum afficiantur, ac si ad eos non pertinerent: ament vxores, sed amore tam moderato, ac si eas non haberent: si flere necesse est ob amissionem filiorum vel fortunarum; tam moderatè fleant, ac si non tristarentur, neque flerent: si gaudium se offert ob lucrum, vel honorem adeptum; tam modicè gaudeant, ac si non gauderent, id est, ac si gaudium ad ipsos non pertineret: si domum, vel agrum emunt; ita modicè rebus illis afficiantur, ac si eas non possiderent. Denique iubet Apostolus, sic nos in mundo degere, ac si hospites, & peregrini, non ciues essemus. Quod

12 De arte bene mor.

1. Pet. 2.

etiam Apostolus Petrus adhuc apertius docet, cum ait, *Obsecro vos tanquam aduenas & peregrinos abstinere vos à carnalibus desiderijs, quæ militant aduersus animam.* vult enim hic beatissimus Apostolorum Princeps, vt etiam in propria ciuitate, & domo, sic viuamus, ac si in aliena, domo, & regione viueremus; parum omnino solliciti, si res in eo loco deficiant, vel redundant. id verò ideo præcipit, vt sic abstinemus à carnalibus desiderijs, quæ militant aduersus animam: non enim carnalia desideria facile insurgunt, cum ea videmus, quæ ad nos non pertinent. Hoc igitur est, in mundo esse, & de mundo non esse; quod ad eos pertinet, qui mundo mortui, soli Deo viuunt; ac per hoc mortem corporalem non timent, quæ ipsis non detrimentum, sed lucrum appor-

Philip. 1.

tat, iuxta illud Apostoli Pauli, *Mihi viuere Christus est, & mori lucrum.*

At

Lib. I. Cap. II. 13

At quot quæso nostris temporibus inueniemus sic mundo mortuos, vt iam didicerint etiam carni bene mori, ac per hoc salutem suam in tuto ponere? Ego certè non dubito, in Ecclesia Catholica, non solum in monasterijs, & in clero, sed etiam in sæculo non paucos inueniri homines sanctos, & mundo verè mortuos, qui artem bene moriendi didicerint. Sed illud etiam negari non posse video, plurimos inueniri, non solum non mortuos mundo, sed mundo supra modum addictos, & voluptatum, honorum, & diuitiarum ardentissimos amatores, qui nisi mundo mori constituent, & re ipsa mundo moriantur; sine dubio mala morte peribunt, & cum ipso mundo, vt Apostolus I. Cor. IX. loquitur, damnabuntur.

At, inquit fortasse amatores mundi, nimis difficile est, mundo mori, dum in mundo sumus, & ea bona negligere, quæ Deus hominibus ad fruendum creauit.

His

14 De arte bene mor.

His ego respondeo, non hoc Deū velle, vel iubere, vt opes, & honores, atque alia mundi bona penitus negligantur, vel abijciantur: nam & Abraham amicus Dei in primis fuit, & diuitias ingentes possedit. David quoque, & Ezechias, & Iofias Reges ditissimi, & simul Deo amicissimi fuisse leguntur; quod idem de multis Christianis Regibus, & Imperatoribus dicere possemus. Non igitur bona mundi huius, opes, honores, voluptates Christianis hominibus penitus interdiciuntur; sed amor immoderatus rerum mundi huius, qui *concupiscentia carnis, concupiscentia oculorum, & superbia vitæ* à Ioanne Apostolo nominantur. Abraham certè ditissimus erat, sed non solum diuitijs moderatè utebatur, sed etiam omnia statim ad nutum Dei profundere paratissimus erat. Qui enim filio vnico, optimo, & amatissimo non pepercit, cum eum Deus ab ipso patre immolari manda-

Gen. 22.

dauit : quantò facilius opes omnes ad nutum Domini profudisset? Itaque Abraham diues opum erat , sed ditior fide , & charitate ; & ideo non erat de hoc mundo , quin potius mundo mortuus erat . Quod idem dici potest de alijs sanctis viris , qui diuitijs , potentia , & gloria , Regnis etiam , & Imperio præditi , pauperes spiritu fuerunt , & mundo mortui , soli Deo viuentes , artem bene moriendi accuratissimè didicerunt . Itaque non abundantia opum , neque celsitudo honoris , neque Regnum , aut Imperium faciunt hominem esse de mundo , vel vt viuat in mundo , sed *concupiscentia carnis , concupiscentia oculorum , & superbia vite* , quæ vno verbo cupiditas dicitur , & diuinæ charitati opponitur . Proinde si quis incipiat , Deo aspirante , ipsum Deum verè diligere propter se ; & proximum propter Deum ; is incipiet exire de mundo ; & crescente charitate , minuetur cupiditas

16 De arte bene mor.

tas, & incipiet ille idem mori mundo; non enim potest charitas crescere, quin cupiditas minuatur. Ita fiet, vt quod, regnante cupiditate, videbatur non posse fieri, vt videlicet homo in mundo viuens non esset de mundo; crescente charitate, & imminuta cupiditate, reddatur facillimum: quod enim cupiditati est onus importabile, & durum; id charitati est iugum suauis, & onus leue.

Quod ergo supra diximus; exire de mundo, & mori mundo non esse ludum puerorum, sed rem maximam & difficillimam; verissime dictum est de ijs, qui potentiam gratiæ Dei non nouerunt, & charitatis dulcedinem non gustauerunt; & qui animales sunt spiritum non habentes: gustato enim spiritu desipit omnis caro. Igitur omnis, qui seriò cupit artem bene moriendi perdiscere, ex qua arte pendet salus æterna, & omnis vera felicitas; non differat exire de mundo, & plane mori

mori mundo ; cum fieri nullo modo possit, ut quis mundo viuat, & Deo ; & terra fruatur, & celo.

C A P. III.

De tertio præcepto artis bene moriendi, quod est de tribus virtutibus theologicis.

DO C V I M V S in superiore capite, non posse bene mori, qui non exit de mundo, & non moritur mundo. Nunc addendum est, quid sit agendum ei, qui mortuus est mundo, ut viuat Deo : non enim datur bene mori, nisi ei qui bene vixit, ut in primo capite demonstrauius. Summa bene viuendi ponitur ab Apostolo in priore ad Timotheum in illis verbis, *Finis præcepti charitas de corde puro, & conscientia bona, & fide non ficta.* Non ignorabat

1. Tim. 1.

18 De arte bene mor.

bat Apostolus responsionem Domini ad eum qui interrogauerat, *Quid faciendo vitam æternam*

Matt. 19

possidebo? respondit enim, *Si vis ad vitam ingredi, serua mandata:* sed voluit explicare paucissimis verbis finem præcepti primarij, ex quo tota lex, & totius legis intelligentia, & adimpletio, & via ad vitam æternam, dependet: & simul docere voluit, quæ virtutes sint necessariæ ad perfectam iustitiam, de quibus alibi dixerat,

1. Cor. 23

Nunc manent fides, spes, charitas, tria hæc, maior autem est charitas. Ait igitur, *Finis præcepti charitas*, hoc est, finis omnium præceptorum, quorum observatio ad bene viuendum est necessaria; in charitate positus est, sic, vt qui charitatem Dei habeat, omnia præcepta adimpleat, quæ ad primam tabulam pertinent: & qui charitatem proximi habeat, omnia præcepta adimpleat, quæ pertinent ad tabulam secundam. Declarat hanc posteriorem par-

tem

Lib. I. Cap. III. 19

tem, quæ obscurior videri poterat, idem Apostolus in Epistola ad Romanos dicens, *Qui diligit proximum, legem impleuit. nam non adulterabis, non occides, non furaberis, non falsum testimonium dices; & si quod est aliud mandatum, in hoc verbo instauratur, Diliges proximum tuum, sicut te ipsum. Dilectio proximi malum non operatur, plenitudo ergo legis est dilectio.* Ex qua ratiocinatione vnusquisque per se potest intelligere, omnia præcepta, quæ ad Deum colendum referuntur, in vna charitate impleri. Nam quemadmodum charitas proximi erga proximum non operatur malum; sic etiam charitas Dei erga Deum operari non potest malum: proinde plenitudo legis, tam erga Deum, quam erga proximum, est dilectio.

Quæ sit autem vera, & perfecta charitas, tam erga Deum, quam erga proximum; declarat idem Apostolus dicens, *Charitas*

ex

20 De arte bene mor.

*ex corde puro , conscientia bona ,
& fide non ficta .* In quibus ver-
bis per , conscientiam bonam, in-
telligimus cum sancto Augustino,
præfatione in psalmum trigesimū
primum , virtutem spei , quæ est
vna ex tribus virtutibus theolo-
gicis. dicitur autem spes conscien-
tia bona , quia nascitur ex con-
scientia bona : quemadmodum
desperatio ex conscientia mala .

1. Jo. 3. hinc est illud Sancti Ioannis, *Cha-
rissimi , si cor nostrum non repre-
benderit nos, fiduciam habemus ad
Deum .* Sunt igitur tres virtutes,

in quibus perfectio legis christi a-
næ consistit; charitas ex corde pu-
ro ; spes ex conscientia bona; & fi-
des non ficta. Sed quemadmodum
ordine perfectionis prima est cha-
ritas, sic ordine generationis pri-


1. Cor. 13 ma est fides , iuxta illud eiusdem
Apostoli, *Nunc manent, fides, spes,
echaritas , tria hæc : maior autem
horum est charitas ;*

Ordiamur à Fide , quæ prima
omnium existit in corde hominis

iustificandi. Non sine causa beatus Apostolus ad fidem addidit, *non ficta*. Fides enim incipit iustificationem, modò sit vera, & sincera, non falsa, vel ficta. Fides hæreticorum non incipit iustificationem, quia non est vera, sed falsa: fides malorum catholicorum non incipit iustificationem, quia non est sincera, sed ficta. Dicitur autem fides ficta duobus modis; quando vel revera aliquis non credit, sed fingit se credere; vel credit quidem, sed non vivit, ut credit esse vivendum. utroque modo videntur esse intelligenda verba illa Beati Pauli in epistola ad Titum, *Confitentur se nosse Deum, factis autem negant*. sic enim ea interpretantur sancti Patres, Hieronymus in Commentario, & Augustinus fermone 31. de verbis Apostoli.

Tit. 1.

Et ex hac prima virtute hominis iusti, facile potest intelligi quanta sit multitudo eorum, qui non bene vivunt, ac per hoc malè



22 De arte bene mor.

malè etiam moriuntur. Prætermitto infideles, paganos, hæreticos, atheos, qui artem bene viuendi prorsus ignorant. Inter Catholicos quantus est eorum numerus, qui verbis confitentur se nosse Deum, factis autem negant? qui confitentur, Christum esse iudicem viuorum, & mortuorum; & tamen ita viuunt, ac si iudicem nullum haberent? Qui matrem Domini Virginem esse fatentur; & blasphemando meretricem appellare non timent? qui præces, ieiunia, eleemosynas, opera cætera virtutum laudant; & vitia contraria semper exercent? Omitto cætera, quæ nota sunt omnibus. Non igitur fidem non fictam se habere iactent, qui vel non credunt, quod se credere mentiuntur, vel non viuunt, vt fides catholica præcipit esse viuendum: ac per hoc agnoscant, se nondum cœpisse bene viuere; nec sperent feliciter se morituros, nisi gratia Domini aspirante,

te,

Lib. I. Cap. III. 23

te, artem bene viuendi, & bene moriendi perdiscant.

Altera virtus hominis verè iusti Spes est, siue *conscientia bona*, vt eam hoc loco appellandam, cēsuit magister noster Paulus Apostolus. hæc virtus ex fide nascitur; non enim sperare potest in Deo, qui vel Deum verum non nouit, vel eum potentem, & misericordem esse non credit. Sed ad Spem excitandam, & roborandam, vt non solùm spes, sed etiam fiducia dici possit, plurimum valet conscientia bona. Qua fronte enim Deum adibit, atque ab eo beneficia petet, qui sibi conscius est peccati in Deum admissi, & per veram pœnitentiam nondum expiati? Quis enim ab inimico beneficia petit? quis ab eo confidit se adiuuandum, quem sibi iratum esse non dubitat? Audi sapientem, quid de spe impiorum sentiat. *Spes impij, inquit, tanquam lanugo est, quæ à vento tollitur, & tanquam spuma gracilis, quæ à*
pro-

Sap. 5.

24 De arte bene mor.

*procella dispergitur, & tanquam
fumus, qui à vento diffusus est,
& tanquam memoria hospitis u-
nius diei prætereuntis. hæc Sa-
piens, qui sapientissimè admo-
net impios, spem illorum rem
esse fragilem, non solidam; bre-
uem, non diurnam, possunt
enim dum viuunt, aliquo modo
sperare, se aliquando penitentiam
acturos, & Deo reconciliandos;
sed cum mors aduenerit, nisi Deus
eos misericordia speciali præue-
niat, & pœnitentiam illis inspiret;
spes in desperationem commuta-
bitur, & cum alijs impijs dicent,
id quod in eodem loco legitur, *Er-
go errauimus à via veritatis, &
iustitie lumen non luxit nobis.
quid nobis profuit superbia, aut
diuitiarum iactantia quid contulit
nobis? transferunt illa omnia tan-
quam umbra.* hæc Sapiens, qui
nos sapienter admonuit, vt si vo-
lumus bene viuere, & feliciter
mori, non audeamus vel ad pun-
ctum horæ in peccatis hære,
inani*

Sap. 5.

16.

inani fiducia decepti, multum adhuc nobis vitæ superesse; & tempore suo pœnitentiam seriam nos acturos. hæc enim inanis fiducia multos decepit, & adhuc decipiet, nisi artem bene moriendi, dum tempus adest, prudenter addiscant.

Restat virtus tertia, quæ iure dicitur regina virtutum, videlicet Charitas, cum qua nemo perit, sine qua nemo viuit, neque in via, neque in patria. Dicitur autem vera charitas illa esse, quæ nascitur *ex corde puro*; non quòd puritas cordis charitatem propriè gignat: *charitas enim ex Deo est*, 1. Io. 4. vt loquitur Sanctus Ioannes, & clarius Sanctus Paulus, cum ait, *Charitas Dei diffusa est in cordibus nostris per Spiritum sanctum, qui datus est nobis*. Rom. 5. Dicitur igitur charitas esse ex corde puro, quia charitas non accenditur in corde impuro, sed purificato per fidem diuinam ab erroribus; 1. Pet. 1. 22. iuxta illud Apostoli Petri, *Fide*

B pu-

26 De arte bene mor.

purificans corda eorum : & per spem diuinam purificato ab amore, & cupiditate rerum terrenarum. Quemadmodum enim ignis non accenditur in lignis viridibus, humore aqueo plenis, sed in lignis aridis; sic etiam ignis charitatis exigit corda purificata ab amore terreno, & ab inani fiducia in viribus proprijs.

Ex his potest intelligi, quæ sit vera charitas, quæ verò falsa, & fucata. Nam si quis fortè de Deo libenter loquatur, & in precibus vsque ad lacrymas compungatur, & opera quædam bona faciat, eleemosynas distribuens, & sæpè ieiunans: sic tamen vt in corde retineat amorem obscœnum, inanem gloriam, odium erga proximum, & alia id genus, quæ cor impurum, & sordidum reddunt; iste non charitatem diuinam, & veram; sed charitatis inanem speciem, vel simulachrum gerit. Prudentissimè igitur Sanctus Apostolus non simpliciter fidem, spem, & cha-

& charitatem nominauit, cum de vera, & perfecta iustitia loqueretur; sed ait, *Finis præcepti charitas ex corde puro, & conscientia bona & fide non ficta*. Atque hæc est ars vera bene viuendi, & feliciter moriendi, si quis in hac vera & perfecta charitate ad mortem vsque perseueret.

C A P. I V.

De quarto præcepto artis bene moriendi, quod continet tria documenta Euangelica.

QUAMVIS ea quæ dicta sunt de Fide, Spe, & Charitate, sufficere posse videantur ad bene viuendum, & bene etiam moriendum; tamen ad hæc ipsa præstanda perfectius & facilius, tria documenta Christus ipse in Euāgelio nobis dare dignatus est.

28 De arte bene mor.

Luc. 12. sic enim ait apud Euangelistam, *Sint lumbi vestri præcincti, & lucernæ ardentes in manibus vestris; & vos similes hominibus expectantibus Dominum suum, quando reuertatur à nuptijs; ut cum venerit, & pulsauerit, confestim aperiant ei. Beati serui illi, quos cum venerit Dominus inuenerit vigilantes.* Hæc parabola duobus modis potest intelligi; de præparatione ad aduentum Domini in die nouissimo; & ad aduentum in die obitus vniuscuiusque nostrum. Atque hæc posterior explicatio, quæ est sancti Gregorij in Homilia tertiadecima super hoc Euangelium; videtur magis ad rem nostram facere. Nam expectatio diei nouissimæ non pertinebit nisi ad illos, qui tunc in viuis reperientur: Dominus autem eam proposuit Apostolis, & nobis omnibus. Certè autem Apostoli, & Apostolorum successores, per multa sæcula, longissimè aberant à die nouissima. Deinde

Lib. I. Cap. IV. 29

de diem nouissimam multa signa
præuenient, quæ homines exci-
tabunt, dicente Domino, *Erunt* Luc. 22.
*signa in Sole, & Luna, & Stel-
lis, & in terris pressura gentium,
arescentibus hominibus præ timo-
re & expectatione, quæ superue-
nient uniuerso orbi*; aduentum
verò Domini ad iudicium parti-
culare in die obitus cuiusque no-
strum, nulla certa signa præue-
nient; & hunc aduentum signi-
ficant illa verba in sanctis scri-
pturis sapissimè repetita, ventu-
rum Dominum vt furem, videli-
cet quando minus expectatur.

Exponamus igitur breuiter hanc
parabolam; & intelligamus præ-
parationem ad mortem, rem esse
omnibus nobis, præ omnibus re-
bus maximè necessariam. Tria
nobis omnibus Dominus præci-
pit; primum, vt simus præcincti
lumbos; deinde, vt lucernas ar-
dentes in manibus habeamus; po-
stremò, vt vigilemus, expectantes
aduentum Domini, qui quando

30 De arte bene mor.

fit venturus, non minus ignoramus, quàm ignorent plerique omnes furis aduentum. Explicemus verba illa, *Sint lumbi vestri præcincti*. Sententia litteralis horum verborum ea est, vt simus parati & expediti ad currendum obuiam Domino, cum nos per mortem vocauerit ad iudicium particulare. Similitudo præcinctorum lumborum sumpta est ex more Orientalium, qui longis vestibus utebantur, & cum celeriter ambulaturi erant, colligebant vestem, & lumbos præcingebunt, ne vestis longitudo cursum impediret. Hinc de Angelo Raphaelē, qui venerat comitaturus Tobiam iuniorem, dicitur in libro Tobix,

Tob. 5. *Tunc egressus Tobias inuenit iuuenem splendidum, stantem præcinctum, & quasi paratum ad ambulandum.* & ex hac Orientalium consuetudine scripsit sanctus

1. Pet. 2. *Petrus, Propter quod, succincti lumbos mentis vestræ, sobrii perfecte sperate, &c.* & sanctus Paulus in

Epi-

Lib. I. Cap. IV. 31

Epistola ad Ephesios, *State, inquit, succincti lumbos vestros in veritate*. Eph. 6.

Porro habere succinctos lumbos res duas significat; primò virtutem castitatis; secundò promptitudinem ad occurrendum Christo venienti ad iudicium siue particulare, siue generale. Priorem expositionem explicant sancti Patres, Basilius in explicatione capituli quintidecimi Isaiaè Prophetae, Augustinus in libro de continentia, & Gregorius in homilia triadecima super Euangelia. Et verè concupiscentia carnis, præter omnes animi perturbationes, impedit velocem, & expeditum cursum ad occurrendum Christo venienti: quemadmodum è contrario nihil magis expeditum hominem reddit ad Christum sequendum, quàm castitas virginalis.

Nam & in Apocalypsi legimus, Virgines Christum sequi *quòcumque ierit*. & Apostolus hortatur, Apoc. 14.

& dicit, *Qui sine uxore est, sol-* 1. Cor. 7.

32 De arte bene mor.

licitus est, quæ Domini sunt, quomodo placeat Deo: qui autem cum uxore est, sollicitus est, quæ sunt mundi, quomodo placeat uxori, & diuisus est.

Sed altera expositio, quæ non restringit præcinctos lumbos ad solam continentiam, sed extendit ad expeditum obsequium Christi in omnibus rebus; est sancti Cypriani in libro de Exhortatione martyrij, capite octauo; & eam sequuntur qui commentaria scripserunt in Euangelium Lucæ. Sententia igitur huius loci Euangelici est, vt negocia omnia huius vitæ, etiam optima, & necessaria, non ita occupent animos nostros, vt impediunt cogitationem primariam occurrendi Christo, cum nos vocauerit per mortem ad reddendam rationem omnium operum nostrorum, immo etiam verborum, & cogitationum, vsque ad verba otiosa, & cogitationes inutiles. Quid ergo facient cum mors aduenerit improuisa, qui
toti

Lib. I. Cap. IV. 33

toti sunt in rebus temporalibus occupati, & de reddenda Deo ratione de omnibus operibus, de omnibus verbis, de omnibus cogitationibus, de omnibus desiderijs, de omnibus omissionibus, nullo vnquam tempore cogitauerunt? num isti præcincti lumbos current obuiam Christo; an potius implicati, & irretiti iacebunt in sordibus suis, obmutescentes, & desperantes? Quid enim respondebunt Iudici dicenti, cur non attendisti ad verba mea, quibus vos admonui dicens, *Primum quærite Regnum Dei, & iustitiam eius, & hæc omnia adijcientur vobis?* & cur non considerasti verba illa, quæ sæpè in Ecclesia publicè vobis decantata sunt, *Martha, Martha* Matt. 6. *sollicita es, & turbaris erga plurima: porrò unum est necessariū. Maria optimam partem elegit, quæ non auferetur ab ea?* si reprehendi Marthæ sollicitudinem, quæ mihi ipsi seruire deuotissimè cupiebat; an mihi placere potuit sol-

34 De arte bene mor.

licitudo tua congregandi diuitias superuacaneas, aucupandi honores periculosos, explendi cupiditates noxias; & interim obliuisci Regnum Dei, & iustitiam eius, quod est præ omnibus maximè necessarium?

Sed veniamus ad alterum officium serui diligentis, & fidelis. *Et lucernæ ardentes in manibus vestris.* Non satis est seruo fideli, sticcingi lumbos, vt liberè & expedite currat obuiam Domino: sed requiritur lucerna ardens, quæ viam ostendat, cùm nocturno tempore Dominus à nuptiali conuiuio rediens expectetur. Lucerna hoc loco legem Domini significat, quæ viam bonam ostendit, *Lucerna*, inquit Dauid, *pedibus meis verbum tuum.* & *Lex lux*, inquit Salomon in prouerbijis. Sed hæc lucerna non illuminat, neque viam ostendit, si relinquatur in cubiculo, vel in domo; itaque in manibus habenda est, vt viam rectam demonstret. Multi sunt, qui le-
ges

Pl. 118.

Prou. 6.

ges diuinas, & humanas nouerunt; sed ideo peccata multa committunt, vel opera bona & necessaria prætermittunt, quia non gerunt lucernam in manibus, id est, non applicant scientiam legis ad opera. Quàm multi sunt viri doctissimi, qui peccata grauissima perpetrant; quia cum operantur, non consulunt legem Domini, sed iram, aut libidinem, aut aliquam aliam ex perturbationibus animi? Si Rex David cum Bethsabeam nudam aspexit, consulisset legem Domini, *Non concupisces uxorem proximi tui*, nunquam in tam grande scelus incidisset: sed quia consuluit pulchritudinem mulieris, oblitus diuinæ legis, vir alioqui iustus, & sanctus adulterium perpetravit. Oportet igitur lucernam legis Domini non reconditam in cubiculo, sed in manibus semper habere: & Spiritus sancti vocibus obedire, qui iubet, *vt in lege Domini meditemur die, ac nocte*: & vt cum ipso

36 De arte bene mor.

Ps. 118.

ipso Propheta dicamus, *Tu mandasti mandata tua custodiri nimis. Utinam dirigantur viæ meæ ad custodiēdas iustificationes tuas.* Qui enim lucernam legis Domini semper ante oculos mentis habet, Domino suo venienti securus occurret.

Restat officium tertium, atque postremum serui fidelis, vt semper vigilet, incertus quando Dominus veniet. *Beati, inquit, sunt serui illi, quos cum venerit Dominus, inuenerit vigilantes.* Noluit Dominus noster id efficere, vt homines omnes certo tempore de vita discederent; ne toto præcedente tempore indulgerent crapulæ, & ebrietati, ludis & iocis, alijsque operibus malis; & paulò ante mortem conuerterētur ad Deum. Voluit igitur diuina prouidentia, vt nihil esset incertius hora mortis, dum alij moriuntur in vtero matris, alij vix nati, alij in extremo senio, alij in flore iuuentutis: & rursus alij diu languent, alij re-
pen-

penè moriuntur, alij à morbo grauiſſimo, ac penè incurabili conualeſcunt, alij leuiter ægrotant; & cùm videntur à morte ſecuri, creſcit morbi vis, & eos extinguit. Ad hanc incertitudinem deſignandam Dominus noſter in Euangelio dicit, *Et ſi venerit in ſecunda* Luc 12.
*vigilia, & ſi in tertia vigilia venerit, & ita inuenerit, beati ſunt ſerui illi. Hoc autem ſcitate, quoniam ſi ſciret Pater familias qua hora fur veniret, uigilaret utique, & non ſineret perfodi domum ſuam. & vos eſtote parati, quia qua hora non putatis, filius hominis ueniet. Porro ut intelligeremus, quanti momenti ſit, nobis perſuaderi incertitudinem temporis, in quo Dominus ad iudicandum ueniet, ſiue in morte ſingulorum, ſiue in fine mundi; nihil ſæpius ſcriptura ſancta repetit, quàm uocem illam, *uigilate*, & ſimilitudinem furis, qui venire ſolet quando minus creditur eſſe uenturus. Verbum,*

vi-

38 De arte bene mor.

Matt. 24.
& 25.
Marc. 13.
Luc. 12.
& 21.
Matt. 24.
Luc. 12.
1. Thes. 5
2. Pet. 3.
Apoc. 3.
& 16.

vigilate, repetitur passim in Euangelijs Matthæi, Marci, & Lucæ. & similitudo furis, non solum in Euangelijs, sed etiam in epistolis Apostolorum, & in Apocalypsi.

Ex his omnibus intelligi potest, quanta sit negligentia, & ignorantia, ne dicam dementia, & stultitia maximæ partis hominum, qui toties admoniti ab ipso spiritu veritatis per scriptores sanctos, qui mentiri non poterant, ut præparemur ad mortem, ut ad negotium maximum & difficillimum, & à quo pendet sempiterna, & summa felicitas nostra, vel sempiternum, summumq; exitium: tamen pauci sunt, qui ad voces, vel potius tonitrua sancti Spiritus excitentur.

Sed dicet aliquis, quid consilij nobis suggeris, ut vigilemus, sicut oportet, & vigilando ad mortem feliciter obeundam præparemur? Nihil utilius mihi occurrit, quam ut frequenter per serium, conscientia examinem ad mortem

nos

nos præparemus . Et quidem catholici homines singulis annis ad confessionem peccatorum accedendi non omittunt conscientia examina . Et rursus cum ægrotare incipiunt , ex decreto Pij Quinti Pontificis Maximi prohibetur Medici ægrotos secundo inuisere , nisi per confessionem peccata , præmissis conscientia examine , expiauerint . Denique nulli ferè sunt in Ecclesia Catholica , qui morte imminente , præmissis conscientia examine , peccata sua non confiteantur . Sed quid dicemus de illis , qui morte repentina abripiuntur ? Quid de illis , qui phrenesi laborant , vel in delirium incidunt ante confessionem ? Quid de illis , qui morbi grauitate oppressi , ne cogitare quidem possunt , quot & quæ peccata commiserint ? Quid de illis , qui moriendo peccant , vel peccando moriuntur , ut qui in bello iniusto , vel singulari certamine , vel in adulterio deprehensi interficiuntur ?

Ad

40 De arte bene mor.

Ad hæc & similia prudenter, & religiosè vitanda, nihil vtilius excogitari potest, quàm vt qui salutem suam æternam eordi habent; bis diebus singulis, mane videlicet, & vespere, conscientiam suam diligenter discutiant; quid videlicet nocte, vel die præcedente egerint, dixerint, cupiuerint, cogitauerint, in quo peccati labes interuenerit: & si quid eiusmodi repererint, præsertim quod læthale videri possit; non differant veræ contritionis remedium quærere, cum proposito primo quoque tempore ad sacramentum pœnitentiæ accedendi. Itaque petant à Deo contritionis donum, recogitent gravitatem peccati, detestentur ex animo culpam suam, discutiant seriò, quis, quem offenderit; homunculus videlicet Deum Omnipotentem, & seruus inutilis Dominum cæli & terræ: non parcat oculus lacrymis, nec manus tusioni pectoris: denique propositum verum & efficax conc-

Lib. I. Cap. IV. 41

cipiant, Deum nunquam amplius peccando irritandi, neque patrem optimum offendendi. Hoc examen si manè, & vesperè, aut saltem semel in die ritè frequentetur; vix fieri poterit, vt quis moriendo peccet, vel peccando moriatur, vel vt delirio, vel amentia, vel casibus alijs præueniatur. Atque ex hoc fiet, vt bene ad mortem comparatis nobis, neque incertitudo mortis officiat, neque vitæ perpetuæ felicitas desit.

C A P. V.

De quinto præcepto artis bene moriendi, in quo detegitur error diuitum huius mundi.

AD ea, quæ supra dicta sunt, addenda est refutatio cuiusdam erroris, qui passim grassatur inter diuites huius sæculi: & multum

42 De arte bene mor.

tum impedit vitam bonam, mortemq. felicem . Error autem in eo positus est, quòd existimant diuites , opes , quas possident , absolute & simpliciter esse suas, quando iusto titulo eas possident; ac per hoc posse iure suo illas consumere , largiri , distrahere : neque posse illis dici , cur ita facis ? cur tam splendidè vestis ? cur tam opiparè epularis ? cur tam liberaliter in alendis canibus , aut accipitribus , vel in ludis alex , vel in alijs oblectationibus pecunias perdis ? respondebunt enim, quid ad te ? de re mea non licet mihi facere quod volo ? Hic verò error est sine dubio grauissimus , & maximè perniciosus . Esto enim diuites huius sæculi domini sint opū suarum , si comparentur ad alios homines : tamen si comparentur ad Deum , Domini non sunt , sed administri , aut œconomi , aut villici . Id verò multis testimonijs possum ostendere . Audi Prophetam regium , *Domini* , inquit , est

95. 23.

ter-

Lib. I. Cap. V. 43

terra & plenitudo eius, orbis terrarum, & uniuersi qui habitant in eo. & rursus alibi, *Mea sunt* Ps. 49. omnes ferae sylvarum, iumenta in montibus, & boues. Si esuriero, non dicam tibi; *meus est enim orbis terrarum, & plenitudo eius.* & in libro primo Paralipomenon, 1. Paralip. 29. cum in ædificationem Templi obtulisset Dauid tria millia talentorum auri, & septem millia talentorum argenti probatissimi, & marmor Parium abundantissime: & ad exemplum Regis, Principes Tribuum obtulissent auri talenta quinque millia, argenti talenta decem millia, & æris talenta decem & octo millia, ferri quoque centum millia talentorum: dixit Dauid ad Deum, *Tua est Domine magnificentia, & potentia, & gloria: cuncta enim, quæ in celo sunt, & in terra, tua sunt. tuum Domine Regnum, & tu es super omnes Principes: tuæ diuitiæ, & tuæ est gloria: tu dominaris omnium.* Quis ego, & quis populus

44 De arte bene mor.

lus meus, ut possimus hac tibi vniuersa promittere? tua sunt omnia, & quae de manu tua accepimus, dedimus tibi. His addi potest testimonium ipsius Dei, qui per Aggæum Prophetam dicit, **Agg. 2.** *Meum est argentum, & meum est aurum;* quod ideo Dominus dixit, ut populus intelligeret, ad nouam Templi ædificationem nihil omnino defuturum, cum ipse Templum reædificari iuberet, cuius est aurum, & argentum, quod in vniuerso terrarum Orbe reperitur.

Luc. 16.

Addam ex testamento nouo, & verbis Christi duo alia testimonia. Parabola extat apud Lucam de villico iniquitatis. *Homo quidam, inquit Dominus, erat diues, qui habebat villicum, & hic difamatus est, quasi dissipasset bona ipsius; & vocauit illum, & ait illi, Quid hoc audio de te? redde rationem villicationis tuæ; iam enim non poteris villicare. Nominem diuitis non potest esse dubium, quin*

Lib. I. Cap. V. 45

quini intelligatur Deus, qui, ut paulo ante dicebamus, per Aggæum clamat, *Meum est argentum, meum est aurum*. Nomine villici, siue œconomi, ut legitur in codicibus græcis, intelligi debet homo diues, ut exponunt sancti Patres Ioānes Chrysofomus apud sanctum Thomam in Cathena aurea, Augustinus in quæstionibus Euangelicis libro 2. quæst. 34. Ambrosius, Bèda, Theophilactus, & Eutymius, & alij in hunc locum sancti Euangelistæ Lucæ. Omnis igitur homo diues sæculi huius, si Euangelio credit, fateri debet, opes, quas possidet siue titulo iusto, siue iniusto, non esse suas; sed si iusto titulo possidet, se villicum, siue œconomum esse Dei; si iniusto, esse furem, & latronem. Quòd autem homo diues in hoc mundo non sit dominus opum, quas possidet; ex eo potest intelligi, quòd accusatum iniustitiæ apud Deum; Deus aut per mortem corporis, aut per egestatem illum

46 De arte bene mor.

illum amouet à villicatione: hoc enim significant illa verba, *Redde rationem villicationis tuæ; iam enim non poteris villicare*. Neque defunt Deo rationes multæ redigendi diuites ad inopiam, & sic eos amouendi à villicatione; naufragia, latrocinia, grandines, erucæ, nimix pluuix, nimix siccitates, nimix procellæ, & alia id genus multa; voces Dei sunt, quæ diuitibus dicunt, non poteris diutius villicare.

Quod autem in extrema parabola Dominus dicit, *Facite vobis amicos de mammona iniquitatis; ut cum defeceritis, recipiant vos in eterna tabernacula*; non significat eleemosynas esse faciendas de iniustis diuitijs; sed eleemosynas esse faciendas de diuitijs, quæ re vera non sunt diuitiæ, sed vmbra diuitiarum. Id apertè colligitur ex eodem loco Euangelij secundum

LUC. 16.

Lucam, vbi Dominus dicit, *Si in iniquo mammona fideles non fuistis; quod verum est; quis crederet*

VO-

vobis? quorum verborum hæc est sententia, *si in mammona iniquo,* id est, si in diuitijs falsis *fideles non fuistis,* vt eas liberaliter largiremini pauperibus; *quis credet vobis* diuitias veras, diuitias virtutum, quæ hominem verè diuitem faciunt? Sic intellexit, & explicauit hunc locum sanctus Cyprianus in sermone de opere, & eleemosynis. nec multo aliter exposuit sanctus Augustinus in libro secundo *Quæstionum Euangelicarum,* quæstione trigesima quarta, vbi, *mammona iniquitatis,* esse dicit diuitias, quas soli iniqui, & stulti reputant pro diuitijs; cum homines iusti & sapientes nihili eas faciant, & sola dona spiritualia diuitias veras esse contendant.

Alter locus Euangelicus est in eodem cap. 16. Sancti Lucæ, qui potest haberi tanquam commentarius parabolæ de villico iniquitatis. *Homo quidam,* inquit Dominus, *erat diues, qui induebatur purpura & bysso, & epulabatur*

Luc. 16.

tur

48 De arte bene mor.

*tur quotidie splendè. Et erat quidam mendicus, nomine Lazarus, qui iacebat ad ianuam eius, ulceribus plenus, cupiens saturari de micis, quæ cadebant de mensa diuitis, & nemo illi dabat: sed & canes veniebant, & linge-
bant ulcera eius. Factum est autem ut moreretur mendicus, & portaretur ab Angelis in sinum Abrahæ. Mortuus est autem & diues, & sepultus est in inferno.*

Hic certè diues Epulo vnus erat ex illis, qui existimant, se dominos esse diuitiarum suarum, & non villicos, aut œconomos Dei: Ideo non existimabat, se peccare in Deum, si indueretur purpura & bysso, & epularetur quotidie splendè, & canes multos aleret, fortassè etiam mimos, & histriones. Dicebat enim intra se, ego res meas consumo, nulli facio iniuriam, non violo leges Dei, non blasphemio, non peiero, obseruo sabbathum, honoro parentes, non hominem occido, non adulte-
rium

rium perpetro, non furor, non falsum testimonium dico, non concupisco uxorem, aut rem alienam.

At si res ita se habet, cur sepultus est in inferno? cur cruciatur in igne gehennæ? Fatendum igitur est,

falli omnes qui arbitrantur, se esse dominos absolutos opum suarum. nam si diues Epulo habuisset alia peccata grauiora,

scripturâ sancta aliquo modo eorum meminisset. Sed cum nihil addiderit, videtur omnino intelligi voluisse,

superuacaneum illum cultum corporis in vestibus nimis pretiosis, & quotidianos, magnosque sumptus in conuiujs, &

multitudinem seruorum, & canum, cum nulla misericordia erga pauperem vlceribus plenum; satis magnam causam fuisse, cur diues ille

sepultus sit in inferno, æternis ardoribus cruciandus.

Sit igitur certa lex bene viuendi, & bene etiam moriendi: sapè cogitare, & seriò considerare, ac mente reuoluere reddendam esse

50 De arte bene mor.

De orationem de superuacaneo luxu in palatijs, in hortis, in curribus, in multitudine seruorum, in pretio vestium, in conuiujs, in coaceruandis opibus, in alijs sumptibus non necessarijs, ob quæ fit iniuria magna multitudini pauperum, & ægrotorum, quibus deest, quod alijs superest; qui sine dubio, & nunc ad Deum clamant, & in die iudicij clamare non desinent, donec ipsi quoque cum diuite Epulone flammis inextinguibilibus cremandi tradantur.

C A P. VI.

De præcepto sexto artis bene moriendi, quo explicantur tres virtutes morales.

QUAMVIS tres virtutes theologicae, Fides, Spes, Caritas, compendio quodam continent

neant omnia præcepta bene viuendi, ac per hoc etiam bene moriendi; tamen Spiritus sanctus auctor primarius omnium librorum diuinorum, ad maiorem intelligentiam huius artis saluberrimæ, addere voluit tres alias virtutes, quæ mirum in modum adiuuant homines, vt bene viuant, & bene etiam moriantur. Eæ sunt Sobrietas, Iustitia, & Pietas; de quibus sic loquitur Apostolus Paulus in Epistola ad Titum, *Apparuit gratia Dei*

Tit. 2.

Saluatoris nostri omnibus hominibus, erudiens nos vt abnegantes impietatem, & secularia desideria, sobriè, iustè, & piè viuamus in hoc seculo, expectantes beatam spem, & aduentum gloriæ magni Dei, & Saluatoris nostri Iesu Christi. Erit ergo sextum præceptum bene viuendi, & bene moriendi, *vt abnegantes impietatem, & secularia desideria, sobriè, iustè, & piè viuamus in hoc seculo.* Habetur hic summa totius diuinæ legis ad vnâ sen-

52 De arte bene mor.

Ps 36. tentiam incredibili breuitate con-
tracta: *Declina à malo, & fac bo-
num*, ait sanctus Propheta David.
In malo duo sunt, auersio à Deo,
& conuersio ad creaturas, iuxta
Hier. 2. illud Hieremix, *Duo mala fecit
populus meus: me dereliquerunt
fontem aquæ viuæ, & foderunt
sibi cisternas, quæ continere non
valent aquas.* Quid igitur faciet
qui vtrumque malum cupiet de-
clinare? abnegabit *impietatem &
secularia desideria*. Impietas enim
auertit à Deo, & sæcularia deside-
ria conuertunt ad creaturas. Quod
verò attinet ad faciendum bonum,
tunc legem implemus, cum *sobrie,
iuste, & pie* viuimus, hoc est,
cum sumus sobrij erga nos ipsi, iu-
sti erga proximum, & pij erga
Deum.

Sed placet hæc paulò copiosius
explicare, vt saluberrimum, bre-
uissimumq: præceptum, facilius ad
praxim redigi possit. Quid igitur
est impietas? vitium contrarium
pietati. Quid pietas? virtus siue
do-

donum Spiritus sancti, quo Deum respicimus, colimus, & veneramur, ut patrem. Iubemur ergo sic abnegare impietatem, *ut piè vivamus in hoc sæculo*: vel quod in idem recidit, sic piè vivere in hoc sæculo, ut omnem abnegetur impietatem. Sed cur duo ista posita sunt, cum alterum sufficeret? Nimirum placuit Spiritui sancto ita loqui, ut intelligamus, debere nos, si volumus Deo placere, sic pietatem colere, ut nullam admixtam habeat impietatem. Neque enim desunt inter Christianos, qui pietatem colunt, dum orant Deum, dum sacrificio tremendo assistunt, dum sacerdotem concionantem audiunt: sed interim vel blasphemant Deum in ludo, vel iurant per Deum sine causa, vel vota Deo facta non implent. Id verò quid aliud est, quam piè colere Deum, & impium esse in Deum? Oportet igitur, eos qui cupiunt bene vivere, ut detur illis bene mori, ita piè Deum cole-

54 De arte bene mor.

re, vt abnegent omnem impietatem, immo etiam omnem umbrā, quamuis tenuissimam impietatis. Parum enim prodest, quotidie Missam audire, & Christum in sacro mysterio venerari; si interim impiè Deum blasphemēs, vel per Deum peierēs.

Est verò illud etiam diligenter attendendum, quòd non dixit Apostolus, abnegantes impietatem, sed *omnem impietatem*, id est, omne genus impietatis, & non solum atrocem, sed etiam leuem impietatem. Quod aduersus eos dicitur, qui non magnificiunt iurare sine necessitate, in locis sacris petulanti oculo quamuis non lasciuo feminas respicere, inter sacra solemnia confabulari, & alia id genus peccata committere; quasi Deum præsentem esse, & omnia cernere, & peccata quantumuis leuia notare non crederent. Deus noster, *Deus zelotes est, visitans iniquitates patrum in filios, in tertiam, & quartam*

ge-

generationem eorum, qui oderunt eum; & faciens misericordiam in millia bis qui diligunt eum, & custodiunt præcepta eius. Hoc ipsum exemplo suo docuit Filius Dei, qui cum mitis, & humilis esset, & cum malediceretur, non maledicebat; cum pateretur, non comminabatur: tamen cum vidisset in templo vendentes columbas, & nummularios sedentes, zelo magno succensus, flagello facto ex funiculis, eiecit vendentes, & ementes, & mensas nummulariorum euertit; & dixit, Scriptum est, quia domus mea domus orationis est, & vos fecistis illam speluncam latronum. atque hoc ipsum bis fecit, semel anno primo prædicationis, teste sancto Ioanne; & semel anno postremo, testibus tribus alijs Euangelistis.

1. Pet. 2.

Io. 2.

Io. 2.

Mat. 21.

Mar. 11.

Luc. 19.

Pergamus ad secundam virtutem, quæ dirigit actiones erga proximum. Secunda virtus est Iustitia, de qua dicit Apostolus, *abnegantes secularia desideria iuste*

56 De arte bene mor.

viuamus. Hic etiam locum habet illa sententia generalis, *Declina à malo, & fac bonum.* non enim potest esse vera iustitia erga proximum, ubi non cessant sæcularia desideria. Quid enim significant desideria sæcularia, nisi concupiscentiam carnis, concupiscentiam oculorum, & superbiam vitæ, quæ non sunt ex Deo, sed ex mundo, siue sæculo? Itaque sicut iustitia iniusta esse non potest, sic etiam, sæcularia desideria non possunt ullo modo cum iustitia vera coniungi. Poterit quidem filius huius sæculi verbo & lingua simulare iustitiam, sed opere, & veritate eam præstare nullo modo poterit. Prudentissime igitur sanctus Apostolus non dixit solum, iuste uiuamus, sed præmisit, *abnegantes sæcularia desideria*; ut radicem infectam veneno cōcupiscētiæ, prius euellendam esse significaret, quam bona arbor iustitiæ plantari in corde bono & optimo possit.

Quid autem sit iuste uiuere, non

vi-

videtur in dubium reuocari debere. Notum enim omnibus est, iustitiam hoc iubere, vt detur vnicuique suum. *Reddite*, inquit Apostolus, *omnibus debita; cui tributū, tributum; cui vectigal, vectigal; cui timorē, timorem; cui honorem, honorem.* Principi debetur tributum, parentibus honor, dominis timor: sic enim loquitur Dominus per Malachiam, *Si pater ego sum, ubi est honor meus? & si Dominus ego sum, ubi est timor meus?* Venditori debetur iustum pretium, operario iusta merces, & sic de alijs ad eundem modum. Nec minori ratione, sed multo etiam maiore, ij, ad quos pertinet distribuere bona communia, secundum iustitiam distributiua ea conferre debent magis merentibus; non secundum acceptionem personarum magis coniunctis, vel magis dilectis. Si quis igitur artem bene viuendi, & bene moriēdi discere velit, audiat sapientem *Sap. 1.* initio libri sui clamātem, *Diligite*

58 De arte bene mor.

Iac. 5.

*iustitiam, qui iudicatis terram. au-
diat & sanctum Iacobū in Epistola
sua lamentantem; Ecce merces ope-
rariorum, qui messuerunt regiones
vestras, quæ fraudata est à vobis,
clamat, & clamor eorum in au-
res Domini Sabaoth introiuit.*

Restat virtus tertia, quæ dici-
tur Sobrietas, cui non minus cō-
traria sunt desideria sæcularia,
quàm Iustitiæ. Neque enim per
sobrietatē hoc loco intelligimus
solū virtutem contrariam ebrie-
tati, sed in vniuersum virtutem
temperantiæ, siue moderationis,
quæ facit, vt homo secundum ra-
tionem, non secundum cupidita-
tem metiatur, quæ sunt necessaria
ad corpus curandum, vel conser-
uandum. Porrò virtus ista rarif-
simè apud homines inuenitur; &
sæcularia desideria videntur, do-
mos penè omnium diuitum re-
pleuisse. Sed qui sapiunt, non
attendere debent ad id quod stul-
ti faciunt, quantumuis plurimi,
ac penè innumerabiles sint: sed ad
id,

id, quod faciunt sapientes. Certè sapientissimus fuit Salomon, & tamen orauit Deum dicens, *Duo* Prou. 30.
rogavi te, ne deneges mihi, antequam moriar: mendicitatem, & diuitias ne dederis mihi, sed tantum victui meo tribue necessaria.

Apostolus Paulus sapiens erat, & dicebat, *Habentes alimenta, &* 1. Tim. 6.
quibus tegamur, his contenti simus: nihil enim intulimus in hunc mundum; haud dubium, quod nec auferre quid possumus.

Quæ ratio sapientissima est. Quorsum enim solliciti esse debemus de superuacaneis diuitijs, cum eas nobiscum asportare ad locum, ad quem per mortem pergimus nequeamus? Christus Dominus non solum Salomone, & Paulo sapientior, sed ipsa diuina sapientia erat, & tamen dicebat, *Beati pau-* Luc. 6.
peres, & va vobis diuitibus: & de

se ipse dixit, *Vulpes foveas habent, & volucres cali nidos: filius autem hominis non habet ubi caput suum reclinet.* Luc. 9.

60 De arte bene mor.

Deut. 19. *rum, vel trium testium stabit omne verbum*, quanto magis in ore trium horum sapientissimorum virorum stare debet omne verbum? Quid si addamus, quòd diuitiæ, quæ nobis supersunt, nostræ non sunt, sed pauperum, vt communis sententia Sanctorū Patrū, & Scholasticorum Doctorum habet; nonne stulti sunt, qui diligenter custodiunt id, vnde ad gehennam diuino iudicio damnabuntur.

Tit. 2. Si quis igitur cupiat artem bene viuendi, & feliciter moriendi, omnino perdiscere, non sequatur turbam, quæ non credit, vel non magnificat, nisi quæ videt: sed Christum, & Apostolos eius sequatur, qui verbò & opere docuerunt, negligenda esse præsentia, & expectandam esse *magnam spem*, & *aduentum gloriæ magni Dei, & Saluatoris IESU Christi*. Verè enim tam magna res est, quam speramus in glorioso aduentu Domini nostri IESU Christi de cælo ad iudicium; vt omnis gloria, & om-

Lib. I. Cap. VII. 61

& omnes diuitiæ, & omnia gaudia præterita mundi huius, habenda sint, quasi non fuerint; & stultissimi, & infelicissimi iudicandi sint, qui in re tanti momenti stultis potius, quàm sapientibus fidem habere voluerint.

C A P. VII.

De septimo præcepto artis bene moriendi, quod est de oratione.

DVXIMVS hætenus præcepta bene moriendi ex tribus virtutibus theologis, fide, spe, & charitate; & rursus ex tribus moralibus, sobrietate, iustitia, & pietate; de quibus omnibus beatus Apostolus Paulus nos admonuit. Addam nunc aliud præceptum ex tribus operibus virtutum, Oratione, Ieiunio, & Eleemosyna, quod ab Angelo Raphaelè didicimus. sic enim legimus in
li-

62 De arte bene mor.

Tob. 12. libro Tobiaë Raphaelem Angelum esse locutum, *Bona est oratio cum ieiunio, & eleemosyna, magis quã thesauros auri recondere.* Est autem hoc ternarium operum bonorum, fructus trium virtutum, religionis, misericordiæ, & temperantiæ, quæ cum pietate, iustitiã, & sobrietate magnam habent similitudinem. Nam quemadmodum pietas respicit Deum, iustitia proximum, sobrietas se ipsum: sic etiam oratio, quæ est actio religionis, respicit Deum; eleemosyna, quæ est actio misericordiæ, respicit proximum; ieiunium, quod est actus abstinentiæ, respicit se ipsum. De oratione multi multa scripserunt: nos pro ratione instituti nostri, tria solum capita explicabimus; vnum de necessitate orationis; alterum de fructibus orationis; tertium de modo fructuosè orandi.

Necessitas orationis in diuinis literis adeo perspicua est, vt nihil ea clarius vel præcipiatur, vel
osten-

Lib. I. Cap. VII. 63

ostendatur . Quamuis enim sciat Deus , quibus rebus indigeamus , vt Dominus ipse affirmat apud Matthæum: tamen vult vt ea petamus , & per orationem , quasi per manus spirituales, vel instrumentũ aliquod ad hanc rem accõmodatũ, ea capiamus . Audi Dominũ apud Lucam , *Oportet semper orare , & nunquam deficere. item , Vigilate omni tempore , orantes.* Audi Apostolum , *Sine intermissione orate .* Audi Ecclesiasticum , *Ne impediaris orare semper .* Quæ præcepta , non hoc significant , vt nihil aliud agamus ; sed vt huius tam salubris exercitationis nunquam obliuiscamur , & ad eam identidem reuertamur . Id quod nos Dominus , & Apostolus eius, exemplo suo , docuerunt . Christus enim , & Apostolus non ita semper orabant , vt non etiam populos docerent , & signis ac prodigijs sermonem confirmarent; & tamen dici poterant semper orare, quia frequentissimè orabant. Quo modo intelliguntur illa,

Matth. 6.

Luc. 18.
Luc. 21.

1 Thef. 5.

Eccles. 18

64 De arte bene mor.

Ps. 24. illa , *Oculi mei semper ad Domi-*
Ps. 33. *num . & , Semper laus eius in ore*
Luc. 24. *meo . & illud de Apostolis , Erant*
semper in templo laudantes & be-
nedicentes Dominum .

Iam verò fructus orationis præcipuè sunt tres , Meritum , Satisfactio , & Impetratio . De merito testimonium Christi habemus in
Matt. 6. Euangelio , *Cùm oratis , non eritis sicut hypocrita , qui amant in Synagogis , & in angulis platearum stantes orare , ut videantur ab hominibus . Amen dico vobis , receperunt mercedem suam . Tu autem cùm oraveris , intra in cubiculum tuum , & clauso hostio orapater tuum in abscondito ; & pater tuus , qui videt in abscondito , reddet tibi .* Quibus verbis , non prohibet Dominus orationem in loco publico fieri ; nam & ipse publicè oravit , antea quàm Lazarum excitaret : sed prohibet orationem publicam , quando ea fit , ut qui orat à multis videatur ; idque ob inanis gloriæ cupiditatem : alioqui

Jo. 11.

qui etiam in tēplo possumus orare, & ibidem inuenire cubiculum cordis, & in eo orare Patrem *in abscondito*. Illud autem, *reddet tibi*, significat meritum: nam quemadmodum de Pharisæo dixit, *recepit mercedem suam*, id est laudem humanam: sic de orante in cubiculo cordis, & solum Deum respiciente, intelligendum est, reddendam illi esse mercedem à patre, *qui videt in abscondito*. De satisfactione pro peccatis præteritis, notum est ex usu Ecclesiæ, in qua semper cū iniungitur satisfactio, cum eleemosyna, & ieiunio adiungitur oratio: immò verò sæpè omittitur eleemosyna, vel ieiunium, sed oratio nunquam omittitur. Denique quod sit impetratoria beneficiorum multorum, docet pulcherrimè sanctus Ioānes Chrysoströmus in duobus libris de oratione: vbi vtitur similitudine manuum humanarum. Nam quemadmodum homo nascitur inermis, & nudus, & egenus omnium rerū,

& ta-

66 De arte bene mor.

& tamen queri nō potest de creatore , quia dedit illi manus , quæ sunt organum organorum , quibus potest homo sibi parare cibū , & vestes , & domum , & arma , & reliqua omnia : sic etiam homo spiritualis nihil potest sine ope diuina , sed habet orationis virtutem , quasi organum organorum spiritualium , per quam facile potest omnia sibi parare .

Præter hos tres primarios fructus , sunt alij permulti . Nam in primis oratio mentem illustrat . Neque enim fieri potest , vt homo mentis oculos in Deum , qui lux est , intentè defigat , quin ab eo aliquantulum illustretur . *Accedite ad eum* , inquit Dauid , & *illuminamini* . Deinde oratio spem & fiduciam alit . Quo enim aliquis cum alio frequentius loquitur , eò fidentius ad eum accedit . Tertio inflamat oratio charitatem , & mentem ad maiora dona recipienda capaciores reddit , vt S. August. affirmat . Quarto auget hu-

Ps. 33.

Lib. 1. de
serm. Dñi
in monte
cap. 7.

Lib. I. Cap. VII. 67

humilitatem, & timorem castum. Nam qui ad orationem accedit, intelligit, se Dei esse mendicum, ac per hoc humiliter coram eo apparere solet; & diligentissimè cauet, ne eum offendat, cuius ope in rebus omnibus eget. Quinto gignit oratio frequens in animo orantis contemptum rerum omnium temporalium. Neque enim fieri potest, ut non vilescant, & sordeant omnia terrena illi, qui caelestia, atque æterna assidue speculatur. vide Sanctum Augustinum in libro nono Confessionum. Sexto parit oratio delectationem incredibilem, cum per eam fiat, ut incipiat homo gustare, quam suavis sit Dominus. Quanta autem sit hæc suauitas, vel ex eo potest intelligi, quod nonnullos non solum pernoctare, sed etiam dies integros cum integris noctibus in oratione coniungere sine labore potuisse nouimus. Denique præter utilitatem, & voluptatem affert etiã oratio dignitatem, atque honorẽ
non

Lib. 9. c. 1
& 10.

68 De arte bene mor.

non exiguum oranti . Ipsi enim etiam Angeli animam illam honorant , quam cernunt tam familiariter , & tam crebrò ad colloquiũ diuinæ Maieſtatis admitti . Vide ſanctum Ioannem Chryſoſtomum libro primo de orando Deum .

Reſtat , vt de ratione bene orãdi aliquid dicamus , in qua re poſita eſt præcipuè ars bene viuendi , ac per hoc etiam ars bene moriendi . Nam quod ait Dominus ,

Luc. 6. *Petite , & accipietis . & , Omnis qui petit , accipit* , declarauit ſanctus Iacobus in Epistoſa ſua eſſe intelligendum cum cõditione , ſi

Mat. 13. *bene petamus . Petit* , inquit , *& non accipitis , eo quod malè petatis* . Licebit ergo ſic ratiocinari , Qui bene petit donum bene viuendi , vtique accipiet ; & qui bene petit perſeuerantiam bene viuendi vſque ad mortem , & per hoc ipſam felicem mortem , ſine dubitatione accipiet . Explicemus igitur breuiter cõditiones bonæ orationis , vt diſcamus bene orare ,

bene

Lib.I. Cap. VII. 69

bene viuere , & bene mori .

Prima conditio est Fides, dicente Apostolo, *Quomodo inuocabūt, Rom. 10.*
in quem non crediderunt? cui con-
 sonat sanctus Iacobus, *Postulet in lac. 6.*
fide nihil hæsitants . Sed hæc ne-
 cessitas fidei , non ita intelligenda
 est , vt necesse sit , certò credere ,
 Deum facturum esse quod peti-
 mus ; sic enim fides non rarò fal-
 sa inueniretur , ac per hoc nihil
 omnino impetraremus . Creden-
 dum igitur est , Deum esse poten-
 tissimum , sapientissimum , opti-
 mum , fidelissimum ; & proinde
 posse , & scire , & paratum esse
 facere , quod petimus , si deceat
 illum dare , & nobis expediat ac-
 cipere , quod petiuimus . Hanc fi-
 dem postulauit Christus ab illis
 duobus cæcis , qui curari deside-
 rabant , *Creditis quia hoc possum Mart. 9.*
facere vobis? Eadem fide orauit
 Dauid pro filio ægrotante . Nam
 non certò credidisse, Deum factu-
 rum , sed posse facere quod pete-
 batur , demonstrant illa verba ,

Quis

70 De arte bene mor.

2. Reg. 12.

Quis scit si fortè donet eum mihi Dominus? Simili fide orasse Apo-

2. Cor. 12.

stolum Paulum, vt auferretur ab eo stimulus carnis; dubitari non potest: quoniam orauit ex fide, & fides eius falsa fuisset, si certò credidisset, Deum facturum fuisse, quod eo tempore petijt; non enim tunc quod petijt, impetrauit. Neque alia fide orat Ecclesia, vt omnes hæretici, pagani, schismatici, denique mali Christiani conuertantur ad pœnitentiam; quos tamen certum est, non omnes conuerti. de qua re vide sanctum Prosperum in libris de

Li. 1. c. 4.

Altera conditio bonæ orationis, eaque valdè necessaria, spes, siue fiducia est. Quamuis enim non oporteat per fidem, quæ est opus intelligentiæ, certò statuerè, Deum facturum esse, quod petimus; oportet tamen per spem, & fiduciam, quæ est actio voluntatis, firmiter adhærere benignitati diuinæ, & certò confidere,

Deum

Lib. I. Cap. VII. 71

Deum facturum esse, quod petimus. Hanc conditionem quæsiuit Dominus in Paralytico, cui dixit, *Confide fili, remittuntur tibi peccata tua.* Matt. 9. Eandem requirit Apostolus ab omnibus, cum ait, *Accedamus cum fiducia ad thronum gratiæ eius.* & multo antea Propheta Deum dicentem induxit, *Quoniam in me sperauit, liberabo eum.* Ps. 90. Quia verò fiducia nascitur ex perfecta fide, ideo cum scriptura requirit fidem in rebus magnis, adiungit aliquid pertinens ad fiduciam. hinc legimus apud Marcum, *Quicumque dixerit monti huic, tollere, & mittere in mare, & non hesitauerit in corde suo, sed crediderit quia quæcumque dixerit, fiant; fiet ei.* Mat. 11. de qua fide gignente fiduciam intelligitur illud Apostoli, *Si habuero tantam fidem, ita ut montes transferam,* 1. Cor. 13 *&c.* Hinc scribit Io. Cassianus in collatione de oratione, *signum certum impetrationis esse, cum quis in oratione certò confidit, se* Collat. 9. c. 52.
acce-

72 De arte bene mor.

accepturum quod petijt ; & nullo modo in ea petitione hæsitat , & lætitia spirituali orando perfunditur .

Tertia conditio est charitas, siue iustitia, qua iustificamur à peccatis : non enim certò impetrant beneficia Dei ; nisi qui sunt eius amici . sic enim loquitur Dauid in
Ps. 33. *Psalmis, Oculi Domini super iustos , & aures eius ad preces eorũ .*
Ps. 65. *& in alio loco , Si aspexi iniquitatem in corde meo , non exaudiet Dominus .* & in testamento nouo
Io. 15. *Dominus dicit , Si manseritis in me , & uerba mea , id est , præcepta mea , in uobis manserint ; quodcumque uolueritis , petetis , & fiet uobis .* & Discipulus dilectus , *Si cor nostrũ non reprehenderit nos , fiduciam habemus apud Deum , & quicquid petierimus , accipiemus , quoniam mandata eius custodimus , & ea que sunt placita , coram eo facimus .* Neque huic doctrinæ contrarium est , quod Publicanus petens à Deo indulgentiam

tiam peccatorum, iustificatus discesserit. Nam peccator pœnitens non impetrat, vt peccator, sed vt pœnitens: vt peccator enim inimicus est Dei, vt pœnitens amicus Dei esse incipit. Nam is, qui peccat, facit quod Deo non placet, sed is, quem peccasse pœnitet, facit quod Deo maximè placet.

Quarta conditio est humilitas, qua is, qui orat, non in sua iustitia, sed in Dei benignitate confidit. *Ad quem aspiciam, inquit* Isa. 66.
Deus, nisi ad pauperculum, & contritum spiritu, & tremementem sermones meos? & Ecclesiasticus addit, *Oratio humiliantis se nubes penetrabit, & non discedet, donec Altissimus aspiciat.* Eccles. 35.

Quinta conditio, Deuotio est, quæ facit vt qui orat, non negligeret oret, vt plerique facere solent, sed attentè, sollicitè, diligenter, atque ardentè oret. Reprehendit enim Dominus grauitè eos, qui solis labijs orant.

Populus hic, inquit Dominus per Isa. 29.

D Isaiam,

74 De arte bene mor.

Mat. 15. *Isaiam, labijs me honorat, cor autem eorum longe est à me. Oritur autem hæc virtus ex fide viua, & non in solo habitu, sed in actu posita. Qui enim attentè, & firma fide cogitat, quanta sit maiestas Dei, quanta vilitas nostra, quàm magna res, quam petimus; vix fieri potest, vt non cum summa humilitate, reuerentia, deuotione, ardore ad orandum accedat.*

Placet hic adiungere duo sanctorum Patrum egregia testimonia. Sanctus Hieronymus in dialogo aduersus Luciferianos, Ad orationem, inquit, assisto; non orarem, si non crederem: sed si verè crederem, illud cor, quo Deus videtur, mundarem, manibus tunderem pectus, genas lacrymis rigarem, corpore inhorrescerem, ore pallerem, iacerem ad Domini mei pedes, eosque sietu perfunderem, crine tergerem, harenem certè trunco crucis, nec prius omitterem, quàm misericordiam impetrarem; nunc verò creberri-

me

mè in oratione mea, aut per porticus deambulo, aut de scœnore com-
 puto, aut abductus turpi cogita-
 tione, etiam ea quæ dictu erube-
 scenda sunt, gero. Vbi est fides?
 siccinè putamus crasse Ionam? sic
 tres pueros? sic Danielelem inter
 leones? sic certè latronem in cru-
 ce? Sanctus Bernardus in sermo-
 ne de quatuor modis orandi, Om-
 nino, inquit, oportet nos oratio-
 nis tempore curiam intrare cele-
 stem, illam utique curiam, in
 qua Rex Regum stellato sedet so-
 lio, circumdante innumerabili, &
 ineffabili beatorum spirituum exer-
 citu. Quanta ergo cum reueren-
 tia, quanto timore, quanta illuc
 humilitate accedere debet à palude
 sua procedens, & repens ranun-
 cula vilis? Quàm tremebundus,
 quàm supplex, quàm denique hu-
 milis, & sollicitus, & toto inten-
 tus animo, Maiestati gloriæ in præ-
 sentia Angelorum, in concilio in-
 storum, & congregatione assiste-
 re poterit miser homuncio? in

76 De arte bene mor.

*cunctis igitur actionibus nostris
multa est opus animi vigilantia,
sed præcipuè in oratione.*

Sexta conditio, perseverantia, est, quam Dominus duabus parabolis propositis cõmendavit apud **Luc. 11.** Evangelistam Lucam. Prior est de illo, qui media nocte perrexit ad amicum, vt accommodaret ei tres panes; qui cum sæpè reijceretur, quòd esset importunum tempus; tamen perseverans in petendo, obtinuit quod petebat. **Luc 18.** Posterior est de vidua, quæ interpellabat iudicem, vt eam vindicaret de aduersario suo; qui Iudex quãuis esset valde malus, & neque Deum timeret, neque hominem reuereretur; tamen victus perseverantia, & importunitate mulieris, vindicavit illam de aduersario suo. Ex his colligit Dominus, multo magis perseverandum nobis esse in oratione ad Deum, qui iustus, & benignus est. **Iac. 1.** Atque, vt addit Sanctus Iacobus, *Dat omnibus affluenter, & non imprope-*

perat ; hoc est, *dat liberaliter omnibus dona sua petentibus, & non improperat importunitatem, quòd videlicet nimis sæpè molesti sint in petendo.* Deus enim est sine mensura diues, & sine mensura misericors. Addit sanctus Augustinus in explicatione vltimi versic. Psalmi 65. ad illa verba, *Benedictus Deus, qui non amouit orationem meam, & misericordiam suam à me ; Si videris, non esse amotam deprecationem tuam, securus es, quia non est amota à te misericordia eius.*

CAP. VIII.

De octauo præcepto Artis bene moriendi, quod est de Ieiunio.

SE Q V I T V R, vt de ieiunio, secundum ordinem ab Angelo positum, breuiter exponamus. Ac omissis multis, quæ Theologi

78 De arte bene mor.

de ieiunio disputant, ea solum adferemus, quæ ad rem nostram faciunt. Propositum nobis est, artem bene viuendi exponere, quatenus ea ad artem bene moriendi viam sternit. Ad hanc artem tria illa sufficere videntur, quæ disputauimus de oratione, necessitas, fructus, & modus. Necessitas ieiunij pendet ex duplici lege, diuina, & humana: de lege diuina testis est Ioel Propheta,

Ioel. 2. qui ex parte Dei dicit, *Conuertimini ad me in toto corde vestro, in ieiunio, fletu, & planctu.* Idem

Ion. 3. habetur ex Iona Propheta, qui testatur, Niniuitas ad placandum Deum prædicauisse ieiunium, & faccum; & tamen nulla tunc erat lex positua de ieiunio. Idem intelligi potest ex verbis Domini apud

Mat. 6. Sanctum Matthæum, *Tu autem, cum ieiunas, unge caput tuum, ut non videaris hominibus ieiunans, sed patri tuo, qui videt in abscondito; & Pater tuus, qui videt in abscondito, reddet tibi.*

Ad-

Lib. I. Cap. VIII. 79

Addamus vnum, vel alterum, ex Patribus. Sanctus Augustinus sic loquitur in Epistola ad Casulanum, *Ego in Euangelicis, & Apostolicis litteris, totoq. instrumento, quod appellatur testamentum nouum, animo id reuoluens, video praeceptum esse ieiunium: quibus autem diebus non oporteat ieiunare, & quibus oporteat, praecepto Domini, vel Apostolorum, non inuenio definitum.* Sanctus Leo in sermone de Ieiunio decimi mensis. *Illa, inquit, quae rerum futurarum figuras gerebant impletis, quae significauere, finita sunt: ieiuniorum verò utilitatem noui testamenti gratia non remouit; & continentiam corpori, atque animae semper profuturam pia obseruatione suscepit. Quia sicut permanet ad intelligentiam Christianam, Dominum Deum tuum adorabis, & illi soli seruias, & cetera talia mandatorum: ita, quod in eisdem libris de ieiuniorum sanctificatione praeceptum*

Epist. 85

80 De arte bene mor.

est, nulla interpretatione vacatur. Hæc Sanctus Leo, qui non voluit significare, illis iisdem temporibus ieiunandum esse Christianis, quibus ieiunabant Iudæi: sed præceptum ieiunandi Hebræis traditum, obseruandum esse Christianis iuxta determinationem eorum, qui præfunt Ecclesiæ, quod ad tempus, & modum attinet. Quæ autem illa determinatio sit, notius est omnibus, quam vt sit à me necesse declarari: atque hæc de necessitate ieiunij.

Porro fructus, & utilitates ieiunij facile demonstrabimus. Ac primum, vtilissimum est ieiunium ad animam præparandam ad orationem, & rerum cælestium contéplationem, vt Angelus Raphael significauit, cum ait, *Bona est oratio cum ieiunio*. Sic Moses quadraginta dierum ieiunio animam præparauit, antequàm ad colloquium Dei auderet accedere. Sic 3. Reg. 19 Elias quadraginta dies ieiunauit, vt cum Deo in môte Oreb, eo modo

do

do quo poterat, colloqui posset.

Sic Daniel ieiunio hebdomadarū Dan. 10.

trium præparatur ad reuelationes

Dei recipiendas. Sic Ecclesia in,

profestis magnarum celebritatum

ieiunia instituit, vt Christiani pa-

ratiores reddantur ad vacandum

rebus diuinis. Porrò sancti Patres

hanc ipsam vtilitatem ieiunij pas-

sim prædicant. Consulat lector

sanctum Athanasium in libro de

Virginitate; sanctum Basilium in

Oratione prima, & secunda de ie-

iunio; sanctum Ambrosium in li-

bro de Elia, & ieiunio; sanctum

Bernardum in sermone de Vigilia

sancti Andreae. Sed verba sancti

Ioannis Chrysofomi ex Homilia

prima in Genesim, quæ pauca, &

illustria sunt, non grauabor ad-

ducere. *Ieiunium*, inquit Chry-

sofomus, *animæ nostræ alimen-*

tum est, leues ei pennas producit,

vt in sublime feratur, & sum-

ma contemplari queat.

Altera vtilitas ieiunij est ad car-

nem edomandam, & hoc nomi-

82 De arte bene mor.

ne ieiunium valdè placet Deo, cui placet vt carnem crucifigamus cū vitijs & concupiscentijs eius, vt docet Apostolus in Epistola ad Galatas, qui etiam hac ipsa de causa dicebat, *Castigo corpus meum, & in seruitutem redigo, ne cū alijs predicauero, ipse reprobus efficiar.* Nam de ieiunio hæc verba exponunt Chrysostronus, & Theophylactus in Commentario, & sanctus Ambrosius in Epistola ad Ecclesiam Vercellensem. Hanc utilitatem ieiunij prædicant sancti Patres, Cyprianus in sermone de ieiunio; Basilius in oratione 1. de ieiunio; Chrysostronus homilia prima in Genesim; Hieronymus in Epistola ad Eustochium de custodia virginitatis; & Augustinus libro primo Confessionum capite trigesimo primo; & Ecclesia vniuersa ad officium horæ primæ canit, ex hymno sancti Ambrosij, *Carnis terat superbiam potus, cibiq. parcitas.*

Tertia ieiunij utilitas est ad Deū

co-

Lib. I. Cap. VIII. 83

colendum: honori enim sibi ducit
 Deus, cum eius causa ieiunamus.
 Sic enim Apostolus loquitur in
 Epistola ad Romanos, *Obsecro vos, Rom. 12*
ut exhibeatis corpora vestra ho-
stiam viuentem, sanctam, Deo
placentem, rationabile obsequium
vestrum, Græcè λογικὴ λατρεία,
 id est, *rationabilem cultum.* Et
 de hoc cultu loquitur sanctus Lu-
 cas, cum de Anna vidua dicit, *Non*
discedebat de templo ieiunijs, et ob-
secrationibus seruiens nocte, ac die. Luc. 2.
 Et ipsa magna Nicæna Synodus
 Canone quinto vocat ieiunium
 Quadragesimæ, mundum, & so-
 lemne munus, quod offertur ab
 Ecclesia Deo. quomodo etiam,
 loquitur Tertullianus libro de Re-
 surrectione carnis, vbi sacrificia
 Deo grata vocat feras, & aridas
 escas. Et sanctus Leo in sermone
 secundo de ieiunio decimi mensis,
Pro consummata, inquit, percep-
tionem omnium fructuum, dignissi-
mè largitori eorum Deo continen-
tia libamen offertur. Denique san-

82 De arte bene mor.

ne ieiunium valdè placet Deo, cui placet vt carnem crucifigamus cū vitijs & concupiscentijs eius, vt docet Apostolus in Epistola ad Galatas, qui etiam hac ipsa de causa dicebat, *Castigo corpus meum, & in seruitutem redigo, ne cū alijs prædicauero, ipse reprobus efficiar.* Nam de ieiunio hæc verba exponunt Chrysostronus, & Theophylactus in Commentario, & sanctus Ambrosius in Epistola ad Ecclesiam Vercellensem. Hanc vtilitatem ieiunij prædicant sancti Patres, Cyprianus in sermone de ieiunio; Basilius in oratione 1. de ieiunio; Chrysostronus homilia prima in Genesim; Hieronymus in Epistola ad Eustochium de custodia virginitatis; & Augustinus libro primo Confessionum capite trigesimo primo; & Ecclesia vniuersa ad officium horæ primæ canit, ex hymno sancti Ambrosij, *Carnis terat superbiam potus, cibiq. parcitas.*

Tertia ieiunij vtilitas est ad Deū

CO-

colendum: honori enim sibi ducit
 Deus, cum eius causa ieiunamus.
 Sic enim Apostolus loquitur in
 Epistola ad Romanos, *Obsecro vos, Rom. 12*
ut exhibeatis corpora vestra ho-
stiam viuentem, sanctam, Deo
placentem, rationabile obsequium
vestrum, Græcè λογικὴ λατρεία,
 id est, *rationabilem cultum.* Et
 de hoc cultu loquitur sanctus Lu-
 cas, cum de Anna vidua dicit, *Non*
discedebat de templo ieiunijs, et ob-
secrationibus seruiens nocte, ac die. Luc. 2.
 Et ipsa magna Nicæna Synodus
 Canone quinto vocat ieiunium
 Quadragesimæ, mundum, & so-
 lemne munus, quod offertur ab
 Ecclesia Deo. quomodo etiam,
 loquitur Tertullianus libro de Re-
 surrectione carnis, vbi sacrificia
 Deo grata vocat seras, & aridas
 escas. Et sanctus Leo in sermone
 secundo de ieiunio decimi mensis,
Pro consummata, inquit, percep-
tionem omnium fructuum, dignissi-
mè largitori eorum Deo continen-
tia libamen offertur. Denique san-

84 De arte bene mor.

Stus Gregorius in homilia sexta-
decima scribit, per quadragesi-
male ieiunium offerri Deo deci-
mas, & primitias vitæ nostræ.

Quarta utilitas ieiunij est satis-
factio pro peccatis. Id primum
ostendunt exempla scripturarum.

Ion. 3. Niniuitæ ieiunio Deum placave-
runt, ut Jonas testatur. Idem,
Iudæi fecerunt, qui ieiunantes cū

1. Reg. 7 Samuele Deum placaverunt, & vi-
ctoriam de hostibus retulerunt.

3. Reg. 21 Achab Rex impius, ieiunio, & ci-
licio Deum ex parte placavit. He-

Iudit 4. brai tempore Iudith, & Ester non

Ester 4. alio sacrificio, quam ieiunio, fle-
tu, & planctu apud Deum miseri-

cordiam inuenerunt. Hanc ean-
dem doctrinam veteres Patres per-

petuò docuerunt. Tertullianus in
libro de ieiunio, *Sicut, inquit, pri-*

imum usus cibi perdidit, sic iei-
unium Deo satisfaciat. Sanctus Cy-

prianus in sermone de Lapsis,
Iram, inquit, & offensam Dei,

ieiunijs & fletibus, sicut moxet
ipse, placemus. Sanctus Basilus

ora-

oratione prima de ieiunio, *Pœnitentia*, inquit, *sine ieiunio infructuosa, & ociosa est; per ieiunium satisfacito Deo.* Sanctus Io. Chrysostomus homilia prima in Genesim, *Deus*, inquit, *veluti Pater indulgens hanc nobis, quæ per ieiunium fit, curationem invenit.* Sanctus Ambrosius in lib. de Elia, & ieiunio, *Ieiunium*, inquit, *culpe mors, excidium delictarum, & remedium salutis est.* Sanctus Hieronymus in Commentario ad caput tertium Ionæ, *Saccus*, inquit, *& ieiunium arma sunt pœnitentia, auxilia peccatorum.* Sanctus Augustinus sermone sexagesimo de tempore, *Nemo*, inquit, *pro laude humana, sed pro peccatorum indulgentia ieiunet.* Sanctus Leo sermone quarto de ieiunio septimi mensis, docet, ieiunij sacrificio Deum placari. Sanctus Bernardus sermone sexagesimosexto in Cantica, *Ego*, inquit, *interdum abstineo, sed abstinentia mea satisfactio est pro peccato, non super-*

86 De arte bene mor.

perstitio pro impietate.

Quinta denique utilitas ieiunij est, quod est meritorium, & ad beneficia diuina impetranda multum valet. Anna vxor Elcanæ per ieiunium, cum esset sterilis, filium habere meruit. sic enim interpretatur sanctus Hieronymus libro secundo in Iouinianum illa verba scripturæ, *Porro illa flebat, & non capiebat cibum. Anna, inquit, inanem cibo ventrem filio meruit implere.* Sara item per ieiunium triduanum à demone liberatur, vt scribitur in libro Tobix. Sed est insignis locus in Euangelio pro merito ieiunij. sic enim Dominus loquitur, *Tu autem cum ieiunas, unge caput tuum, & faciem tuam laua, ne videaris hominibus ieiunans; & Pater tuus, qui videt in abscondito, reddet tibi.* Vbi verba illa, *reddet tibi*, significant, reddet tibi mercedem: nam opponuntur illis, *Exterminant facies suas vt appareant hominibus ieiunantes: Amen dico*

vobis, quia receperunt mercedem suam. Itaque hypocritæ ieiunantes recipiunt mercedem suam, laudem humanam: iusti ieiunantes, recipiunt mercedem suam, præmium diuinum. Neque desunt clarissima Sanctorum testimonia Patrum. Sanctus Ioannes Euangelista, scripturus Euangelium, indixit solemne ieiunium, vt gratiam rectè scribendi accipere mereretur; vt sanctus Hieronymus tradit præfatione commentariorum in Matthæum; & eum sequutus venerabilis Beda in primum caput Ioânis. Tertullianus in libro de ieiunio, *Etiam, inquit, sacramentorum agnitionem ieiunia de Deo merentur.* Sanctus Ambrosius in Epistola ad Ecclesiam Vercellensem, *Qui sunt, inquit, hi præceptores noui, qui meritum excludunt ieiunij?* Sanctus Athanasius in libro de Virginitate, *Quisquis, inquit, ab immundo spiritu vexatur, certum habere debet, ieiunio spiritus malos affictos abscedere.*

vim

88 De arte bene mor.

vim ieiunij metuentes. Sanctus Basilius oratione prima de Ieiunio, *Ieiunium*, inquit, *ad venturi seculi mala fugienda, & ad assequenda bona utile est.* Sanctus Gregorius Naziāzenus in oratione de laudibus sancti Cypriani explicans, quibus armis, quædam sancta virgo diabolum à se repulerit; *Ieiunij*, inquit, *& humicubationis pharmacum obiecit.* Sanctus Ioannes Chrysostronus sermone primo de ieiunio, *Ieiuna*, inquit, *quia peccasti; ieiuna, ut non pecces; ieiuna, ut accipias; ieiuna, ut non pereant, quæ accepisti.* Sanctus Hieronymus in libro aduersus Iouinianum, ex proposito disputat de merito ieiunij. Sanctus Augustinus sermone sexagesimo secundo, *Ieiunium*, inquit, *remedium est, aut premium, hoc est, aut indulgentiam peccatorum, aut premium regni celestis acquirit.* Sanctus Leo sermone primo de ieiunio septimi mensis, *Per humilitatem*, inquit, *ieiunij contra omnes*

nes

nes hostes nostros diuinum mere-
mur auxilium.

Habemus igitur necessitatem,
& fructum ieiunij. Reliquus est mo-
dus; id est, vt breuiter explicemus,
quo modo sit ieiunandum, vt ieiun-
nium nobis verè sit vtile ad bene
viuendum, ac per hoc etiam ad be-
ne moriendum. Multi enim ieiun-
nant in diebus omnibus ab Eccle-
sia constitutis, videlicet in vigi-
lijs, in quatuor temporibus, in
Quadragesima. neque desunt, qui
sponte ieiunent in aduentu, vt piè
se præparent ad diem Natalis Do-
mini: vel in sexta feria ob memo-
riam passionis Dominicæ; vel in
Sabbato ad honorè Virginis Dei-
paræ. Sed vtrum ita ieiunent, vt
verè fructus ieiunij consequantur;
non sine causa quæri potest. Finis
primarius ieiunij est mortificatio
carnis, vt spiritus fortior euadat.
Ad hunc finem necesse esset, mo-
dica & vili esca nutriri. Et qui-
dem Mater Ecclesia, hoc indicat
cùm iubet, non bis in die, sed se-
mel

90 De arte bene mor.

mel tantum refici corpus ; & refici non carnibus, aut lacticinijs, sed herbis, & leguminibus, & alijs leuioribus escis. Duobus verbis id Tertullianus in libro de resurrectione carnis expressit, cum cibum ieiunantium esse dixit feras, & aridas escas. Certè illi ista non obseruant, qui qua die ieiunant, non minus comedunt in vno prandio, quam alijs diebus in prandio simul & cœna : & qui in prandio illo tam pretiosa fercula ex varijs piscium generibus, alijsque cibis ad gulam irritandã aptissimis preparant, vt non prandium lugentium, & pœnitentium, sed cenam nuptialem, ad multã noctem peruenturam, parare videantur. Qui sic ieiunant, fructus ieiunij sine dubio non consequuntur.

Sed neque illi fructum ieiunij consequuntur, qui quamuis minus lautè, & magis sobriè comedant; tamen in diebus ieiunij non magis sibi temperant à ludis, & iocis, à rixis, & contentionibus, à can-

à cantu lasciuo, & immoderata
 lætitia; & quod grauius est, à fla-
 gitijs, & facinoribus, quàm alijs
 diebus, qui non sunt ieiunio con-
 secrati. Audi, quid Isaias Prophe-
 ta de hoc hominum genere dicat,
Ecce in die ieiunij vestri inueni-
tur voluntas vestra, & omnes de-
bitores vestros repetitis. Ecce ad-
lites, & contentiones ieiunatis, &
percutitis pugno impiè: nolite ie-
iunare, sicut vsque ad hanc diem,
ut audiatur in excelsis clamor ve-
ster. hæc Dominus in Hebræis re-
 præhendit, quòd in diebus ieiu-
 nij, qui sunt dies pœnitentiæ, vo-
 luntates suas, & non Domini vo-
 luntatem implere vellent; & quod
 debitoribus suis non solùm debi-
 ta dimittere nollent, sicut sibi à
 Deo dimitti postulabant; sed ne-
 que vellent dilationem aliquam,
 debitoribus suis concedere. Item
 quòd tempus, quod ieiunantes in
 oratione ad Deum consumere de-
 buissēt, in litibus prophanis, immò
 & in contentionibus consumebāt,

Isa. 58.

De-

92 De arte bene mor.

Denique quòd non solùm , vt pareratin diebus ieiuniorum , non vacabant spiritualibus studijs; sed peccata peccatis addentes, proximos suos impiè percutiebant . Hæc , & similia cauere debent viri pij, si ieiunia sua cupiunt esse Deo grata , & sibi vtilia sic, vt sperare possint deinceps vitam bonam , & mortem pretiosam . Restat eleemosyna ex tribus operibus , quæ Angelus Raphael apud Tobiam , laudauit, & nobis omnibus ad imitandum proposuit .

C A P. I X.

De nono præcepto artis bene moriendi , quod est de eleemosyna .

DE eleemosyna tria breuiter explicanda sunt , necessitas, fructus , modus . Et quidem quòd aliquod sit præceptum de eleemosyna faciendâ , nemo vnquam indu-

Lib. I. Cap. IX. 93

dubium reuocauit. Nam etiam si nihil aliud haberemus, satis abundè sufficeret sententia Iudicis iustissimi, & supremi, qui in extremo Iudicio iniquis dicet, *Discedite à me maledicti in ignem æternum, qui paratus est Diabolo & Angelis eius. Esuriui enim, & non dedistis mihi manducare: sitiui, & non dedistis mihi potum; hospes eram, & non collegistis me; nudus, & non cooperuistis me; infirmus & in carcere, & non visitastis me.* Et paulò post addidit, *Quamdiù non fecistis vni de minoribus his, nec mihi fecistis.* Ex quo loco possumus intelligere, ad eleemosynam faciendam nõ teneri nisi eos, qui possunt eam facere. Nam ipse etiam Dominus non legitur ista opera fecisse; sed solum ex pecunijs, sibi datis iussisse partem aliquam pauperibus donari; vt ex illo Euangelij loco potest intelligi, vbi cum Dominus dixisset Iudæ, *Quod facis, jac citius,* existimauerunt discipuli, imperasse

Mat. 25.

Io. 13.

Do-

94 De arte bene mor.

Dominū Iudæ, vt ex oculis, quos portabat, egenis aliquid daret. Theologi tamen hoc præceptum contineri volunt in illo præcepto decalogi, *Honora parentes*: alij in eo, *Non occides*. Sed non est necesse hoc præceptum in decalogo contineri, cū eleemosyna pertineat ad charitatem; præcepta decalogi sint præcepta iustitiæ. Sed si omnia præcepta moralia reuocari debeant ad decalogum, probabilis est Alberti Magni sententia, qui præceptum de eleemosyna facienda reuocat ad illud, *Non furaberis*; quoniam genus furti esse videtur, non tribuere pauperibus, quod debemus. Sed probabilior videtur sententia sancti Thomæ, qui hoc præceptum reducit ad primum secundæ tabulæ, *Honora parentes*. Honor enim parentum non intelligitur eo loco sola reuerentia; sed præcipuè procuratio rerum necessariarum ad vitam, quæ est eleemosyna quædam, quam debemus

In 4. Sct.
d. 15. ar.
16

22. q. 32
art. 5.

mus principali proximo nostro, ut explicat sanctus Hieronymus in Commentario ad caput decimum quintum sancti Matthæi. Ex quo intelligitur, deberi etiam eleemosynam alijs proximis nostris egen- tibus. Accedit, quòd præceptum de eleemosyna, non est negatiuum, sed affirmatiuum: inter præcepta autem secundæ tabulæ nullum est affirmatiuum, nisi primum, quod est, *Honora parentes*. Sed de his fusius disputare non est huius loci. Atque hæc de necessitate eleemosynæ.

Iam verò fructus eleemosynæ copiosissimus est. Primum enim eleemosyna liberat à morte sempiterna, siue id fiat per modum satisfactionis, siue per modum dispositionis ad gratiam, siue aliquo alio modo. Id enim manifestè docent Scripturæ diuinæ. In libro Tobia sic legimus, *Eleemosyna ab omni peccato, & à morte liberat, & non patitur animam ire in tenebras*. & in eodem libro

Tob. 4.

An-

96 De arte bene mor.

Tob. 12. Angelus Raphael disertis verbis ait, *Eleemosyna à morte liberat, & ipsa est, quae purgat peccata, & facit inuenire misericordiam, & vitam æternam.* & Daniel ad Regem Nabuchodonosor, ait, *Quamobrem, Rex, consilium meum placeat tibi, & peccata tua eleemosynis redime, & iniquitates tuas misericordijs pauperum.*

Dan. 4. Deinde eleemosyna, si fiat ab homine iusto, & ex vera charitate, meritum habet æternæ vitæ; cuius veritatis testis erit Christus Iudex viuorum, & mortuorum, cum in iudicio dicet, *Venite benedicti Patris mei, percipite Regnum, quod vobis paratum est ab origine mundi. Esuriui enim, & dedistis mihi manducare, &c.* & infra, *Quod fecistis uni ex fratribus meis minimis, mihi fecistis.*

Mat. 25. Tertio, eleemosyna vim habet cuiusdam baptismi, peccata videlicet, quo ad culpam, & pœnam simul delendi, dicente Ecclesiastico, *Sicut aqua extinguit ignem, ita*

Eccl 3.

ita eleemosyna extinguit peccatū .
 Aqua enim penitus extinguit , vt
 nec fumus quidem superfit; atque
 hoc ipsum sancti Patres docent ,
 Cyprianus , Ambrosius , Chryso-
 stomus , Leo . Sanctus Cyprianus
 in sermone de eleemosyna, sic ait,
*Sicut lauacro aquæ salutaris , ge-
 bennæ ignis extinguitur , ita elee-
 mosynis atque operibus iustis de-
 lictorum flamma sopitur.* Sanctus
 Ambrosius in sermone trigesimo
 primo , *Eleemosyna , inquit , quo-
 dam modo, animarum aliud est la-
 uacrum , sicut ait Dominus, Date
 eleemosynam ; & omnia munda
 sunt vobis ; nisi , quod salua fide
 dixerimus , indulgentior est elee-
 mosyna quàm lauacrum ; lauacrū
 enim semel datur , & semel ve-
 niam pollicetur : eleemosynam
 autem quoties feceris , toties ve-
 niam promereris .* Sanctus Ioan-
 nes Chrysostomus homilia 25. in
 Acta Apostolorum , *Non est , in-
 quit , peccatum , quod non possit
 purgare eleemosyna , quodue non*

E possit

98 De arte bene mor.

possit extinguere. Sanctus Leo sermone quinto de Collectis, *Eleemosynæ*, inquit, *peccata delent, mortem perimunt, & pœnam, perpetui ignis extinguunt.* Hæc sanè magna est eleemosynæ prærogatiua, & deberet omnes homines ad amorem eleemosynæ inflammare. Sed hoc non de quacunque eleemosyna intelligendum esse videtur, sed de illa duntaxat, quæ ex magna contritione, & magno charitatis ardore procedit. Qualis fuit sanctæ Mariæ Magdalænæ, quæ lacrymis contritionis rigauit pedes Domini, & eleemosyna vnguenti pretiosissimi pedes eosdem inunxit.

Quarto, eleemosyna fiduciam auget apud Deum, & gaudium spirituale producit. Quâuis enim id commune sit eleemosynæ cum omni opere bono; tamen præcipuè conuenit eleemosynæ, cum per eam Deo simul, & proximo gratum præstemus obsequium; & sit opus, quod non obscure, sed
aper-

Lib. I. Cap. IX. 99

apertissimè dignoscitur esse bonū.

Hinc est illud Tobix, *Fiducia* Tob 4.
magna erit coram summo Deo eleemosyna omnibus facientibus eam.

& illud Apostoli, *Vinctis compassi* Heb. 10.
estis, nolite itaque amittere confidentiam vestram. Denique sanctus Cyprianus in sermone de eleemosyna, eleemosynam vocat solatium grande credentium.

Quinto, eleemosyna cōciliat beneuolentiam multorum, qui pro benefactoribus Deum precantur, eisque vel gratiam conuersionis, vel donum perseuerantiæ, vel incrementum gratiæ, & gloriæ impetrant. Nam his omnibus modis intelligi potest verbum illud Domini, *Facite vobis amicos de* Luc. 16.
manimona iniquitatis, ut cum defeceritis, recipiant vos in aeterna tabernacula.

Sexto, eleemosyna dispositio est ad gratiam iustificantem. De hoc fructu loquitur Salomon in Proverbijs, vbi dicit, *Eleemosynis,* Prou 15
& fide delicta purgantur. Et Do-

100 De arte bene mor.

Luc. 19. minus audita liberalitate Zacchæi dicentis, *Ecce dimidium bonorum meorum do pauperibus, & si quem defraudavi reddo quadruplum.* ait, *Hodie salus huic domui facta est.*

Denique in actis Apostolorum legitur dictum fuisse Cornelio nondum Christiano, qui erat eleemosynarum multarum largitor; *Eleemosynæ tuæ ascenderunt in memoriam in conspectu Dei.*

Act. 10. Ex quo loco probat sanctus Augustinus, Cornelium per eleemosynas impetrasse à Deo gratiam fidei Christianæ, & perfectæ iustificationis.

Septimo, denique eleemosyna sæpè causa est, vt crescant bona temporalia. Id quod affirmat Sapiens cùm dicit, *Fœneratur Domino, qui miseretur pauperis.*

Prou. 19. & rursus, *Qui dat pauperibus nunquam egebit.* Idem exemplo suo

Io. 6. Dominus docuit, cùm iussit discipulis, vt quinque panes, & duos pisces, quos solos habebant, distribuerent turbis; & effecit, vt

re-

Lib. I. Cap. IX. 101

reciperēt duodecim cophinos ple-
nos fragmentorum panum & pi-
scium, qui ad multos dies illis suf-
ficere potuerunt. Tobias quoque
qui bona sua cum pauperibus li-
beraliter communicabat, ingen-
tes diuitias breui consequutus est.
Vidua quoque Sarephtana, quæ ^{3. Reg. 17}
modicum farinæ, & olei Eliæ Pro-
phetæ in eleemosynam tribuit; id
ex beneficio Dei consecuta est, vt
ad longum tempus farina, & oleū
ei non defuerit. Exempla præte-
rea plurima, & dignissima, quæ
legantur, extant apud Gregorium
Turonicum libro quinto historiæ
Francorum; apud Leontium in
uita sancti Iohannis Eleemosynarij;
apud Sophronium in Prato Speri-
tuali capite 185. & 201. Idem
confirmat sanctus Cyprianus in
sermone de Eleemosyna, & sanctus
Basilius in oratione ad diuites; vbi
eleganti similitudine comparat di-
uitias aquis puteorum, quæ si fre-
quenter hauriantur, semper me-
liores, & copiosiores scaturire

102 De arte bene mor.

solent; si verò immotæ conseruentur, decreſcunt, atque putreſcunt. Hæc auari diuites non libenter audient, & vix credent; ſed poſt hanc vitam intelligent, & vera eſſe credent, quando intelligere, vel credere, nihil proderit.

Supereſt, vt de modo largiendi eleemoſynas aliquid ſcribamus. Id enim præ omnibus alijs rebus neceſſariũ eſt, vt piè, ſanctèq. viuamus, & feliciffimè moriamur. Primum igitur neceſſe eſt, vt eleemoſynas faciamus intentione rectiſſima placendi Deo, non ad captandam auram popularem. Id enim Dominus noſter diſertis verbis docet, cùm ait, *Cùm facis eleemoſynam, noli tuba canere. & neſciat ſiniſtra tua, quid faciat dextera tua.* Explicat hunc locum ſanctus Auguſtinus in explicatione Epistolæ ſancti Ioannis, vbi per, ſiniſtram, intelligit intentionem faciendi eleemoſynam propter honorem tēporalem, vel aliud quodcumque temporale lucrum: per, dexte-

Matt. 6.

Tract. 6.

dexterā, significari dicit intentionem faciēdi cleemosynam propter vitā aternā, propter gloriam Dei, propter proximi charitatem.

Deinde, facienda est eleemosyna promptè, facilè, vt non videatur extorta precibus, nec differatur de die in diem, si statim fieri possit. *Ne dicas*, inquit Sapiens, *vade, & reuertere, cras dabo tibi, cum statim possis dare.* Prou. 3
 Abraham amicus Dei rogat hospites, vt ad se diuertant, nō expectat vt ab Gen. 18
 eis rogetur. Quod idem fecit nepos eius iustus Loth. Sic etiā Tobias nō expectabat pauperes, vt ad se venirent, sed ipse eos quærebat. Gen. 19.
Tob. 2.

Tertio, requiritur, vt eleemosyna fiat hilariter, non cum tristitia. *In omni dato*, inquit Ecclesiasticus, *hilarem fac vultum tuum.* Eccel. 31
 Et Apostolus, *Non ex tristitia, aut ex necessitate: hilarem enim datorem diligit Deus.*

Quarto, necesse est, vt eleemosyna fiat humiliter, sic vt intelligat homo diues, se plus accipere,

E 4 quàm

Lib. 21
moral
cap. 14.

quàm dare: de qua re sic loquitur sanctus Gregorius, *Multum ad edomandam dantis superbiam valet, si cum terrena tribuit, verba sollicitè magistri celestis penset, qui ait, Facite vobis amicos de mammona iniquitatis, ut cum defeceritis recipiant vos in æterna tabernacula. Si enim, eorum amicitijs, æterna tabernacula acquirimus; dantes proculdubio pensare debemus, quia patronis potius munera offerimus, quàm egenis dona largimur.*

Tob. 4.

Quinto, opus est, ut eleemosyna abundanter tribuatur pro modo facultatum. sic enim docet Tobias insignis eleemosynarius, *Quomodo, inquit, potueris, ita esto misericors: si multum tibi fuerit, abundanter tribue; si exiguum tibi fuerit, etiam exiguum libenter impertiri stude.* & Apostolus

1. Cor. 8

docet, eleemosynam esse dandam, ut benedictionem, non ut auaritiam. & sanctus Ioan. Chryso-
stomus addit, *Non dare, sed copiosè dare, eleemosyna est.* Et in eodem ser-

Lib. I. Cap. IX. 105

Serm. 37
ad pop.
Antioch.

sermone addit, eos qui audiri volunt, cum Deo dicunt, *Miserere mei Deus secundum magnam misericordiam tuam*; debere etiam misereri pauperum, secundum magnam eleemosynam suam.

Postremo, necesse est super omnia alia, ut qui vult saluus esse, ac per hoc bene mori, ut diligenter inuestiget, vel per se legendo, & meditando, vel per homines verè doctos, & pios, an diuitiæ superuacaneæ possint absque peccato retineri, aut sint necessario dandæ pauperibus; & rursum quæ sint appellandæ diuitiæ superuacaneæ, quæ necessariae. Fieri enim potest, ut alicui mediocres opes superuacaneæ sint, alteri ingens copia diuitiarum planè necessaria esse videatur. Et quoniam opusculum hoc meum non requirit, nec patitur Scholasticarum quæstionum, prolixitatem; annotabo hic breuiter loca Scripturarum sanctarum, & Doctorum, tum veterum, tum recentiorum, & finem

E 5 huic

huic disputationi imponam,

Loca Scripturæ sunt, Matthæi sexto, *Non potestis Deo seruire, & mammonæ.* Lucæ tertio, *Qui habet duas tunicas, det non habenti, & qui habet escas, similiter faciat.* Lucæ duodecimo dicitur diuiti habenti multa bona, vt vix sciret, vbi ea reponeret, *Stulte hac nocte repetent à te animam tuam.* Quæ verba sic exponit sanctus Augustinus in libro 50. homiliarum homilia septima, vt ille diues perierit in æternum, quia superuacaneas opes retinuerit.

Loca Sanctorum Patrum præcipua hæc sunt. Sanctus Basilius in Oratione ad diuites, *At tu, inquit, nonne spoliator es, qui quæ dispensanda accepisti, propria reputas?* & paulo post, *Quocirca, inquit, tot pauperibus iniuriam facis, quot dare valeres.* Sanctus Ambrosius, sermone 81. *Quid, inquit, iniustum est, si cum aliena non inuadam, propria diligenter seruem?* O impudens dictum.

pro-

propria dicis? quæ? & infra, Non minus est criminis, quam habenti tollere; cum possis, & abundes indigentibus denegare. Sanctus Hieronymus in Epistola ad Hedibiam quæst. prima, Si plus, inquit, habes, quam tibi ad victum, & vestitum necessarium est; illud eroga, & in illo debitricem esse te noveris. Sanctus Ioannes Chrysof. homilia 34. ad populum Antiochenum, Nunquid, inquit, tua possides? res pauperum tibi sunt credite, siue ex laboribus iustis, siue ex hereditate paterna possideas. Sanctus Augustinus tractatu in Psalmum 147. Superflua, inquit, diuiti, necessaria sunt pauperi: res alienæ possidentur, cum superflua possidentur. Sanctus Leo in sermone quinto de Collectis, sic ait, Terrenæ, & corporeæ facultates ex Dei largitate proueniunt, ut meritò rationem eorum quæsiturus sit, quæ non magis possidenda, quàm dispensanda commisit. Sanctus Gregorius in tertia parte Pastoralis cu

ræ, admonitione vigesima secunda, *Admonendi sunt*, inquit, *qui nec aliena appetunt, nec sua largiuntur, ut sciant sollicitè, quòd ea, de qua sumus, cunctis hominibus, terra, communis est, & idcirco alimenta quoque omnibus communiter profert; & incassum se innocentes putant, qui commune Dei munus sibi priuatim vendicant.* Sanctus Bernardus in Epistola ad Henricum Archiepiscopum Senonensem, sic ait, *Nostrum est, pauperes clamant, quod effunditis: nobis crudeliter subtrahitur, quod vos inaniter expenditis.* Sanctus Thomas in secunda secundæ quæstione sexagesima sexta, articulo septimo, *Res*, inquit, *quas aliqui superabundanter habent, ex naturali iure debentur pauperum sustentationi.* & quæstione 87. artic. 1. *Dominus*, inquit, *non solum decimam partem, sed omnia superflua pauperibus iubet exhiberi.* Denique idem auctor scribens in quartum librum sententia-

tiarum ad quintamdecimam distinctionem, testatur, hanc ipsam esse doctrinam communem omnium Theologorum. Adde hoc loco, quod si quis fortè contendere velit ex rigore iuris; non esse superuacanea danda pauperibus: tamen negare non poterit saltem ex charitate id esse faciendum. Parum autem refert vtrum quis ex defectu iustitiæ, aut defectu charitatis in gehennam descendat.

C A P. X.

De decimo præcepto artis bene moriendi, quod est de Sacramento baptismi.

EXPLICATIS virtutibus præcipuis, quæ docent artem bene viuendi: addemus nunc pauca ex doctrina Sacramentorum, quæ

110 De arte bene mor.

quæ non minus adiuuant ad eandem artem bene viuendi feliciter addiscendam. Sacramenta à Christo Domino instituta, septem numerantur, Baptismus, Confirmatio, Eucharistia, Pœnitentia, Ordo, Matrimonium, Extrema Vnctio. Quæ sunt veluti instrumenta diuina, quibus vtitur Deus per ministerium seruorum suorû ad gratiam diuinam conferendam, vel augendam, vel restituendam; vt homines liberati à seruitute Diaboli, & translati ad honorem filiorum Dei, ad beatitudinem sempiternam cum Angelis sanctis aliquando perueniant. Ex his igitur sanctissimis sacramentis propositum nobis est, breuiter demonstrare, quis in arte bene viuendi proficiat, quis deficiat; vt inde possit intelligi, quis ad felicem mortem aspirare possit; quis è contrario mortem infelicem expectare debeat, nisi vitam, moresque commutet.

Ordiamur à primo Sacramen-
to.

Lib. I. Cap. X. III

to . Baptismus primum est in sacramentis , & iure dicitur ianua sacramentorum , quoniam nisi baptismus præcedat , non est vllus homo idoneus ad sacramenta cætera suscipienda . In sacramento Baptismi hi ritus seruantur . Primum omnium debet , qui baptizandus est , per se , vel per alium confiteri fidem Catholicam . Deinde , abrenuntiare debet Diabolo , & pompis eius , & operibus eius . Tertio , baptizandus est in Christo , in quo baptismo transfertur à seruitute diaboli ad gratiam filiorum Dei ; & peccatis omnibus deletis accipit dona cælestis gratiæ , per quæ filius Dei adoptiuus , & hæres Dei , & cohæres Christi constituitur . Quarto , datur ei stola candida , & iubetur eam puram , & nitidam conseruare vsque ad mortem . Quinto , datur quoq. candela accensa , quæ significat opera bona , quæ debet adiungere dum , viuit ad innocentiam vitæ , quam significat stola candida , paulo ante

112 De arte bene mor.

te suscepta. Sic enim loquitur
Matt 5. Dominus in Euangelio, *Sic luceat lux vestra coram hominibus, ut videant opera vestra bona, & glorificent patrem vestrum, qui in caelis est.*

Hi sunt præcipui ritus, quibus utitur Ecclesia in conferendo baptismo. Omitto enim cæteros, qui ad rem nostram non pertinet. Ex his poterit vnusquisque intelligere, an bene vixerit à suscepto baptismo vsque ad annum, quem nunc agit. Ego vero vehementer suspicor paucos esse inueniendos, qui omnia impleuerint, quæ vel se facturos promiserint, vel certè

Matt. 10. implere debuerint. *Multi enim sunt vocati, pauci vero electi. &*

Matt. 7. *angusta est via, quæ ducit ad vitam, & pauci inueniunt eam.*

Incipiamus à Symbolo fidei; quot sunt homines rustici, vel mendici, vel opifices artium infimarum, qui symbolum fidei, vel non tenent memoria, vel nunquam didicerunt, vel sciunt quidem

ver-

verba sonare, sed sententiam non percipiunt? Et tamen in baptismo, per paternos, ad singulos articulos credere se responderunt.

At si Christus per fidem habitare debet in cordibus nostris, vt Apostolus Paulus docet; quo modo ha-

Eph. 3.

bitabit in cordibus eorum, qui vix per linguam sonare possunt verba Symboli, & in corde nihil prorsus habent? & si *Deus fide purificat*

corda nostra, vt Apostolus Petrus

Act. 15.

loquitur; quam sordidum erit cor illorum, qui fidem Christi corde non perceperunt, quamuis baptis-

mū in carne perceperint? Loquor autem de adultis, non de infantibus. Infantes enim per habitum gratiæ, fidei, spei, & charitatis iu-

stificantur: sed cū adoleuerint, fidei symbolum discere, & fidem Christianam corde credere debēt ad iustitiam, & ore confiteri te-

nentur ad salutem; vt Apostolus apertissimè docet in Epistola ad Romanos.

Rom. 10.

Veniamus ad alterum ritum.

Chri-

114 De arte bene mor.

Christiani omnes vel per se, vel per patrinum, interrogati, an abrenuntient Diabolo, & pompis eius, & operibus eius, respondent, abrenuntio. At quàm multi sunt, qui verbo abrenuntiant, re ipsa non abrenuntiant? quin potius, quàm pauci sunt, qui pompas, & opera diaboli non toto corde diligant, & sequantur? Et tamen Deus omnia videt, & irrideri non potest. Ergo qui bene viuere cupit, & bene mori desiderat; ingrediatur in cubiculum cordis sui, & non se ipse fallat, sed seriò, & attentè cogitet, & recogitet, an pompis mundi huius delectetur, an operibus diaboli, quæ sunt peccata, in corde suo, & in factis, dictisque suis locum dederit. Sic enim vel conscientia bona eum consolabitur, vel conscientia mala ad pœnitentiam eum adducet.

In tertio ritu manifestatur nobis beneficium Dei tam sublime, tam profundum, tam longè, latèque patens; vt si totos dies, & totas

Lib. I. Cap. X. 115

tas noctes consumeremus in eius admiratione, & agendis pro ea gratijs Deo, nihil dignum tanto beneficio præstaremus. Deus bone, quis capiat, quis non obstupescat, quis non totus in pias lacrymas conuertatur, si cogitet, hominem ad inferos iure damnatum, repente per Christi baptismum transire de captiuitate miserissima ad ius Regni felicissimi? Sed quanto est hoc beneficium maius, tanto est etiam plurimorum hominum ingratitude magis detestanda; cum pauci sint, qui vix ad vsum rationis peruenerunt, cum incipiunt Deo beneficiū tam admirandum quasi renunciare, & in seruos se ipsos Diabolo tradere. Quid enim est, in prima adolescentia, concupiscentiam carnis, concupiscentiam oculorum, & superbiam vitæ sectari; nisi cum Diabolo amicitiam, & fœdus contrahere, Christum Dominum re, & factis abnegare? Rari sunt, qui auxilio Dei singulari præuēti, gratiam

116 De arte bene mor.

tiam baptismi diligenter custo-
diunt, & vt loquitur Ieremias,
iugum Domini portare incipiunt
Thre. 3. *ab adolescentia sua.* Sed nisi vel
gratiam baptismi diligenter con-
feruemus, vel per veram pœniten-
tiam, iterum diabolo renuncie-
mus, & ad Christi seruitutem re-
uertamur, & in ea ad mortem vs-
que perseueremus, nec bene viue-
re, nec à mala morte liberari po-
terimus.

Quartus ritus in eo positus est,
vt stolam cãdidam baptizatus ac-
cipiat, eamque ferre iubeatur quo-
usque ad conspectum Domini ve-
niat. Quo ritu significari diximus
vitæ innocētiam, per baptismi gra-
tiam comparatam; diligentissimè
conseruandam esse vsque ad mor-
tem. Sed quis explicet, quantæ
sint insidiæ Diaboli, hostis perpe-
tui generis humani, qui nihil ma-
gis procurat, quam vestem illam
maculis omnis generis aspergere?
Itaque paucissimi reperiuntur, qui
si diutius vixerint, sordes pecca-

to-

torum euadant . Certè sanctus David, beatos immaculatos in via esse pronunciauit . Sed quo difficultas maior est in via sordida sine maculis incedere, tanto gloriosior erit palma , & corona innocentis vitæ . Debent igitur omnes, qui bene viuere, & beatè mori desiderant, vestem innocentia totis viribus candidam seruare . Sed si fortè illi maculæ aliquæ adhæserint, debent iterum, atque iterum eam in sanguine Agni dealbare ; quod fit per veram contritionem, & per lacrymas pœnitentiæ . Certè sanctus David cum peccatum suum longo tempore defleuisset, respirauit in spem gratiæ , & Domino gratias agens confidenter dixit, *Asperges me Domine byssopo, lauabis me, & super niuem dealbabor.* Ps. 50.

Postremus ritus est, cereum lucentem accipere, manibusque illum gestare ; id quod, ut supra diximus, nihil significat aliud, nisi opera bona ; quæ ad innocentiam vitæ

118 De arte bene mor.

vitæ adiungenda sunt. Quæ sint autem opera bona, quæ facienda sunt ab hominibus renatis per baptismum in Christo; exemplo suo

2. Tim. 4

docet Apostolus, cum dicit, *Bonum certamen certavi, cursum consummaui, fidem seruaui: in reliquo reposita est mihi corona iustitiæ, quam reddet mihi in illa die iustus Iudex.* His paucis ver-

bis, breuissimè numerata sunt omnia bona opera, quæ à renatis, per baptismum in Christo, facienda sunt. Oportet enim fortiter di-

1. Pet 5.

micare aduersus tentationes diaboli, qui *tanquam leo rugiens circuit querens quem deuoret.* Oportet etiam cursum bonorum operum consummare in obseruatione mandatorum Domini, iuxta illud

Pf. 118.

Psalmi, *Viam mandatorum tuorum cucurri, cum dilatasti cor meum.* Oportet denique fidem Domino nostro seruare in multiplicandis talentis, vel in colenda vinea, vel in villicatione commissa, vel in præfectura familiæ no-

bis

bis imposita, vel in alijs quibuscun-
 que negocijs nobis à Domino cō-
 mendatis. Voluit enim sapientif-
 simus Dominus, nos quidem, vt
 filios adoptiuos ad hæreditatem
 cælestem admittere: sed vt id cum
 maiore gloria sua, & nostra fie-
 ret, placuit diuinæ sapientiæ suæ,
 vt bonis operibus ex gratia ipsius,
 & libero arbitrio nostro factis, cæ-
 lestem hæreditatem, idest, sempit-
 ternam beatitudinem mereremur.
 Itaque opulentissima, & glorio-
 sissima illa hæreditas non dabitur
 dormientibus, vel ociantibus, vel
 ludentibus, sed vigilantibus, labo-
 rantibus, & ad finem vsque vitæ
 in opere bono perseuerantibus.

Discutiat ergo vnusquisque ope-
 ra sua, & vitam, ac mores suos
 diligenter examinet, si vult bene
 viuere, & feliciter mori: & si con-
 scientia sua testimonium sibi red-
 dit, quòd bonum certamen certa-
 uerit cum vitijs & concupiscentijs,
 & cum omnibus tentationibus ser-
 pentis antiqui: & quòd cursum
 fe-

120 De arte bene mor.

feliciter consummauerit in omnibus mandatis, & iustificationibus Domini sine querela; & quòd fidem Domino seruauerit in omnibus officijs, vel præfecturis sibi commissis; securus exultet, & cum Apostolo dicat, *Reposita est mihi corona iustitiae, quam reddet mihi Dominus iustus Iudex.* Quòd si conscientia accuratè discussa testetur; in certamine cum hoste generis humani non leuiter se vulneratam, & ignita iacula vsque ad animam penetrasse, idque non semel, sed sæpius: & quòd in cursu operum bonorum sæpè defecerit; & non solum alacriter non currenit, sed præ lassitudine in via sederit, vel iacuerit: & denique fidem Domino in negocijs sibi commissis non seruauerit, sed partem lucri sibi abstulerit vel inanis gloria, vel acceptio personarum, vel aliquid huiusmodi; ad remedium pœnitentiæ, atque ad ipsum Deum, vt medicum, sine interposita mora recurrat, & non dif-

differat hoc negocium negotio-
rum omnium maximum in aliud
tempus ; quia mortis neque diem
scimus , neque horam .

C A P. X I.

De præcepto vndecimo ar-
tis bene moriendi, quod
est de Confirmatione.

P O S T sacramentum baptismi
sequitur sacramentum con-
firmationis, ex quo duci potest do-
cumentum ad bene viuendum nõ
minus accommodatum , quàm ex
baptismo : quamuis enim bap-
tismi sacramentum sit magis neces-
sarium , quàm sacramentum con-
firmationis ; tamen sacramentum
confirmationis nobilius est, quàm
sacramentum baptismi . Id quod
intelligi potest ex Ministro, ex ma-
teria , & ex effectu . Minister or-
dinarius baptismi est presbyter ,
vel diaconus ; & in tempore neces-

F sita-

122 De arte bene mor.

fitatis quilibet homo. Minister cō-
firmationis ordinarius est Episco-
pus; & ex dispensatione Summi
Pontificis solus presbyter. Mate-
ria baptismi est aqua naturalis;
materia confirmationis est oleum
pretiosum mistum balsamo, &
ab Episcopo consecratum. Effe-
ctus baptismi est gratia, & chara-
cter, qualis requiritur ad procreā-
dum infantem spiritualem, iuxta
illud sancti Petri, *Quasi modò ge-
niti infantes lac concupiscite*. Ef-
fectus confirmationis est gratia,
& character, qualis requiritur ad
creandum militem Christianum,
ad pugnādum aduersus hostes in-
uisibiles, iuxta illud sancti Pauli,
*Non est nobis colluctatio aduersus
carnem & sanguinem, sed aduer-
sus Principes, & potestates, aduer-
sus mundi rectores, tenebrarum
harum, contra spiritualia nequi-
tia in caelestibus*. Denique in ba-
ptismo datur infantibus gustus sa-
lis: in confirmatione infligitur ala-
pa, vt discat miles Christianus pu-
gna-

1. Pet. 2.

Eph. 6.

Lib. I. Cap. XI. 123

gnare non feriendo, sed patiendo.

Sed vt facilius intelligamus, quod sit officium hominis chrismate inuncti, hoc est, militis Christiani; videndum est, quid acceperint Apostoli in sua confirmatione, quæ data est eis in die Pentecostes. Apostoli enim non fuerunt confirmati propriè per sacramentum Chrismatis, sed acceperunt à Christo Principe sacerdotum effectum sacramenti sine sacramento. Acceperunt autem tria dona, sapientiam, eloquentiam, & charitatem in altissimo gradu, & præterea donum miraculorum, utilissimum ad conuertendos infideles ad fidem. Atque hæc dona significauerunt igneæ linguæ, quæ in die Pentecostes apparuerunt, & sonitus vehemens, qui simul auditus est. Siquidem lumen ignis sapientiam, calor eiusdem ignis charitatem, figura linguæ eloquentiam, & sonitus vehemens donum miraculorum significabant. Sacramentum nostræ confirmationis non

124 De arte bene mor.

adfert secum donum variarum, linguarum, neque donum miraculorum; quoniam hæc necessaria erant non pro ipsorum Apostolorum utilitate, & perfectione, sed pro conuersione infidelium. Sed adfert donum sapientiæ spiritualis, & donum charitatis, quæ *beneuolentia, & patiens est*; & in signum huius patientiæ, quæ est virtus rarissima, & pretiosissima; alapam, dat Episcopus publicè homini confirmato; nimirum, vt intelligat, se militem Christi esse creatum; non ad percutiendum, sed ad patiendum; non ad iniurias inferendas, sed ad tolerandas. Sic enim pugnatur in christiana militia non aduersus homines, quos videmus, sed aduersus dæmones, quos non videmus. Sic enim pugnavit, & vicit Imperator noster Christus, qui cruci affixus debellauit aereas potestates; & sic pugnabant Apostoli, recens confirmati, qui flagellis grauiter cæsi in concilio Iudæorum, *Ibant gaudentes à con-*
spe-

Act. 5.

specū concilij, quoniam digni habitū erant pro nomine Iesu contumeliam pati. Hæc videlicet est gratia sacramenti confirmationis; id efficere, vt homo cæsus iniuste, non cogitet de vindicta, sed gaudeat, se propter iustitiam, iniuriam pati.

Ingradiatur nunc homo confirmatus in cor suum, & diligenter attendat, an dona Spiritus sancti; ac præcipuè sapientiam, & fortitudinem in corde suo inueniat. Attendat, inquam; an acceperit sapientiam sanctorum, quæ magnificat bona æterna, & contemnit temporalia, & fortitudinem militum Christi, qui iniurias accipiunt libentius, quàm faciunt. Ac ne fortè decipiatur, descendat ad praxim, examinet conscientiam suam. Nam si verè inueniat, se promptum ad eleemosynas faciendas, non ad opes cumulandas: & si passus iniuriam, de vltione non cogitauit, sed facillimè, & libentissimè iniuriam condonauit; iure pote-

126 De arte bene mor.

rit in spiritu exultare, vt qui pi-
gnus in corde suo habeat spiritus
adoptionis filiorum Dei. Sed si
post acceptum confirmationis Sa-
cramentum, non minus cupidum,
non minus auarum, non minus
iracundum, non minus impatien-
tem esse se videat; & re ipsa diffi-
cũter patiatũr, sibi nummũ
aureum, vel argenteum exire de
marsupio ad pauperem reficien-
dum; & contra, si pronum se cer-
nat esse ad omnes captandas lucri
occasiones: & rursus, si facilem se
cognoscat ad iram, pronum ad
vltionem, & etiam ab amicis ro-
gatus vt offensionem remittat, e-
xorari se non patiatũr: quid hinc
colligere poterit, nisi se Sacra-
mentum accepisse, gratiam Sacra-
menti non accepisse?

Hæc dixerim pro ijs, qui ma-
iores natu sunt, cũ ad hoc Sa-
cramentum suscipiendum acce-
dunt: nam qui in prima ætate, vix
doli capaces ad confirmationem
accedunt; ijs dona, & virtutes in-
fun-

fundi credendum est, cum nihil sit, quod impediatur. Sed timendum est illis, ne superuenientibus criminibus, & pœnitentia in longum tempus dilata; spiritum in confirmatione susceptum extinguant, id est, Spiritus sancti gratiam amittant. Sic enim intelligitur quod monet Apostolus, *Spiri-* 1. Thel. 5. *tum nolite extinguere*. Ille enim, quod ad se attinet, Spiritum sanctum extinguit, qui gratiam Dei in se extinguit.

Qui ergo cupit semper bene vivere, ut ei contingat semel bene mori; sacramentorum gratiam magnificat, quæ sunt vasa celestium thesaurorum, ac præsertim sacramenta illa magnificat, quæ semel amissa inueniri nullo modo queunt; quale est sacramentum confirmationis, in quo thesaurus incomparabilis bonorum accipitur. Quamuis enim character sacramentorum deleri non possit; tamen character, sine gratiæ donis, non solatium aliquod adfe-

ret, sed pœnam confusionis au-
gebit.

C A P. XII.

De duodecimo præcepto ar-
tis bene moriendi, quod
est de Eucharistia.

SACROSANCTA Eucharistia
sacramentum est omnium ma-
ximum, in quo non sola gratia
copiosissimè, sed ipse auctor gra-
tiæ continetur. Ut autem homo
christianus, quòd attinet ad hoc
sacramentum, bene viuat, & suo
tempore bene moriatur; duo ne-
cessaria sunt. Vnum vt aliquando
hoc Sacrosanctum alimentum su-

10. 6. mat, dicente Domino, *Nisi man-
ducaueritis carnem filij hominis,
non habebitis vitam in vobis.* Al-

1. Cor. 11 terum, vt dignè cibum tam exi-
mium manducet, dicente Aposto-
lo in epistola ad Corinthios, *Qui
manducat, & bibit indignè, iudi-
cium*

cium sibi manducat, & bibit, non dijudicans corpus Domini. Est autem quæstio, quàm frequenter expediat, hunc cibum sumere: & rursus, quæ nam sit habenda sufficiens præparatio, vt dignè, aut certè non indignè ad hoc cælestis conuiuium accedamus.

De priore quæstione habemus plures, ac diuersas fuisse in Ecclesia Catholica consuetudines. In Ecclesia primorum temporum frequentissimè fideles communicabãt corpori Dominico. Nam ideo sanctus Cyprianus in sermone de oratione dominica, qui est sextus in ordine, explicat de sacra Eucharistia verba illa, *Panem nostrum quotidianum da nobis hodie*; ac docet, quotidie sumendam esse Eucharistiam; nisi quis legitimo impedimento prohibeatur. Postea tamen charitate refrigescente, ad annos integros non pauci sacram communionem differebant. Hinc Innocentius Pontifex Tertius decretum illud edi-

F 3 dit,

cap. Om-
nis. de pe-
nit. & re-
miss.

dit, vt saltem annis singulis in fe-
rijs paschalibus omnes tam ma-
res, quàm feminæ sacram Eucha-
ristiam percipere tenerentur. Vi-
detur autem communior Docto-
rum sententia, valde pium, & lau-
dabile esse, vt qui sacerdotes non
sunt, singulis Dominicis diebus,
& festis adhuc celebrioribus ad sa-
cro sanctam Eucharistiam accede-
re non grauentur. Celebris est
apud scriptores sententia illa, qua-
si à sancto Augustino prolata,
*Quotidie Eucharistiam accipere
nec laudo, nec reprehendo: omni-
bus tamen diebus dominicis com-
municandum suadeo, & hortor.*
Quamuis autem liber de Ecclesia-
sticis dogmatibus, vnde hæc sen-
tentia petita est, non videatur es-
se sancti Augustini; tamen vetusti
auctoris est, neque contraria do-
ctrinæ sancti Augustini, qui in Epi-
stola ad Ianuarium, apertissimè do-
cet, neque illos errare, qui quo-
tidie arbitrantur esse communicā-
dum; neque illos, qui non quoti-
die,

Eplst. 118

die, sed rarius communicandum esse censent. Certè qui hoc docet, nullo modo reprehèderet eos, qui mediam sententiam eligerent, vt saltem singulis diebus dominicis ad hoc sacramentum accederent. Eandem sententiam placuisse sancto Hieronymo, intelligi potest ex commentario eius in Epistolam ad Galatas; vbi exponens caput quartum, ita loquitur, *Sicut nobis licet, vel ieiunare semper, vel semper orare, & diem Dominicam accepto corpore Domini indefinenter celebrare gaudentes; non ita fas est Iudeis immolare agnum, &c.* Eadem sententia placuit sancto Thomæ in tertia parte summæ Theologicæ, quæstione 80. artic. 10. extremo.

Quod attinet ad alterum caput de præparatione ad tam magnum sacramentum percipiendum, vt in salutem, non iudicium, & condemnationem suscipiatur; primū omnium requiritur, vt anima sit viuens vita gratiæ, non mortua.

132 De arte bene mor.

morte peccati lethalis. Nam ea de causa dicitur *cibus*, & in specie panis datur; quia *cibus non est mortuorum, sed viventium.*

Io. 6. *Qui manducat hunc panem, Dominus ait apud Ioannem, viuet in æternum.* & in eodem loco, *Caro mea verè est cibus.* Addidit au-

Syn Trid.
sess 13.
can 11.

tem Synodus Tridentina, non satis esse ad condignam præparationem ad hunc cælestem cibum ritè percipiendum, vt qui lethali peccato est inquinatus, sola contritione contentus sit; sed etiam per sacramentum pœnitentiæ peccata sua expiare satagat, modò confessarij copiam habere queat. Deinde, quia hoc sacramentum non solum est panis, sed etiam medicina, & medicina optima, & saluberrima aduersus omnes morbos vitiorum; ideo requiritur secundo loco, vt homo ægrotus desideret bonam valetudinem, & curari cupiat ab omnibus morbis vitiorum, ac præcipuè à principalibus, quæ sunt luxuria, auaritia,

su-

superbia . Quòd autem Eucharistia sit medicina , docet sanctus Ambrosius libro quinto de sacramentis , capite quarto . *Qui vulnus , inquit , habet , medicinam requirit : vulnus est , quia sub peccato sumus : medicina est celeste , ac venerabile sacramentum .* & sanctus Bonaventura in libro secundo de profectu Religiosorum capite 78 . *Qui se , inquit , indignum reputat , cogitet , quòd tanto magis eget , & necesse habet requirere medicum , quanto magis senserit se agrotum .* & sanctus Bernardus in sermone de cœna Domini , admonet fratres suos , vt sanctissimo sacramento tribuant , cum experiuntur in se minui malas propensiones , & alias animi ægritudines .

Postremo , sacrosanctum sacramentum non solum est cibus viatorum , & medicina ægrotorum , sed etiam Medicus doctissimus , & amantissimus ; & ideo recipiendus cum ingenti exultatione , &

re-

134 De arte bene mor.

reuerentia; & ornanda est domus animæ omni genere virtutum, ac præcipuè fidei, spei, charitatis, deuotionis, pietatis, & fructibus bonorum operum, orationis, ieiunij, & eleemosynæ. Hæc enim ornamenta requirit dulcis hospes animæ nostræ, qui bonorum nostrorum non indiget. Adde, quòd iste Medicus, qui nos visitat, est etiam Rex, & Deus, cuius infinita est puritas; & purissimum requirit habitaculum. Audi sanctū Ioan. Chrysostrum in sermone sexagesimo ad populū Antiochenum; *Quo, inquit, non oportet esse puriorem tali fruente sacrificio? quo solari radio non splendidior, carnem hanc diuidentem? os quod igne spiritali repletur?*

Ingrediatur nunc quicumque bene viuere, & bene mori desiderat, in cubiculum animæ suæ; & clauso ostio solus cum solo corde suo, coram Deo, qui scrutatur renes, & corda, attentè consideret,

ret, quàm sèpe, & cum qua præparatione communicet sacramento dominici corporis. Et si quidem inueniat, se per Dei gratiam frequenter, & salubriter communicare, & inde bene nutriri, & à morbis vitiorum paulatim curari; seque in virtutibus, & operibus bonis quotidie magis, ac magis proficere: exultet cum tremore, & pergat seruire Domino in timore, non tam seruili, quàm casto, & filiali. Quod si vnus sit ex illis, qui contenti annua communione, de saluberrimo sacramento non amplius cogitant; & oblitum manducare panem viuificum, quanto magis corpore pinguescunt, & dilatantur, tanto magis animæ eorum debilitantur, & arefcunt: intelligat, se multum desipere, & longè abesse à Regno Dei. Annua enim communio decreta est à sacro vniuersali Concilio, non vt non fiat, nisi semel per annum, sed vt fiat saltem semel per annum, nisi velint ab Ec-

cle-

136 De arte bene mor.

clesia extirbari, & tradi Sathanae. Itaque isti ut plurimum non amore filiali, sed timore seruili Dominum suum in sacramento recipiunt. & paulo post redeunt ad filiquas porcorum, ad mundi delicias, ad lucra temporalia, ad ambiendos fugaces honores; ut in morte audiant cum diuite Epu-

Luc. 16. lone, *Memento fili, quia receperisti bona in vita tua.* Quod si quis inueniatur, qui sacramenti sacrosancti frequentet mysteria, vel omnibus diebus dominicis, vel etiam quotidie, si fortè sacerdotio fungatur; & tamen neque à peccatis lethalibus sibi caueat, neque in bonis operibus seriò se exerceat, neque de mundo verè exierit, sed ut alij qui de mundo sunt, lucris pecuniarum inhiat, carnis illecebris delectetur, ad gradus honorum, & dignitatum fuspiret; iste certè carnem dominicam ad iudicium sibi manducat, & quo sapius mysteria sacrosancta indignus attrectat, eo magis Iudam pro-

proditorem imitatur, de quo Dominus ait, *Melius erat ei, si natus non fuisset homo ille.* Sed ne-
 Mini desperandum est de salute, dum viuit. Proinde, qui in cubiculo cordis recogitat annos suos, & opera sua, & se extra viam salutis huc vsque cucurriffe cognoscit; sciat adhuc resipiscendi tempus adesse, modo serio velit poenitentiam agere, & ad viam veritatis reuerti.

Mat. 26.

Adiungere libet ad finem huius capituli, quid sanctus Bonauentura scribat in vita sancti Patris Fracisci, de admirabili pietate, & amore huius sanctissimi viri erga sacrosanctam Eucharistiam; vt ex eius ardore nostra tepiditas, vel frigiditas incalescat. *Flagrabat,*
 inquit, *erga sacramentum Domini corporis feruore omnium medullarum; stupore admirans permaximo illam charissimam dignationem, & dignantissimam charitatem. Sape communicabat, & tam deuote, vt alios deuotos effi-*

Vita S.
 Fracisci
 cap 9.

138 De arte bene mor.

ceret, cum ad agni immaculati degustationem suauem, quasi spiritu ebrius, in mentis ut plurimum rabiatur excessum. hæc ille. A quo longissimè absunt, non solum laici multi communicantes, sed etiam sacerdotes plurimi celebrantes, qui incredibili festinatione rem tam sacram peragunt; ut neque ipsi scire videantur quid agant, neque alios rem tantam paulo attentius considerare permittant.

CAP. XIII.

De præcepto tertio decimo
artis bene moriendi, quod
est de Pœnitentia.

SE Q V I T V R sacramentum
pœnitentiæ, quod in tribus
præcipuè virtutibus positum est,
quod attinet ad eum, qui recipit
sacramentum pœnitentiæ; con-
tritione cordis; confessione oris;
& sa-

Lib. I. Cap. XIII. 139

& satisfactione operis . Nam qui hæc tria ritè præstant , sine dubitatione vlla peccatorum suorum veniam assequuntur . Sed videndum est , & attentissimè considerandum , an sit vera contritio , an integra confessio , an plena satisfactio .

Incipiamus à contritione . Ioel Propheta clamat , *Scindite corda vestra, & non vestimenta vestra.* Ioel. 2.
Hebræi cùm signum doloris ostendere vellent, scindebant vestimenta sua : monet autem Propheta sanctus , vt si velimus dolorem verum, & intimum de peccato commisso , coram Deo demonstrare , scindamus corda nostra . Et Propheta David addit , vt non solum scindamus , sed etiam conteramus , & quasi in puluerem redigamus . *Cor contritum, & humiliatum Deus non despicies .* Ps. 50.
Quæ similitudines apertè designant , ad placandum per penitentiam Deum ; non satis esse, verbo dicere , pœnitet me peccasse ;

140 De arte bene mor.

caste; sed opus esse dolore cordis intimo, & graui, qui sine singulibus, & lacrymis, ac suspirijs inueniri vix potest. Sancti quoque Patres mirum est, quam seuerè de vera contritione loquantur. Sanctus Cyprianus in sermone de lapsis, *Quàm magna, inquit, deliquimus, tam granditer defleamus: alto vulneri diligens, & longa medicina non desit: pœnitentia crimine minor non sit. Orare impensius oportet, & rogare; diem luctu transigere; vigilijs notes ac fletibus ducere, tempus omne lacrymis, & lamentationibus occupare; stratos solo adherere cineri, in cilicio volutari, & fordibus.* Clemens Alexandrinus apud Eusebium in historia, pœnitentiam appellat, *baptismum lacrymarum.* Sanctus Gregorius Nazianzenus in oratione secunda de baptismo, *Recipio, inquit, pœnitentes, si lacrymis rigatos videro.* Theodoretus in Epitome diuinorum decretorum, capite de

Lib. 3. c.
17. alias
24.

pœ-

Lib. I. Cap. XIII. 141

pœnitentia, scribit, vulnera, quæ post baptismum accipiuntur, curabilia quidem esse; sed non ut olim facili negotio per lauacrum regenerationis, sed per multas lacrymas, & opera laboriosa.

Hæc, & similia omnes Patres Sancti scripta reliquerunt de veritate contritionis. Hoc tempore accedunt plerique ad confessionem, qui contritionem aut modicam, aut nullam ostendunt. Sed qui volunt verè cum Deo reconciliari, & rectè vivere, ut postea securi moriantur; debent intrare in cor suum, & clauso ostio negocijs alijs, hæc, aut similia, attentissimè apud se voluere. Hei mihi quid miser egi, cum tale, & tale flagitium perpetravi? primum, Patrem illum dulcissimum, auctorem omnis boni, & mei amantissimum offendi, qui me undique beneficijs suis vallauit, cuius tot signa charitatis video, quot bona in me, vel in alijs video. Sed quid de Christo meo dicam, qui dilexit

142 De arte bene mor.

Ephe. 5. xit me inimicum, & indignum, & tradidit semetipsum pro me. *oblacionem, & hostiam Deo in odorem suauitatis?* & ego ingratus, & miser ab offensione eius non cesso. Quæ tanta est mea crudelitas? Dominus meus virgis fuit cæsus, spinis coronatus, clavis in cruce suffixus, vt veteribus meis peccatis, & sceleribus medicinam faceret; & ego non cesso noua, semper addere? ille nudus in cruce salutem meam sitire se clamat; & ego semper pergo acetum ei, & fel amarissimum propinare? Quis mihi præterea explicabit, de quanta gloria exciderim, cum peccatum hoc, aut illud lethale commisi? Hæres eram Regni cælestis, vitæ æternæ felicissimæ: ab hac tanta felicitate, & certè tam præclara, & omnibus modis maxima excidi miser, per illam breuissimam voluptatem, & per illa verba, vel in homines contumeliosa, vel in Deum blasphema, quæ nihil mihi attulerunt boni. Et ab illa tanta
fe-

Lib. I. Cap. XIII. 143

felicitate ad quam sortem deueni
ad captiuitatem diaboli, hostis
mei crudelissimi; & quam cito fran
getur maceries ista putrida cor
poris mei, quæ momentis singu
lis ruinam minatur; tam cito &
ego sine vilo remedio in ignem
æternum descendam. Heu me mi
ferum, fortasse cras, fortasse hac
nocte in illis sempiternis ardori
bus habitare incipiam. Sed super
hæc omnia, cor meum torquet, &
lancinat ingratitude mea, filij, &
serui deterrimi, in patrem, & Do
minum amantissimum, & optimū:
nam quo magis, ille me beneficijs
cumulauit, hoc ego magis illum
peccatis meis offendi.

Hæc, & similia si attentè cogi
tare volueris in cubiculo cordis
clausus, quicumque es, qui hunc
libellum dignaris legere; spero om
nino te contritionis donum a bo
no Domino nostro impetraturū.
Intrauit aliquando poenitens Da
uid in solitudinem cordis sui, post
adulterium perpetratum; & mox

144 De arte bene mor.

contritione adepta, cœpit lacrymis stratum suum rigare. Intrauit pœnitens Petrus in cor suum post Christi negationem; & continuo *fleuit amare*. Intrauit pœnitens illa peccatrix in cor suum; & statim *lacrymis cœpit rigare pedes IESU, & capillis suis tergere*. Hi sunt ergo fructus sanctæ contritionis, qui non nascuntur nisi in solitudine cordis.

Iam de confessione pauca dicamus. Video multos homines sine villo fructu, aut certè valdè modico ad hoc saluberrimum sacramentum accedere; nec aliam ob causam, nisi quia in cor suum non ingrediuntur, cum se ad confessionem faciendam parant. Aliqui sunt, qui ita negligenter ad hoc opus accedunt, vt solùm generatim, & confuso quodam modo dicere possint, se omnia præcepta violasse, vel omnia peccata mortalia perpetrasse: quibus non alia quàm generalis, & confusa absolutio conueniret; immo vero ne-

que

que tali absolutione digni sunt. Confitentur enim, quod fortasse non fecerunt, & quod verè fecerunt, non confitentur. Alij sunt, qui peccata quidem sua sigillatim referre, & ordine didicerunt: verum nullam rationem habent de qualitate personæ, de loco, de tempore, de numero, deque alijs, quæ circumstantiæ dici solent: quæ insignis, & periculosa negligentia est. Aliud enim est percutere clericum, aliud percutere laicum; cum priori percussioni excommunicatio adiuncta sit, non posteriori. Aliud quoque est cum virgine, aliud cum sanctimoniali, aliud cum coniugata, aliud cum meretrice flagitium perpetrasse: aliud semel, aliud decies in idem peccatum incidisse. Idem enim peccatum sæpius repetitum, nō vnum peccatum est, sed multiplex. Denique non desunt, quod magis est admirandum, qui peccata interna, vt desideria fornicationis, adulterij, homicidij, furti, arbitrentur

G

non

146 De arte bene mor.

non esse peccata, nisi opere compleantur; immo verò neque aspectus impudicos, neque verba lasciuia in peccatis numerent. Et tamen Dominus ipse disertis verbis loquitur, cum ait, *Qui viderit mulierem ad concupiscendum eam; iam moechatus est eam in corde suo.* Oportet igitur, vt si quis conscientia suæ consulere velit, & vtilem, ac salutarem confessionem facere; primùm libellum aliquem de arte rectè confitendi peccata inueniat, aut certè confessarium piū, & doctum consulat: deinde in cor suum ingrediatur, & non cursim, & breuiter, sed accuratè, & seriò conscientiam suā discutiatur, & diligenter cogitationes, desideria, verba, & facta, necnon omissiones examinet; & pio, ac perito medico animarum conscientiam suam aperiat, atque ab eo humiliter absolutionem petat, paratus pœnitentiam implere, quam ipse confessarius iniungendam esse censuerit.

Re-

Lib. I. Cap. XIII. 147

Restat satisfactio, cuius maiores nostri, viri sapientissimi, multo maiorem rationem habebant, quàm multi ex nobis habere videantur. Illi enim cum seriò considerarent, multò facilius hic in terris, quàm in locis purgatorijs Deo satisfieri posse; multas imponebant grauissimas, atque longissimas. Et quidem quod ad tempus attinet, pœnitentias iniungebant annorum septem, vel quindecim, vel triginta, interdum etiam totius vitæ. Quod verò attinet ad qualitatem, iniungebant ieiunia frequentissima, orationes adhuc frequentiores; præterea, vt non vterentur balneis, non equis, non curribus, non vestibus pretiosis; vt abstinerent à ludis, iocis, theatris: denique omnis eorum vita in luctu, & mœrore pœnitentibus congruente, ferè consumebatur. Adferam vnum exemplum.

In Concilio Toletano decimo legimus Episcopum Bracharen-

G 2 sem

I 48 De arte bene mor.

fem, Potamium nomine, qui semel tactu femineo sorduerat (sic enim Concilium loquitur) ipsum se nullo cogente, in ergastulo quodam inclusisse, & nouem mensium pœnitentiam egisse : ac deinde proprijs litteris hoc suum peccatum, & pœnitentiam sponte susceptam Concilio Episcoporum significauisse : Concilium autem decreuisse, vt toto vitæ suæ tempore in agenda pœnitentia perseveraret ; cùm affirmaret nihilominus Concilium humanius, & misericordius cum illo actum esse, quàm antiquorum regulæ, & seueritas paterentur . Hæc erat antiqua seueritas. Nunc verò sic imbelles, & delicati sumus, vt multa imposita ieiunij in pane, & aqua ad paucos dies cum septem Psalmis, & Litanijs, totidem diebus recitandis ; & eleemosyna paucorum nummorum pauperibus eroganda : satis videatur seuera esse, etiamsi pro multis flagitijs, & sceleribus eluendis im-

po-

ponatur . Sed quod hic nobis ip-
 si indulgemus , in purgatorijs lo-
 cis ; iustitia Dei sic exigente , gra-
 uiter luemus : nisi tanta sit vis ve-
 ræ contritionis , ex ardenti chari-
 tate prodiens , vt à misericordia

Dei remissionem totius culpæ , &
 pœnæ valeat impetrare . Verè
 enim miro modo commouet vi-
 scera Patris nostri Dei cor verè
 contritum , & humiliatum . Non
 enim potest dulcedo , & bonitas
 patris se continere , quin ad fi-
 lium prodigum , sed verè pœni-

Luc 15.

tentem , accurrat , complectatur ,
 osculetur , annulum pacis do-

net , & abstergat la-
 crymas doloris , &

lacrymis læ-
 titiæ re-

pleat

omni fauo mel-

lis dulcio-

ribus .

∴

148 De arte bene mor.

fem, Potamium nomine, qui semel tactu femineo sorduerat (sic enim Concilium loquitur) ipsum se nullo cogente, in ergastulo quodam inclusisse, & nouem mensium pœnitentiam egisse : ac deinde proprijs litteris hoc suum peccatum, & pœnitentiam sponte susceptam Concilio Episcoporum significauisse : Concilium autem decreuisse, vt toto vitæ suæ tempore in agenda pœnitentia perseveraret ; cùm affirmaret nihilominus Concilium humanius, & misericordius cum illo actum esse, quàm antiquorum regulæ, & seueritas paterentur . Hæc erat antiqua seueritas. Nunc verò sic imbelles, & delicati sumus, vt multa imposita ieiunij in pane, & aqua ad paucos dies cum septem Psalmis, & Litanij, totidem diebus recitandis ; & eleemosyna paucorum nummorum pauperibus eroganda : satis videatur seuera esse, etiamsi pro multis flagitijs, & sceleribus eluendis im-

po-

ponatur . Sed quod hinc nobis ipsi indulgemus , in purgatorijs locis ; iustitia Dei sic exigente , gra- uiter luemus : nisi tanta sit vis ve- ræ contritionis , ex ardenti chari- tate prodiens , vt à misericordia Dei remissionem totius culpæ , & pœnæ valeat impetrare . Verè enim miro modo commouet vi- scera Patris nostri Dei cor verè contritum , & humiliatum . Non enim potest dulcedo , & bonitas patris se continere , quin ad fi- lium prodigum , sed verè pœni- Luc 15. tentem , accurrat , complectatur , osculetur , annulum pacis do- net , & abstergat la- crymas doloris , & lacrymis læ- titiæ re- pleat
 omni fauo mel-
 lis dulcio-
 ribus .

∴

CAP. XIV.

De præcepto quartodecimo artis bene moriendi, quod est de sacramento Ordinis.

DVO sacramenta, quæ sequuntur breuiter consideranda, non ad omnes Christianos pertinent; sed vñum ad clericos, sacramentum videlicet Ordinis; alterum ad laicos, sacramentum Matrimonij. Dicamus breuiter de primo, non omnia quæ ad hoc sacramentum pertinent, sed ea solùm, quæ necessaria sunt ad artem bene viuendi, & feliciter moriendi.

Ordines numerantur septem, quatuor minores, & tres maiores; quorum supremus, qui dicitur sacerdotium, in duos diuiditur: sunt enim sacerdotes maiores,

Lib. I. Cap. XIV. 151

res, qui dicuntur Episcopi; & minores, qui dicuntur presbyteri. His omnibus ordinibus præmittitur prima tonsura, quæ est quasi ianua ad omnes ordines, & ea clericos propriè facit. Et quoniam ea, quæ requiruntur à clericis, quod attinet ad piè, & religiosè viuendum; maiori ratione requiruntur ab ijs, qui sunt constituti in ordinibus minoribus, vel maioribus, & potissimum à presbyteris, vel Episcopis; ideo contentus ero breuiter ea considerare, & explicare, quæ ad clericos pertinent.

Duo sunt, quæ de clericis explicanda esse videntur; primùm ipse ritus, quo clerici fiunt; deinde officium, quo in Ecclesia fungi debent. Ritus, quo fiunt clerici, vt ex libro pontificali potest intelligi, hic est, vt primùm tondentur capilli capitis; quo ritu significatur depositio cogitationum, & cupiditatum superuacuarum, quales sunt cogitatio-

152 De arte bene mor.

nes, & cupiditates rerum temporalium, opum, honorum, deliciarum, & aliarum id genus rerum: & simul iubeantur, qui tondentur dicere versiculum illum, psalmi quinti decimi, *Dominus pars hereditatis mee, & calicis mei, tu es, qui restitues hereditatem meam mihi.* Deinde iubet Episcopus adferri superpelliceum candidum, eoque induit nouum clericum, dicens illud ex Apostolo ad Ephesios, *Induat te Dominus nouum hominem, qui secundum Deum creatus est in iustitia, & sanctitate veritatis.* Porro officium nouo clerico nullum proprie assignatur, sed ex consuetudine munus ipsius est ministrare Sacerdoti rem sacram facienti, quando priuatim id agit.

Consideremus nunc, quanta perfectionis eminentia requiratur in clerico; & si tanta in clerico, quanta in acolyto, in subdiacono, in diacono, in presbytero, in Episcopo? Horret profes-

cto

Ephes. 4.

Lib. I. Cap. XIV. 153

Etò mens mea id cogitare, cùm
 vix inueniantur in multis presby-
 teris, quæ iure exiguntur in sim-
 plici clerico. Iubetur clericus abij-
 cere superuacaneas cogitationes,
 & cupiditates, quæ propriæ sunt
 hominum sæcularium, idest, ho-
 minum, qui ad hoc sæculum per-
 tinent, qui sunt de hoc mundo,
 qui quæ mundi sunt, assiduè cogi-
 tant, & concupiscunt. Iubetur
 bonus clericus, non aliam partem,
 vel hæreditatem querere, nisi Deū,
 vt sit Deus solus pars, & hæredi-
 tas eius; & ipse solius Dei pars, &
 hæreditas verè dicatur, & sit. O
 altitudo clericalis perfectionis,
 quæ toti mundo renuntiat, vt so-
 lum Deum verè possideat; & ipse
 vicissim à solo Deo possideatur.
 Hoc significant illa verba psalmi,
*Dominus pars hereditatis meæ,
 & calicis mei. Pars hereditatis,*
 dicitur illa portio, quæ ex diuisione
 hæreditatis in multos fratres,
 vnicuique illorum contingit. Ita-
 que non est sensus illorum verbo-

154 De arte bene mor.

rum, quòd clericus velit, partem hæreditatis suæ esse Deum, alteram partem esse opes terrenas: sed quòd ex corde cupiat, totam partem suam; id est, quicquid ad eum pertinere posset ex hoc mundo, id totum transferre per affectum bonum in Deum. Inter calicem autem, & hæreditatem hoc interesse videtur, quòd calix ad voluptatem, & delicias; hæreditas ad opes, & honores pertineat. Itaque integer sensus erit, Domine Deus meus, ex hoc tempore quicquid in mundo sperare poteram, vel diuitiarum, vel deliciarum, vel aliorum temporalium bonorum; id totum in te solo habere desidero. tu vnus pro rebus omnibus abundè sufficis. Et quoniam abundantia cælestium bonorum hic in terris haberi non potest, ideo pergit orando, & dicit bonus clericus, *Tu es, qui restitues hæreditatem meam mihi.* Quæ enim propter te contempsi, & abieci, vel pauperibus tuis donans, vel diri-

ri-

ripiantibus propter te condonās; tu mihi fideliter conseruas, & tempore suo restitues, non in specie corruptibili, sed in te ipso, qui es fons inexhaustus omnium bonorum.

Sed ne quis hanc nostram explicationem in controuersiam reuocare velit, addemus duos testes omni exceptione maiores; sanctum videlicet Hieronymum, & sanctum Bernardum. Sanctus Hieronymus in Epistola ad Nepotianum, de vita clericorum, *Igitur, inquit, clericus, qui Christi seruit Ecclesie, interpretetur primò vocabulum suum; & nominis definitione prolata, nitatur esse quod dicitur, Si enim κληρος græcè, sors latinè appellatur; propterea vocantur clerici, vel quia de sorte sunt Domini; vel quia ipse Dominus sors, idest, pars clericorum est. Qui autem vel ipse pars Domini est, vel Dominum partem habet; talem se exhibere debet, ut & ipse possideat Dominum,*

G 6 num,

156 De arte bene mor.

Pf. 15

num, & possideatur à Domino. Qui Dominum possidet, & cum Propheta dicit, Pars mea Dominus; nihil extra Dominum habere potest. Quod si quidpiam aliud habuerit præter Dominum; pars eius non erit Dominus. verbi gratia, si aurum, si argentum, si possessiones, si variam supellectilem: cum istis partibus, Dominus pars eius fieri non dignabitur. Hæc sanctus Hieronymus: cuius totam epistolam, si quis legere voluerit, inueniet profectò, magnam omnino vitæ perfectionem in clericis requiri. Accedat nunc sanctus Bernardus, qui non solùm approbat sententiam sancti Hieronymi, sed aliquando verbis eius vtitur, quâuis eum non nomet. Sic igitur loquitur in illa longissima declamatione super verba sancti Petri, *Ecce nos reliquimus omnia, quæ habentur apud sanctum Matthæum: Clericus, inquit, qui habet partem in terra, non habebit partem in celo. Clericus si quidpiam habue-*

Mat 19

huerit præter Dominum, pars eius non erit Dominus . & paulo post, declarans, quid possit clericus ex beneficijs ecclesiasticis sibi retinere , ait, Res pauperum non pauperibus dare , par sacrilegij crimen esse dignoscitur : sanè patrimonio pauperum , facultatibus Ecclesiarum , sacrilega crudelitate subripitur quicquid ministri & dispensatores , non utique domini , & possessores, ultra victum accipiunt & vestitum . Hæc sanctus Bernardus , qui cum sancto Hieronymo non falsa loquitur , sed perfecta .

Sequitur ritus induendi superpellicem candidum, cum illis verbis Apostoli, *Induite novum hominem , qui secundum Deum* Eph. 4.
creatus in iustitia , & sanctitate veritatis . Neque enim satis est clericis , non abundare diuitijs ; sed necesse est etiam innocentem , & sine macula vitam gerere ; quippe qui altaris ministerio sunt dedicati , in quo Agnus sine macula quotidie

158 De arte bene mor.

tidie immolatur. Porrò induere nouum hominem, nihil est aliud, nisi exuere mores veteris Adami, qui corruptit viam suam; & induere mores secundi Adami, idest, Christi, qui de Virgine nouo modo natus, nouam vitam instituit, in iustitia, & sanctitate veritatis; idest, non solum in iustitia morali, sed etiam in sanctitate verissima, & supernaturali, qualem in se Christus exhibuit, qui teste

1. Pet. 2. Apostolo Petro, *Peccatum non fecit, nec inuentus est dolus in ore eius*. Vtinam multos eiusmodi clericos haberemus, qui quod veste candida præferunt, moribus & vita præstarent.

Denique munus clericorum est, angelica puritate, sacrificio diuino, in quo Agnus Dei quotidie immolatur, deuotè, grauitè, assiduè, diligenter assistere. Scio multos in Ecclesia pios clericos inueniri: sed non scio tantum, sed vidi sapissimè petulantes, girouagis oculis sic altari dominico mi-

ni-

nistrare ; ac si res ageretur, non solum non sacro horrore plena, sed vulgaris, & leuis. Et fortasse culpa tam grauis non in solo ministro, sed etiam in sacerdote sacrificium celebrante inhæret; quippe qui aliquando sic festinat, & sic indeuotè se gerit, vt videatur nescire quid agat. Audiant isti, quid sanctus Ioannes Chrysostronus de tempore celebrationis Missæ loquatur; *Per id tempus, inquit in libro sexto de Sacerdotio, & Angeli sacerdoti assident, & celestium potestatum vniuersus ordo clamores excitat, & locus altari vicinus, in illius honorem, qui immolatur, Angelorum choris plenus est.* Id quod credere abundè licet, vel ex tanto illo sacrificio, quod tunc peragitur. Audiant quoque sanctum Gregorium: is in quarto libro Dialogorum: *Quis fidelium, inquit, habere dubium possit, in ipsa immolationis hora ad sacerdotis vocem celos aperiri, Angelorum choros adesse, summis*
ima

160 De arte bene mor.

ima sociari , terrena celestibus iungi , unum quoque ex visibilibus , & inuisibilibus fieri ? hæc ille . Quæ si seriò cogitarent , tum presbyter celebrans , tum clericus ministrans ; quo modo fieri posset , vt rem tantam agerent quo modo agunt ? O quàm triste , & deplorandum spectaculum esset , si oculos mentis apertos haberemus ; videre sacerdotem diuina mysteria tractantem , Angelorum choris vndique septum , qui ad ea , quæ ipse operatur , obstupescunt , & tremunt , & præ admiratione clamores spirituales excitant ; & tamen sacerdos in medio positus , totus frigidus , & quasi stupidus non attendit quid agat , non intelligit quid loquatur , & ita prope- rat ad finem , & signa inuoluit , & verba præcipitat ; vt videatur nescire quid agat : & interim clericus minister huc , atque illuc circumspicit , aut cum aliquo garrit . Sic Deus irridetur , sic res sacratissimæ contemnuntur , sic materia
oblo-

obloquendi hæreticis datur. Quæ cum ita sint, clericos omnes maiores, & minores moneo, & hortor, vt mundo mortui, Deo soli viuant; rerum temporalium copiam non affectent; innocentiam magno zelo custodiant; & res diuinas religiosè, vt par est, tractent; & ab alijs tractari procurent. sic magnam fiduciam sibi apud Deum acquirent; & Ecclesiam Christi bono iugiter odore replebunt.

C A P. XV.

De quintodecimo præcepto artis bene moriendi, quod est de Matrimonio.

SEQVITVR Sacramentum Matrimonij, quod duplicem habet institutionem; vnã, vt est contractus ciuilis de iure naturæ; alte-

162 De arte bene mor.

alteram, ut est Sacramentum de iure euangelico. De utraque institutione breuiter differemus, non absolutè, sed in ordine ad bene viuendum, ut feliciter postea moriamur. Prior institutio facta est à Deo in paradiso terrestri: siquidem illa verba Dei, *Non est bonum hominem esse solum; faciamus ei adiutorium simile sibi*: non possunt rectè intelligi nisi de adiutorio ad propagandam, & educandam sobolem. Nam, ut rectè docet Sanctus Augustinus, nulla in re viri egent adiutorio feminarum, nisi in parienda, & educanda prole: in alijs enim rebus melius viri à viris, quàm à mulieribus adiuuantur. Itaque paulo post conditam mulierem, Adam ex diuina inspiratione dixit, *Relinquet homo patrem, & matrem, & adhaerebit uxori suæ*. quæ verba Saluator noster apud Matthæum, Deo attribuit, dicens, *Non legistis, quia qui fecit hominem ab initio, masculinum, & feminam fecit eos,*

Gen. 2.

1.9 de Gene ad lit. 6, 7.

Mat. 19.

eos, et dixit, Propter hoc dimittet homo patrem, et matrē, et adhaerebit uxori suae, & erunt duo in carne una? quod ergo Deus coniunxit, homo non separet. Attribuit igitur Dominus verba illa Deo, quoniam illa non ex se loquutus est Adam, sed ex inspiratione Dei. Atque hæc fuit prima institutio matrimonij.

Altera institutio, vel potius exaltatio matrimonij ad eminentiam Sacramenti, habetur apud Apostolum in illis verbis Epistolæ ad Ephesios, *Propter hoc relinquet* Ephes. 5.
homo patrem, & matrem; & adhaerebit uxori suae, & erunt duo in carne una. Sacramentum hoc magnum est, ego autem dico in Christo, & Ecclesia. Esse autem matrimonium verum Sacramentum, docet Sanctus Augustinus in libro de bono coniugali; *In nostrarum,* De bono coniugato. c. 18.
inquit, nuptijs, plus valet sanctitas Sacramenti, quàm fœcunditas uteri. & capite vigesimo quarto, *Bonum,* inquit, *nuptiarum per omnes*
 ho

164 De arte bene mor.

gentes, atque omnes homines in causa generandi est, & in fide castitatis: quod autem ad populum Dei pertinet, etiam in sanctitate Sacramenti. & in libro

De fide,
& operi-
bus c.7.

de fide & operibus, *In ciuitate, inquit, Domini, & in monte sancto eius; hoc est, in Ecclesia, nuptiarum non solum vinculum, sed etiã Sacramentum commendatur.* Sed de his rebus non est huius loci accuratius disputare. Illud ad hunc locum propriè pertinet, vt explicemus quemadmodum viri, & mulieres matrimonio copulati, possint ita viuere, vt bene se mori posse confidant.

Tria sunt bona matrimonij, si quis eo bene vtatur, proles, fides, & gratia sacramenti. Proles generatio, & bona educatio quærenda est, si quis coniugio bene vti velit: contra verò grauissimè peccat, qui prolem ex coniugio non quærit, sed solam carnis voluptatem. Hinc grauissimè reprehenditur in Scripturis sanctis vnus

ex

Lib. I. Cap. XV. 165

ex filijs Iudæ Patriarchæ, nomine Gen 38
 Onan, quia in congressu cum
 vxore, semen fundebat in terram,
 ne filij nascerentur. Hoc enim
 non est vti matrimonio, sed abu-
 ti. Quòd si aliquando pij coniu-
 ges grauentur ex multitudine pro-
 lium, quas præ inopia non facile
 sustentare queant; remedium est
 honestum, & Deo gratum, ex con-
 sensu mutuo separari à thoro, &
 orationi, ac ieiunijs deinceps va-
 care. Nam si gratum est Deo,
 coniuges in virginitate consene-
 scere, ad exemplum Virginis Dei-
 paræ, & sancti Ioseph: quorum
 viuendi genus imitati sunt Henri-
 cus Imperator, & Chunecunda
 eius coniux; Eduardus Rex, &
 Egdida eius vxor; Elzearius Co-
 mes, & vxor eius Dalphina, &
 alij non pauci: Quare displicere
 posset Deo, vel hominibus, vt cõ-
 iuges suscepta prole cessent ex cõ-
 sensu mutuo à nuptiarum opere;
 vt quod illis superat vitæ, in ieiu-
 nijs, & oratione consumant?

Dein-

166 De arte bene mor.

Deinde, quoque graue peccatū est, si quis in statu matrimonij positus susceptas proles negligat, & vel educationem piam, vel necessaria ad vitam illis deesse patiatur. Extant exempla de hac re multa in historijs sacris, & prophanis: sed ego quia breuitati studeo, ero contentus vno, quod habetur in primo libro Regum: Sic enim Deus ipse loquitur, *In die illa suscitabo aduersum Heli omnia quæ locutus sum super domum eius, incipiam & complebo. Prædixi enim ei, quòd iudicaturus essem domum eius in æternum propter iniquitatem, eo quod nouerat indignè agere filios suos, & non corripuit eos. Idcirco iuravi domui Heli, quòd non expietur iniquitas domus eius victimis, & muneribus usque in æternum.* Hæc Dominus prædixit, & paulo post impleuit. Nam filij Heli occisi sunt in bello, & ipse Heli è sella cadens retrorsum ceruices fregit, & miserè periit. Ergo si Heli,

1 Reg. 3
& 4.

li, alioqui vir iustus, & Iudex populi sui, ex peccatis filiorum, quos non educauerat, vt par erat, & postea deteriores factos non corripuerat; miserè cum filijs periit, & principatum populi sui amisit: quid de illis fiet, qui non solum filios non bene educare student, sed exemplo malæ vitæ suæ illos ad peccandum inuitant? certè nihil aliud expectare debent, nisi exitum horribilem, & sibi & filijs; nisi maturè resipiscant, & pœnitentiam condignam agant.

Alterum matrimonij bonum est fides, quæ in eo posita est, vt intelligant coniuges, corpus suum non esse suum, sed coniugis; & sicut non potest vnus alteri debitum negare; sic non potest copiam sui corporis alteri, quàm proprio coniugi facere; cuius rei signum est annulus. Hæc doctrina apud Apostolum disertis verbis legitur.

Vxori, inquit, vir debitam reddat, similiter autem & vxor viro. 1. Cor. 7

Mulier sui corporis potestatem

non

non

168 De arte bene mor.

non habet, sed vir. Similiter autem & vir sui corporis potestatem non habet, sed mulier. Nolite fraudare inuicem, nisi fortè ex consensu ad tempus, ut vacetis orationi. Hæc est Apostolica doctrina, quam diligenter conseruare debent coniuges Christiani, si bene viuere, & bene mori desiderant. Adulteros enim, si publici sint, facile vel Iudices iustè puniunt; vel cognati, affines, honoris gratia de medio tollunt; sed occultos, qui multo sunt plures, Iudex omnipotens, & iustissimus, quem secreta non latent, sine dubio ad æterna supplicia condemnabit.

Tertium bonum, idque nobilissimum, est gratia sacramenti, quam Deus ipse cordibus piorum coniugum infundit; si dum coniugium legitime celebratur, ipsi coniuges bene dispositi, & parati inueniantur. Ea verò gratia, præter alia bona, quæ secum adfert, mirum in modum iuuat ad concilian-

liandam benevolentiam inter cōiuges ; quamvis ingenia , mores , morbi, variae dispositiones corporis , & animi facilè inimicitias ferere possint . Sed super omnia, dulcissimum coniugium, & beatissimum facit imitatio cōiugij Christi cum Ecclesia , de quo sic Apostolus loquitur in Epistola ad Ephesios, *Viri diligite uxores vestras, sicut Christus dilexit Ecclesiam, & se ipsum tradidit pro ea, ut illam sanctificaret, mundans lavoacro aquae in verbo vitae, ut exhiberet ipse sibi gloriosam Ecclesiam, non habentem maculam, neque rugam.* Qui beatus Apostolus admonet etiam feminas dicens, *Mulieres viris suis subditae sint, sicut Domino, quoniam vir caput est mulieris, sicut Christus caput est Ecclesiae. Sed sicut Ecclesia subiecta est Christo, ita & mulieres viris suis in omnibus.* Denique concludit Apostolus, *Vnusquisq; uxorem suam, sicut se ipsum, diligat : uxor autem timeat virum suum:*

Eph. 5.

170 De arte bene mor.

suum. Hæc Apostolica doctrina si diligenter consideretur, & obseruetur, beata faciet coniugia in terra, & in cælo.

Explicemus breuiter totam, hanc sententiam Apostolicam Pauli. Principio hortatur Apostolus viros, vt diligant vxores, *sicut Christus dilexit Ecclesiam*. Christus certè Ecclesiam dilexit amore amicitiae, non amore concupiscentiae; quæsiuit bonum Ecclesiae, vtilitatem Ecclesiae, salutem Ecclesiae; non vtilitatem, aut voluptatem aliquam suam. Proinde Christum non imitantur, qui vxorem diligunt propter formam existimiam, capti amore pulcritudinis eius; vel propter dotem multorum millium nummorum aureorum, aut opulentissimam hæreditatem. Isti enim non diligunt sponsam; sed ipsi se diligunt, cupientes satiare concupiscentiam carnis suæ, vel concupiscentiam oculorum suorum, quæ auaritia dicitur. Sic Salomon initio sapiens, ad vltimum

mum insipiens dilexit vxores, & 3. Reg 11
 concubinas suas, non amore ami-
 citiæ, sed amore concupiscentiæ;
 cupiens non illis bene facere, sed
 carnalem concupiscentiam suam
 implere; qua concupiscentia ex-
 cœcatus, non timuit sacrificare
 Dijs alienis, ne delicias suas, vel
 minimum contristaret. Quòd au-
 tem Christus in coniugio cum
 Ecclesia non quæsierit se ipsum,
 id est, vtilitatem, vel voluptatem
 suam, sed bonum Ecclesiæ spon-
 sæ; perspicuum est ex verbis se-
 quentibus, *Et se ipsum tradidit
 pro ea, ut illam sanctificaret, mun-
 dans eam lauacro aquæ in verbo
 vitæ*. Hæc nimirum est vera, &
 perfecta charitas, tradere se ip-
 sum ad supplicia pro salute æter-
 na Ecclesiæ sponsæ suæ. Neque
 solum dilexit Christus Ecclesiam,
 amore amicitæ, non concupiscen-
 tiæ, sed amore perpetuo, non ad
 tempus. Nam quemadmodum
 naturam humanam, quam semel
 assumpsit, nunquam dimisit: sic

172 De arte bene mor.

etiam Ecclesiam sponfam vinculo coniugij insolubilis sibi adiunxit .
 Jer. 31. *In charitate perpetua dilexi te* ,
 ait per Prophetam . Et hæc est
 causa, cur matrimonium consum-
 matum apud Christianos sit om-
 nino insolubile ; quia videlicet est
 sacramentum significans matrimo-
 nium Christi cum Ecclesia , quod
 matrimonium est penitus insolu-
 bile, cum matrimonium hebræo-
 rum , & paganorum in certis ca-
 sibus solui possit .

Addit postea idem Apostolus
 erudiens mulieres , ac docet , vt
 subditæ sint viris suis, quemadmo-
 dum Ecclesia subdita est Christo .
 Hoc præceptum non obseruauit
 3. Reg. 21 Iezabel , quæ viro suo dominari
 4. Reg. 10 volebat , & se , & illum cum om-
 nibus filijs suis perdidit . Atque
 vtinã non multæ essent apud nos ,
 quæ viris suis dominari conten-
 dunt ; sed culpa virorum fortasse
 est , qui primatum suum tenere
 non norunt . Sara certè vxor A-
 brahami , sic subdita erat viro ,
 vt

vt Dominum suum eum nominaret. *Ego*, inquit, *iam senui, & Dominus meus vetulus est.* Quam virtutem Saræ laudabat Sanctus Petrus in priore Epistola dicens, *Sanctæ mulieres subiectæ erant viris suis; sicut Sara obediebat Abrahamæ, Dominum illum vocans.* Mirum autem esse videtur, quòd Apostoli Petrus, & Paulus vbique docent vt viri vxores suas ament, & vxores viros suos timeant, vel quod in idem recidit, viris suis subditæ sint: an non etiam debet vxor virum suum diligere? debet quidem virum diligere, & diligi à viro: sed diligere debet cum timore, & reuerentia, sic vt amor timorem non impediat: alioqui mulier in tyrannum euadit. Certè Dalila virum suum Sampsonem, alioqui fortissimum, non vt virum, sed vt seruum illudebat. Et in tertio libro Regum narratur de Rege amore capto cōcubinæ suæ, qui patiebatur amicam suã à dextris sibi assidere, & coronam de

Gen. 18.

1. Pet. 3.

Iud. 16.

3. Reg. 4

174 De arte bene mor.

capite Regis sublatam capiti suo imponere, & alapis Regem ipsum cædere. Itaque mirum non est, si ipsi primæ mulieri dictum sit à

Cap. 2. Domino, *Sub viri potestate eris, & ipse dominabitur tui.* Quare, non parum sapientiæ requiritur in viro, ut uxorem suam simul diligat, & dirigat, & contra, simul eam admoneat, & doceat, & si opus sit, corrigat, & emendet; ut tamen verè diligat, ut partem corporis sui, & efficiat, ut illa vicissim virum diligat, & sibi certè persuadeat, se à viro pariter diligere, & ex charitate, non ex odio admoneri. Exemplum habemus sanctæ Monicæ matris sancti Augustini, quæ cum virum haberet ferocem, & paganum, sic tamen eum prudenter & piè toleravit, ut ab eo semper amaretur, & ad Christum tandem ipse idem conuertetur. Consulat lector librum confessionum Sancti Augustini.

CAP.

CAP. XVI.

De sextodecimo præcepto
artis bene moriendi, quod
est de Sacramento Un-
ctionis extremæ.

RESTAT vltimum sacramen-
tum, quod dicitur Extre-
ma Unctio; ex quo colligitur vti-
lissimum documentum, non pro
vltimo tempore tantum, sed pro
toto decursu vitæ. Siquidem in
eo sacramêto inunguntur illæ om-
nes corporis partes, in quibus re-
sident quinque eiusdem corporis
sensus; & ad singulas dicitur,
Ignoscat tibi Deus quicquid deli-
quisti per visum, & sic de cæte-
ris. Ex quo intelligimus quinque
sensus esse portas, per quas in-
grediuntur in animam omnium
generum peccata. Proinde si quis
diligenter custodiat portas istas,

176 De arte bene mor.

facile vitabit ingentem multitudinem peccatorum, ac per hoc bene viuet, & felicissime morietur.

Differamus ergo breuiter de custodia harum quinque portarum.

Quod oculus sit porta, per quam intrant peccata, quæ ad luxuriam pertinent, docet magister omnium Christus, cum dicit, *Qui*

Matt. 5.

viderit mulierem ad concupiscendum eam, iam moechatus est eam in corde suo. Quod si oculus tuus

scandalizat te, erue eum, & projice abs te. Expedit enim tibi, ut pereat unum membrorum tuorum,

Dan. 13.

quam totum corpus tuum mitti in gehennam. Deinde scimus, senes, qui Susannam nudam viderunt, statim exarsisse in concupiscentiam eius, & inde miserè fuisse occisos.

2. Reg. 11

Scimus etiam Dauidem, amicum Dei præcipuum, ex solo conspectu Bethsabæ, se ipsam lauantis, incidisse in adulterium, vnde homicidium, & detrimenta innumera-bilia successerunt. Denique ratio naturalis est in promptu. Siquidem

dē pulchritudo feminæ cogit quodam modo se amari à viro, & pulchritudo viri à femina; neq; amor iste quiescit donec ad coniunctionem corporum veniatur, propter concupiscentiam, quæ in nobis relicta est ex peccato originis.

Quod malum etiã Apostolus sanctus deplorat cum dicit, *Video R^m. 7.*
aliam legem in membris meis repugnantem legi mentis meæ, & captiuantem me in lege peccati, quæ est in membris meis. Infelix ego homo, quis me liberabit de corpore mortis huius? gratia Dei per I E S U M Christum Dominum nostrum.

Quod remedium inueniemus aduersus tam grauem tentationē? Remedium est expeditum, & facile cum Dei adiutorio, si quis eo velit vti. Remedium extat apud sanctum Augustinum in epistola centesima nona, quæ epistola continet regulam sanctimonialium. Sic enim loquitur hic sanctus pater ad sanctimoniales suas, *Oculi*

178 De arte bene mor.

vestri si iaciantur in aliquem, figantur in neminem. Nam simplex aspectus ferè est ineuitabilis; sed non potest, aut certè non solet ferire corda, nisi continuetur. Itaque si quis affuescat non aspicere de industria formosam personam, & si casu incidat in eiusmodi personas, & ex bona consuetudine continuo auertat oculos, nihil periculi illi erit. Verè enim scribit sanctus Augustinus, non conspectum, sed moram in aspiciendo esse periculosam. Atque hoc est, quod exemplo suo docuit sanctus

Iob 31. Iob, cum ait, *Pepigi fœdus cum oculis meis, ut ne cogitarem quidem de virgine*, ubi non dicit, *pepigi fœdus*, ut non viderem, sed *ut non cogitarem*; hoc est, ut non tamdiu hærerem in visione virginis, ut visio ad cor penetraret, & inciperem cogitare de pulchritudine eius, & paulatim etiam desiderare colloquium, & complexum eius. Et reddit rationem optimã, qualem reddere decebat virum.

san-

sanctissimum . *Quam enim partem haberet in me Deus ?* ac si dicere voluisset , pars mea , & omne bonum meum Deus est , bonum utique maximum , quo nihil melius cogitari potest ; Deus autem non amat nisi castos , & iustos .

Huc etiã pertinet admonitio Domini , *Si oculus tuus scandalizat te , erue eum ;* id est , sic eum posside , ac si non possideres ; & sic assuesce oculos ab huiusmodi spectaculis continere , ac si cœcus esses . Porro autem , qui à prima adolescentia incipiunt de hac re solliciti esse , non laborant in reliqua vita fugere , & vitare eiusmodi vitia . Qui verò malè assueti sunt , difficulter quidem , sed possunt tamen cum auxilio gratiæ Dei mutare mores , & laqueum istum perniciosissimum declinare .

Sed dicet fortasse aliquis , cur Deus formosas mulieres , & formosos viros creavit , si non vult conspici , & amari ? Facilis est responsio , & quidem duplex . Deus

H 6 enim

Matt. 5.

180 De arte bene mor.

enim creauit viros, & feminas propter coniugium. Sic enim dixit initio Deus, *Non est bonum hominem esse solum, faciamus ei adiutorium simile sibi.* Non autem indiget vir adiutorio feminae, nisi ad gignendam, & educandam prolem, vt supra docuimus ex doctrina sancti Augustini in libro de Genesi ad literam. Vir autem, & femina non facile conuenirent, nec per totam vitam simul libenter viuerent, nisi adesset forma, quæ amorem conciliaret. Cùm igitur facta sit mulier formosa, vt ametur à viro suo, nõ debet amari amore ad cõiunctionem incitante nisi à viro suo: propterea dictum est in lege Domini, *Non concupisces uxorem proximi tui.* Et viris dicit Apostolus, *Virri diligite uxores vestras.* Præterea multa sunt bona, & pulchra, quæ non ab omnibus appetenda sunt, sed ab ijs tantum, quibus conueniunt. Esus carniũ, & potus vini bona sunt, sed sanis, non

ægro-

Gen. 2.

Li 9. c. 2

Exo. 20.

Ephc. 5.

ægrotis . Sic pulchritudo virorū,
 & mulierum post resurrectionem,
 quando verè sani erimus, tutissi-
 mè amari poterit ab omnibus,
 quoniam tunc aberit morbus cō-
 cupiscentiæ carnalis, quo morta-
 les laboramus . Itaque mirum
 videri non debet, si nunc permit-
 titur omnibus cum delectatione
 videre Solem, & Lunam, & Stel-
 las, & flores, & alia id genus pul-
 chra, quæ morbum concupiscenti-
 æ non nutriunt: non autem per-
 mittitur cum delectatione confi-
 derare pulchras mulieres, vel pul-
 chros viros; nè forte illa confide-
 ratio morbum cōcupiscentiæ ad-
 augeat, vel nutriat .

Sequitur post sensum videndi
 sensus audiendi, qui non minus
 diligenter custodiendus est, quàm
 sensus videndi . Sed cum auribus
 coniungenda est lingua, quæ est
 instrumentum loquendi . verba
 enim siue bona, siue mala non
 perueniunt ad auditum, nisi so-
 nent per linguæ instrumentum .

Et

182 De arte bene mor.

Iac. 3.

Et quoniam lingua, nisi diligentissimè custodiatur, malorum plurimorum causa est; ideo Sanctus Iacobus clamat, & dicit, *Si quis in verbo non offendit, hic perfectus est vir.* & paulo post, *Ecce quantus ignis quam magnam syluam incendit. & lingua ignis, est uniuersitas iniquitatis.* Tria hoc loco docet sanctus Apostolus; primum, linguam bene custodire rem esse difficillimam, & ideo raros esse, eosque solos perfectos viros, qui linguam bene custodire sciant. Deinde à mala lingua breuissimo tempore ingens detrimentum prouenire posse; id quod explicat, similitudine ducta à scintilla ignis, quæ nisi subito extinguatur, ingentem syluam lignorum consumere potest. Sic enim vnum verbum incautè prolatum potest excitare suspiciones sceleris alicuius; vnde inimicitia, rixæ, contentiones, homicidia, atque integræ familiae exterminium sequitur. Docet sanctus Iacobus de-

denique, linguam malam non esse rem vnam malam, sed includere in se malorum multitudinem. Ideo vocat eam, vniuersitatem iniquitatis. Nam per eam omnia facinora, aut præparantur, vt stupra & latrocinia; aut patrantur, vt periuria, & falsa testimonia; aut defenduntur, vt cùm impius excusat malum quod commisit; aut simulat bonum, quod non fecit. Et rursum iure dicitur lingua mala vniuersitas iniquitatis, quia per linguam peccat homo contra Deum, blasphemando, et peierando; contra proximum, detrahendo, et conuiciando; contra se ipsum, iactando se fecisse bona opera, quæ re vera non fecit, et mentiendi se non fecisse mala, quæ fecit.

Ad hoc testimonium Apostoli Iacobi, addere volo testimonium Prophetæ Davidis in psalmo primo ex gradualibus, *Domine, inquit, libera animam meam à labijs iniquis, & à lingua dolosa.* Si
 fan-

Ps. 119.

184 De arte bene mor.

sanctus Rex timuit sibi à lingua iniqua, et dolosa; quid facere debent homines priuati, et multo magis, si non solum priuati, sed pauperes, debiles, obscuri sint? Addit Propheta, *Quid detur tibi, aut quid apponatur tibi ad linguam dolosam?* Verba sunt obscura ob linguæ hebraicæ proprietatem, sed sensus hic esse mihi videtur, Non sine causa timeo mihi à lingua iniqua et dolosa; quia tam grande malum est eiusmodi lingua, vt nihil mali addi illi posse videatur. Pergit Propheta, ac dicit, *Sagittæ potentis acutæ, cum carbonibus desolatorijs.* Declaratur his verbis elegantissima similitudine, quàm ingens malum sit lingua dolosa. Similem enim illam facit Propheta sagittæ ignitæ, à robusta manu emissæ. Primum enim sagittæ longè feriunt, & tanta celeritate volant, vt vix euitari possint. Deinde sagittæ, quibus comparatur lingua dolosa; dicuntur emissæ à potenti, & robusta

ma-

manu . Tertio additur , sagittas illas esse acutas , idest , ab artifice perito bene politas , & exacutas . Denique addit , esse similes carbonibus desolatorijs , idest , esse ignitas , vt quid vis quamuis durum desolare possint ; ac per hoc similem esse linguam dolosam , & iniquam ; non tam sagittis hominum , quàm sagittis de cælo emissis , qualia sunt fulgura cælestia , quibus nihil omnino resistere potest . Hæc certè prophetica descriptio linguæ dolosæ & iniquæ talis est , vt nullum tam grande malum cogitari possit , quod cum lingua dolosa , & iniqua comparari valeat .

Atque , vt hæc omnia facilius adhuc intelligi possint , duo exempla Scripturarum addam . Vnum sit scelestissimi Doeg Idumæi , qui accusauit Sacerdotem Achimelech apud Regem Saulem , quod coniurasset cum Dauide aduersus Regem . quæ mera calumnia , & impostura erat . Quia tamen Rex
Saul

1. Reg 22

186 De arte bene mor.

Saul pessimè animatus erat eo tēpore erga Dauidem, facilè omnia credidit; & iussit occidi continuò non solùm Sacerdotem Achimelech, virum innoxium, sed etiam omnes alios Sacerdotes, ad numerum octoginta quinque virorum, qui nulla in re peccauerant contra Regem. Neque hac strage contentus Saul Rex, iussit occidi omnes, qui habitabant Urbem, nomine Nobe, sacerdotalem. nec solùm sæuire contentus fuit in omnes viros, & feminas, sed etiam in paruulos, & lactentes; ac in ipsa etiam animantia, oues, boues, & asinos crudelitatem suam extendit. Ac de ista ipsa lingua dolosa, & iniqua Doeg Idumæi credibile est loquutum esse Dauidem in Psalmo, cuius partem iam exposuimus. Ex hoc exemplo apertè discimus, quantæ sint vires linguæ dolosæ, & iniquæ ad malum.

Alterum exēplum desumemus ex Euangelio apud Sanctum Mar-
Mar. 6. cum. Saltante filia Herodiadis co-
ram

Lib. I. Cap. XVI. 187

ram Herode Tetrarcha & principibus eius, usque adeo placuit Herodi ludus illius puellæ, ut coram omnibus iurauerit, se daturum, puellæ quicquid peteret, etiam si dimidium Regni sui. Hoc iuramentum stultum, & temerarium causa fuit plurimorum malorum. Primum enim Herodiadis filia à matre quæsiuit quid esset ei petendum; quæ illam admonuit, ut peteret caput Ioannis Baptistæ. hoc ipsum illa petijt: & mox allatum est caput præcursoris Domini, à corpore auulsum in disco. Quanta hic sunt mala? peccat mater grauissimè, petens rem iniustissimam. Peccauit non minus grauiter Tetrarcha Herodes, qui virum innocentissimum, qui que erat præcursor Domini, plusquam Propheeta; & quo maior inter natos mulierum non surrexerat, & quem Herodes ipse sciebat virum esse iustum, & sanctum, iussit occidi: & sine causa, sine iudicio, tempore solemnis cœnæ, ad petitionem
 puel-

138 De arte bene mor.

puellæ saltatricis. Sed audiamus mala pœnæ, cum iam audierimus mala culpæ. Herodes paulo post ab Imperatore Caio spoliatus principatu, in exilium perpetuum relegatus fuit. atque ita qui iurauerat se daturum dimidium Regni, totum Regnum cum exilio perpetuo commutauit, teste Iosepho in libro antiquitatum. Ipsa filia Herodiadis, quæ sua saltatio ne causa fuit mortis sancti Ioannis Baptistæ, traiiciens congelatum flumen, disrupta glacie, cecidit in profundum corpore toto, capite excepto, quod recisum à corpore supra glaciem saltitabat; vt omnes intelligerent, qua de causa tam miserè obiisset. Ipsa denique Herodias nimio dolore correpta, protinus mortem obiit, & filiam ad inferni tormenta sequuta est. Scripsit hanc tragediam Nicephorus Calistus in historia sua. En quot mala tum culpæ, tum pœnæ consequuta sunt ex iuramento stulto, & temerè concepto ab Herode

Li, 18. c. 2

Li, 1. c. 2.

rode Tetrarcha .

Veniamus ad remedium, quod à prudentibus viris adhiberi debet peccatis linguæ . Sanctus Prophetæ David initio Psalmi trigésimi octavi, indicat, quo remedio ipse vteretur: *Dixi, inquit, custodiam, vias meas, ut non delinquam in lingua mea.* hoc est, ego ut efugiam peccata linguæ, diligenter custodio vias meas; non enim loquor, neque cogito, neque ago aliquid, nisi præmissa dijudicatione eorum, quæ acturus, vel locuturus, vel cogitaturus sum. Istæ enim sunt viæ, per quas gradiuntur homines in hac vita . Itaque remedium contra verba noxia. nec solum contra verba noxia, sed etiam contra facta, vel concupita, vel cogitata noxia; est præcogitatio, vel præmeditatio eorum, quæ acturus, locuturus, cogitaturus, desideraturus sum . Atque hoc est hominis proprium, non temerè aliquid agerè, sed reflectere considerationem ad ea, quæ agen-

PL 8.

190 De arte bene mor.

agenda sunt. & si quidem cum re-
cta ratione concordant, agere; ;
sin minus, non agere. Et quod de
actione diximus, idem intelli-
get de locutione, desiderio, at-
que alijs animæ rationalis ope-
ribus.

Sed si fortè non possunt aliqui
præmeditari omnia, quæ acturi,
vel dicturi sunt: certè nullus esse
deberet homo prudens, & salutis
æternæ cupidus, qui non singulis
diebus primo mane antequam ne-
gocia vitæ huius aggrediatur, ad
Deum per orationem accedat, &
petat dirigi vias suas, facta sua,
verba sua, desideria sua, cogita-
tiones suas ad gloriam Dei, & sa-
lutem animæ suæ. Deinde com-
pleto die, antequam cubile suum
dormiturus ascendat, discutiat
conscientiam suam, & rationem
à se ipso petat, an Deum offende-
rit cogitatione, locutione, opere,
desiderio: & si offensionem aliquã
Dei, præsertim lethale inuenerit,
non audeat oculos claudere ad

no-

Lib.I.Cap.XVI. 191

nocturnam quietem captandam, nisi Deo primùm per veram pœnitentiam reconciliato, & vero, ac certo proposito concepto de custodiendis vijs suis, vt non delinquat in lingua sua, nec in operibus, aut appetitionibus suis. Atque hæc de custodia linguæ sufficiant.

Quod iam attinet ad sensum audiendi, pauca omnino dicenda restant. Si quidem lingua fræno rationis cohibita, ne in verba mala prorumpat, nihil ferè erit, quod sensum audiendi corrumpere possit. Quatuor sunt genera verborum, quibus maximè claudendum est ostium sensus audiendi, ne per aures ad cor inficiendum penetrent. Primum locum obtinent verba contra fidem, quæ ob curiositatem humanam non illibenter audiuntur; & tamen si intus penetrent, tollunt de corde fidem, quæ est radix, & principium omnium bonorum. Sed inter verba infidelitatis nulla sunt magis pern-

ni-

192 De arte bene mor.

nicioſa, quàm eorum, qui negant vel prouidentiam Dei, vel animi humani immortalitatem.

Iſta enim verba non tam hæreticos, quàm atheos faciunt, & omnibus ſcleribus aditum latiffimū aperiunt. Alterum genus verborum malorum poſitum eſt in detractiōibus, quæ charitatem fraternam tollunt è medio; & ſatis auidè audiuntur, ſed ab hominibus curioſis. Sanctus enim Dauid, qui erat homo ſecūdum cor Dei, dicit in pſalmis, *Detrahentem*

Pſ. 100. *ſecretò proximo ſuo, hunc perſequebar*. Et quoniam detractiōnes non rarò in conuiujs audiuntur, ſanctus Auguſtinus ad parietem menſæ ſuæ hos verſiculos poſuerat,

*Quiſquis amat dictis abſentium
rodere vitam,*

*Hanc menſam indignam no-
uerit eſſe ſibi.*

Id refert Poſſidius in vita ſancti Auguſtini. Tertium genus verborum malorum eſt, quod in adula-
tio-

Lib. I. Cap. XVI. 193

tionibus consistit . Adulationes enim libenter audiuntur, & tamen elationem, & superbiam gignunt. Superbia autem Regina vitiorum est, & Deo potissimum inimica .

Quartum genus verborum malorum pertinet ad luxuriam, & in sermonibus amatorijs, & canticis lasciujs positum est . Et ab amatoribus huius mundi nihil dulcius auditur, cum nihil sit ea voce nocentius . Similia enim sunt cantica lasciuia canticis sirenum, quæ homines delectabant, vt eos in mare deijcerent, & deuorarent .

Aduersus hæc omnia pericula salutare remediũ est, amicos probos habere, & ab improbis omni animi prouisione disiungi. Neque enim homines ignoti facile audent verba miscere detractoria, vel hæretica, vel assentatoria, vel lasciuia cum ijs, quos vel non viderunt antea, vel illis familiares non sunt . Itaque Salomon in principio Prouerbiorum instituens filiũ, primum præceptum illis verbis

194 De arte bene mor.

Preu. 1. expressit, *Audi fili mi disciplinam patris tui . si te laetauerint peccatores , ne acquiescas eis . si dixerint , veni nobiscum , insidiamur sanguini , abscondamus tendiculas contra insontem , deglutiamus eum sicut infernus uiuentem , & integrum tanquam descendentem in lacum : omnem pretiosam substantiam reperiemus , implebimus domos nostras spolijs : sortem mitte nobiscum , marsupium unum sit omnium nostrum ; fili mi , ne ambules cum eis . Ipsi contra sanguinem suum insidiantur , & molliuntur fraudes cōtra animas suas .* Hoc igitur consilium hominis sapientissimi facile potest remedium adhibere sensui audiendi , vt verbis malis non facile corrumpatur ; præsertim si addamus sententiam Domini , qui Salomone sapientior erat , & apertè pronunciauit ;

Matt. 10 Inimicos hominis esse domesticos eius . Atque hæc de sensu audiendi . Sensus tertius est odoratus , de quo nihil ferè dicendum occurrit .

Sen-

Lib. I. Cap. XVI. 195

Sensus enim olfaciendi versatur circa odores, qui nec magnam vim habent ad corrumpendum animum, & pretiosi odores ad paucos pertinent: communes autem, quales sunt odores florum, rosarum, liliorum, innoxij sunt.

Venio ad sensum quartum, qui dicitur sensus gustandi. Peccata, quæ per hanc portam ingrediuntur ad animam corrumpendam, generatim duo sunt, crapula, & ebrietas: sed ex istis plurima oriuntur. De crapula, & ebrietate habemus admonitionem Domini apud Lucam, *Videte ne grauentur corda vestra crapula, & ebrietate.* Et aliam admonitionem Apostoli in epistola ad Romanos, *Non in commessationibus, & ebrietatibus.* Ista vero duo peccata in scripturis sanctis cum lethalibus criminibus numerantur, dicente Apostolo Paulo in epistola ad Galatas, *Manifesta sunt opera carnis, quæ sunt, fornicatio, immunditia, impudicitia, idolorum ser-*

Luc. 21

Rom. 17

Gal. 5.

196 De arte bene mor.

uitus, veneficia, homicidia, ebrietates, commestationes, & his similia, quae praedixi vobis, sicut praedico; quoniam qui talia agunt, Regnum Dei non possidebunt.

Neque sola haec est horum peccatorum poena, sed praeterea crapula, & ebrietas grauant corda humana, vt ad res diuinas cogitandas, & procurandas assurgere non valeant. Id quod Saluator noster docuit, & sanctus Basilius in oratione de ieiunio explicat duabus aptissimis similitudinibus; prior est de Sole, & vaporibus. Quemadmodum enim crassi illi vapores, qui de locis humidis ascendunt, caelum nubibus obducunt, & radios Solis, ne ad nos penetrent, impediunt: sic etiam ex crapula, & ebrietate fumi quidam, & quasi vapores in nobis excitantur, qui caelum rationis obscurant, & radios diuini luminis nobis eripiunt. Altera similitudo a fumo, & apibus ducitur. Sicut enim apes mellis procreatrices ex aluearibus suis

ex-

expelluntur fumo: sic etiam sapientia Dei, quæ tanquam apis quædam in animis nostris mel virtutum, & gratiæ, & consolationum cælestium gignere solet; nulla re alia facilius, quàm fumo crapulæ & ebrietatis eijcitur.

Ad hæc accedit, quòd crapula, & ebrietas nocet corporis bonæ valetudini. Antiphanes medicus peritissimus, vt Clemens Alexandrinus in libro secundo Pedagogi refert, vnã esse causam penè omnium morborum assererat, ciborum multitudinem, & varietatem: contra verò sanctus Basilius concione prima de ieiunio, parentem bonæ valetudinis, abstinentiã appellandam esse censuit. Et passim medici omnes ad sanitatem, restituendam corporibus malè affectis in ediam adhibent, & vini, & carniũ abstinentiam imperant. Adde ad hæc, crapulam, & ebrietatem, non soli corpori, & animæ incolumitati, sed etiam rei familiaris plurimũ obesse. Multos

198 De arte bene mor.

crapula, & ebrietas ex diuitibus pauperes, ex dominis seruos effecit. Denique crapula, & ebrietas multos pauperes & mendicos, diuitum eleemosynis, priuant. Qui enim sobrio cibo, & potu contenti non sunt, omnem substantiam suam in proprias voluptates facile consumunt, vt nihil pro fratribus egenis superfit. Et impletur

1. Cor. 11 illud Apostoli, *Alius quidem esurit, alius autem ebrius est.*

Sed his omissis, ad remedia veniamus. Remedium aduersus crapulam, & ebrietatem esse potest exemplum omnium Sanctorum. Omitto Heremitas, & Monachos sanctos, de quibus scribit sanctus Hieronymus in epistola ad Eustochium de custodia virginitatis, apud eos coctum aliquid comedisse luxuria erat. Omitto sanctum Ambrosium, qui teste Paulino in eius vita, omnibus diebus ieiunabat, exceptis festis solemnibus, & Dominicis. Omitto sanctum Augustinum, qui teste Possidio

Lib. I. Cap. XIV. 199

dio in eius vita, in mensa sua legumina, & herbas habebat, & aliquando carnes propter hospites, vel infirmos. Omitto alios Sanctos. Si quis attentè consideret, quid ipse Dominus omnium, & Pater omnium egerit, cùm in deserto populum suum pascendi munus sibi ipse suscepit; artem sobrietatis admirabiliter sine dubitatione perdiscet. Nam ad annos quadraginta Deus solus potens, solus sapiens, & solus bonus, qui potuit, & sciuit, & voluit populo suo dilecto quàm optimè providere; pluit illis manna de cælo, & ex petra aquas eduxit. Erat autem manna cibus non dissimilis placentæ, ex farina & melle confectæ, vt in libro Exodi dicitur. En quàm sobriè sapientissimus Dominus populum suum prandere, & cœnare voluit. Placenta cibus, aqua potus erat; & tamen omnes incolumes, & sani viuebant, donec carniū desiderio teneri inciperent.

Exo. 16.

200 De arte bene mor.

- Ad exemplum Patris, filius Dei
Christus I E S V S , in quo erant
omnes thesauri sapientiæ, & scientiæ Dei, cum prandium simul & cęnam multis millibus auditorũ suorum parare vellet; apposuit illis panis, & piscium fragmęta, & potum aquę. Neq; solũ Dominus Christus, cum adhuc mortalis esset, tanta sobrietate auditoribus suis cõuiuium parauit; sed etiam post resurrectionẽ cum *data illi esset omnis potestas in celo, & in terra,* discipulis suis prandium dedit ad litus maris ex solo pane , & pisce , eoque modico: neque vini, aut rerum aliarum vlla fit mentio. O quãm longẽ distant consilia Dei à consilijs hominum . Rex cęli, & terrę simplicitate gaudet, sobrietate delectatur ; de anima locupletanda , replenda , exhilaranda in primis sollicitus est : sed homines malunt concupiscentiã suam , & Diabolum hostem suum exaudire , quãm Deum: nisi cum Apostolo dicamus, Deum carnalium ho-

hominum, non alium esse, quam ventrem.

Restat sensus tangendi, qui omnium crassissimus est, & simul etiã omnium viuacissimus. Per hunc sensum ingrediuntur ad animum inquinandum, & simul ad alios homines corrumpendos, opera carnis, quæ beatus Apostolus enumerat dicens, *Manifesta sunt opera carnis, quæ sunt, fornicatio, immunditia, impudicitia.* Gal. 5.

Itaque tribus vocibus omnia genera luxurię Apostolus designauit. Neque opus est longius progredi in his rebus explicãdis, quas oporteret potius apud fideles ignorari, & ne nomina quidem earum vnquam audiri. Sic enim loquitur idem Apostolus scribens ad Ephesios, *Fornicatio autem, & omnis immunditia nec nominetur in vobis, sicut decet sanctos.* Ephes. 5.

Remedia verò aduersus hæc omnia scelera, hæc mihi occurrunt: & sunt ferè illa ipsa, quibus vtuntur medici ad curandos ægros!

202 De arte bene mōr.

Primum enim incipiunt medici à ieiunio, siue abſtinentia; prohibent ægrotare incipientibus carnis edulium, & potum vini. Idem omnino fieri debet ab homine luxuriæ dedito, abſtinere à nimio cibo, & à nimio potu. Id præſcripſit

1. Tim. 5 inquit, *modico vino propter ſtomachum, & frequentes tuas infirmitates*: id eſt, *utere vino*, propter ſtomachi debilitatem; ſed *modico* ad cauendam luxuriam,

Ephes 5 nam in vino eſt luxuria. Deinde medici corporum potiones amaras, venæ incifionem, & alia id genus naturæ inimica adhibent. Sic viri ſancti cum Apoſtolo dicebant,

1. Cor. 9 *Caſtigo corpus meum, & in ſeruitutem redigo; ne cum alijs prædicauero, ipſe reprobus efficiar.*

Hinc veteres Heremita, & Cœnobia viuendi genus inſtituerunt, delicijs carnis, & voluptatibus omnino contrarium, in ieiunijs, vigilijs, humicubationibus, flagellis, cilicijs, non odio corporis, ſed

odio

Lib. I. Cap. XVI. 203

odio luxuriantis carnis . Vnum
 de multis exemplum proferam .
 Sanctus Hilarion, sancto Hierony-
 mo teste in eius vita , cum libidi-
 nosis cogitationibus tentaretur ,
Ego , inquit , corpus alloquens
 suum , *faciam ut non calcitres ,*
nec te hordeo aliam , sed paleis : fa-
me te conficiam , & siti , gravi
onerabo pondere ; per aestus inda-
gabo & frigora , ut cibum po-
tius , quam lasciuiam cogites . Ad
 hæc , medici corporum exercita-
 tionem moderatam , vt deam-
 bulationem , vel pilæ ludum , vel
 aliquid eiusmodi ad sanitatem
 conseruandam præscribunt . Id
 ipsum ad animæ sanitatem con-
 seruandam valdè conducit , si vi-
 delicet homo salutis æternæ cupi-
 dus horam aliquam quotidie in
 mysterijs redemptionis nostræ ,
 vel in quatuor nouissimis , vel in
 alijs pijs argumentis meditandis ,
 tribuat . Quod si meditatio non
 succedit ad votum : saltem in scri-
 pturis sanctis , vel in pijs libellis ,

204 De arte bene mor.


vel in vitis sanctorum legendis tempus aliquod diebus singulis ponat.

Denique remedium efficax valde ad omnes carnis tentationes, & peccata luxuriae superanda, est ocium fugere. Nullus enim tam est obnoxius turpibus cogitationibus, quam is, qui nihil habet quod agat, & tempus suum terit, vel ex fenestra respiciens ambulantes, vel cum amicis fabulando & ludendo. Contra verò, nulli sunt magis immunes à cogitationibus sordidis, quam ij, qui totos dies in laboribus agrorum colendorum, vel in varijs exercendis artibus occupantur. Huius rei gratia magister noster Christus, parentes elegit pauperes, vt proprio labore victum sibi pararent. & ipse quoque antequam ad labores praedicationis accederet, patrem putatium, fabrum lignarium habere voluit; eumque in arte illa laborantem adiuuit. dicebant enim de illo, *nonne hic est faber filius Mariae?* Hoc addere volui,

vt

Lib.I.Cap.XVI. 205

vt opifices , & rusticos non poeniteat sortis suæ , cùm sortem illam elegerit sapientia Dei pro se , & pro matre sua , & pro sanctissimo patre suo putatitio ; non quòd ipsi hoc remedio indigerent : sed vt nos infirmos admonerent , ocium fugere , si peccata plurima vitare velimus .



DE


DE ARTE

BENE

MORIENDI


Vicinia iam morte.

LIBER SECVNDVS.



CAPVT I.

De primo præcepto artis bene moriendi, vicina iam morte, quod est de meditatione mortis.



RT EM bene moriendi in duas partes initio distribuimus. In earum priore posita sunt præcepta bene moriendi, quæ ad illud tempus perti-

ti-

tinere poterant, in quo mors adhuc longius abesse videri poterat: in posteriore, quæ nunc præ manibus est, ea ponemus, quæ ad mortem, quasi præsentem, aut breui adfuturam pertinent. Dicitur autem mors imminere, vel præ foribus esse, quando vel senio confecti sumus, dicente Apostolo, *Quod antiquatur & senescit, prope interitum est.* vel morbus grauis, & medicorum iudicio valde periculosus, siue senem, siue iuuenem, siue etiam adolescentem, aut puerum corripuit. Huius secundi ordinis primum præceptum nobis esse videtur, mortis meditatio. Mors enim, quantumuis diligenter, & attentè consideretur, dum in florenti ætate sumus, parum omnino nos mouet; cum longè abesse, ac per hoc, minus horribilis esse videatur. Sed cum propè adesse conspicitur, vt quasi manibus tangatur; tunc verè afficit, & illius consideratio multum prodest. Omnes artes melius ad-

di-

Heb. 12.

208 De arte benemor.

discuntur exercitatione, quam doctrina; & qui, si non sapius, saltem bis mortui sunt, vt Beata Christina, & ille Drithelmus Anglus, cuius memini in libro de Gemitu Columbæ, & ille Eremita, cuius historiam narrat Ioannes Climacus, de quo nos in extremo capite pauca dicemus; satis alacriter mortuos fuisse constat. Nobis, quibus non nisi semel mori permittitur, nulla via melior aperitur, quam meditando, & cogitando quid in morte geratur.

Primum igitur cogitandum nobis est, in morte fieri separationem animi à corpore, sed neque animum extinguere, neque corpus sine spe resurgendi cadere, & in puluerem redigi. Si enim hoc fieret, vt athei opinantur; rectè dixisse viderentur illi qui mortem contemnebant, atque dicebant, *Edamus, & bibamus, cras enim moriemur*. quod prouerbum est antiquissimum, vt intelligi potest ex

• Isaia capite vigesimo secundo, &

Apo-

Apostolo in priore ad Corinthios capite quinto decimo. Esse autem inter nos, qui dicant se credere, factis autem negent; ex eo potest intelligi, quòd nonnulli etiam in extremo senio de morte non cogitant; perinde ac si vel nunquam essent morituri, vel cum morte corporis animum quoque penitus extingui existimarent. Sed quicquid isti delirent, separatio carnis ab animo, quasi sponsæ à sponso, diuortium est ad tempus, non repudium in perpetuum: animus enim immortalis est, & caro in nouissimo die sine vlla dubitatione resurget.

Oportet igitur, si christiani sumus, & si quid sapimus, de propinqua morte assiduè cogitare. In hoc enim summa rerum nostrarum posita est, vt bene moriamur; siquidem in hac vita non difficilis transitus est à virtute ad vitium, & cum Dei gratia, à vitio ad virtutem: potest enim qui nunc est hæres regni cœlorum, cras per
pec-

210 De arte bene mor.

peccatum excidere ab hæreditate filiorum Dei , & fieri reus ignis æterni; & contra, Dei gratia aspirante, qui est mancipium Diaboli, potest ab illa seruitute liberari, & iterum adscribi inter filios Dei, & hæredes regni cælestis. At qui moritur inimicus Dei , & reus ignis æterni; semper erit inimicus Dei, & igni æterno addictus : & contra , qui moritur amicus Dei , & hæres regni cælorum, nunquam ab illa gratia, & gloria eminentissima poterit excidere . Itaque nostra omnis felicitas, vel infelicitas, à bona, vel mala morte dependet. Quis igitur nisi planè stultus , & omni iudicio carens , audebit de hac vita per mortem discedere , nisi antea, omni diligentia adhibita, bene mori didicerit, atque ad bonam mortem obeundam se comparauerit ?

Altera consideratio circa mortem vtilissima esse potest, quòd quamuis mors certissima sit, dicente

ps. 88. *Propheta , Quis est homo, qui viuit,*

Lib. II. Cap. I. 211

uit, & non videbit mortem? & Apostolo concinente, *Statutum est hominibus semel mori*; & post hoc, *iudicium*: tamen nihil est incertius die, vel hora. Id quod Scriptura ipsa clamat, *Vigilate, quia nescitis diem, neque horam*. multi rapiuntur in infantia; alij contra ad decrepitam perueniunt senectutem, alij adolescentes, alij in ætate matura moriuntur. Sed quod miserabilius est, multi repente moriuntur, vt non sit illis ocium Deum inuocandi, & spiritum suum diuinæ misericordiæ commendandi. Hæc verò, non alia de causa diuina prouidentia secundum thesaurum sapientiæ suæ procurat, nisi vt nemo electorum audeat vel ad momentum in luto peccati lethalis hærere. Proinde qui hæc legis, si fortè conscientia peccati mortalis contra te testimonium dicat; non audeas diem crastinum expectare, immò neque præsentis diei, vel horæ finem præstolari; quin saltem corde contri-

Heb 9.

Mat. 25.

212 De arte bene mor.

trito & humiliato coram Deo, peccatum tuum detesteris.

Tertia consideratio, non minus utilis erit, si manè antequàm ad negocia diurna progrediaris; & vespere antequàm ad somnum capiendum te componas, ne fortè mors adueniens te imparatum offendat; conscientiam tuam diligenter discutias, an quid nocte præterita, vel die proximè exacto egeris, quod peccatum, præsertim lethale videri possit: & si nihil inuenias, Deo bonorum omnium auctori gratias agas; sin autem inuenieris aliquid aduersus Deum admissum, seriò & ex corde ingemiscas, & primo quoque tempore ad pedes Sacerdotis illud confitearis: & impositam mulctam libenter accipias, & fideliter reddas. Ista ratio, bis saltem in die, examinandi conscientiam, mirificè iuuat, vt mors nunquam nos inueniat imparatos.

Quarta consideratio non minus utilis, quàm superiores, illa est,

est, cuius meminit Ecclesiasticus,

In omni opere tuo memorare no- Eccl. 7.
uissima tua, & in aeternum non

peccabis. Quo pacto enim pecca-

re poterit in vilo opere suo, qui

quicquid agit expendit ad trutinā

diuini iudicij, quod in morte fiet?

Hūc pertinet memorabile illud di-

ctum hominis bis mortui, cuius

meminit Ióannes Climacus in sua

scala, gradu sexto. Sic autem lo-

quitur, *Non omittam solitarij il-*

lius, qui in Choreb habitabat, re-

ferre historiam. Hic cū diu ne-

gigentissimè vixisset, nullamque

animæ suæ curam haberet, morbo

tandem comprehensus ad extrema

deductus est; cumque iam à corpo-

re perfectè migrasset, post vnā

horam in se ipsum redijt, orauit-

que nos omnes, vt inde protinus

abscederemus, & cellæ aditu lapi-

dibus obstructo, permansit intus

annis duodecim, nulli omnino

quicquam loquens, nec aliud quic-

quam præter panem, & aquam

degustans. Sedens autem ea tan-

tum,

214 De arte bene mor.

tum, quæ in excessu viderat, attonitus voluebat, atque in his adeo fixo erat cogitatu, ut nunquam vultum immutaret, sed semper sic attonitus perdurans vim lacrymarum feruentium tacitus profunderet. Cùm verò iam morti esset proximus, rupto, ac patefacto aditu, ingressi sumus; cùmque ab illo doctrine verbum supplices inquireremus; hoc ab illo tantummodò audiuius, Nemo, qui re vera mortis memoriam agnouerit, peccare unquam poterit. hæc ille. Consideret lector, hanc, historiam esse non fabulam, & ab illo scriptã, qui & vir sanctus erat; & scripsit, quæ proprijs oculis vidit, & proprijs auribus audiuit.

Ex quo facillè est intelligere, quanti momenti sit mortem assidue meditari, & eius præsentiam nunquam à memoria sua repellere. Hic enim negligens antea fuerat in salute sua quærenda; sed ex magna Dei misericordia mortem gustauit, & resurgens à mortuis,

Lib. II. Cap. I. 215

tuis, per annos duodecim, mortem assidue cogitavit, & simul lacrymis continuè peccata sua defleuit. Et quæ ante primam mortem leuia, & venialia arbitrabatur, gustata mortis amaritudine, iudicauit esse grauissima, & digna, quæ lacrymis annorum duodecim expiarentur. Hic est igitur verus commentarius verborum scripturæ, quæ dicit, *Memorare nouissima tua, & in æternum non peccabis.* Eccl. 7. Et si perpetua recordatio vnius ex nouissimis, tam grande lucrum attulit monacho illi, vt per poenitentiam annorum duodecim redemerit poenam gehennæ sempiternam, & lucratus fuerit gloriam regni perpetui: quid faceret iugis memoria nouissimorum quatuor, mortis, iudicij, gehennæ, & paradisi? Utinam multi cognoscerent, & experiri vellent compendium lucri huius.

C A P.

CAP. II.

De secundo præcepto artis
bene moriendi, vicina
iam morte, quod est de
Iudicio extremo.

ALTERVM nouissimum est
iudicium, quod quidem
duplex est, vnum particulare,
quo singulæ animæ iudicantur sta-
tim, ac de corpore exierunt: al-
terum generale, quod fiet in no-
uissimo die: vtrumque horribile,
& tremendum valde impijs; ama-
bile, & gloriosum iustis. de vtro-
que attentè, & sæpissimè cogita-
re vtilissimum est ijs, qui feliciter
mori cupiunt. Futurum autem
iudicium particulare statim à mor-
te vniuscuiusque; nemini dubita-
re licet; cum aduersus hæreticos
in Concilio Florétino declaratum
sit, eos qui peccato mortali inqui-
nati

nati ex hac vita decedunt, mox ad gehennam ignis descendere; eos qui sine culpa lethali, sed cum debito poenae temporalis moriuntur, ad purgatorium duci; illos denique, qui post susceptum baptisma immunes à culpa, & debito poenae inveniuntur, in caelum ad aeternam felicitatem repente conscendere.

Credibile autem est, ut Theologi docent, sententiam Christi iudicis, vel per Angelos significari, vel mentibus ipsarum animarum à Deo reuelari; sed pias animas comitantibus Angelis, vel ad caelum ascendere, vel ad purgatorium descendere; reproborum vero à daemonebus rapi, & in gehennam deturbari. Hoc iudicium in momento fieri potest, quia praesens adest Iudex, qui cum sit Deus, & homo, secundum formam Dei ubique est; secundum formam hominis omnia nouit. Verissime enim sanctus Petrus Christo dixit, *Domine tu omnia nosti.* Adest

S. Tho. in 4. d. 47. Dominicus à Soto in 4. d. 45.

Io. 21.

K

accu-

218 De arte bene mor.

accusator, qui est Diabolus, qui
Apoc. 12 dicitur in Apocalypsi, *Accusator*
fratrum nostrorum; & accurrat ad
moribundos, ut lupus, vel leo,
vel canis ad prædam. Adest te-
stis, conscientia animæ, quæ cum
à corpore soluta est, non amplius
falli potest ignorantia, vel obli-
uione; sed penitus se ipsa cogno-
scit, & videt, an sit grata Deo,
vel Deo exosa. Itaque nihil im-
pedit, quo minus iudicium hoc sta-
tim fiat, & executioni mandetur.
Hoc tamen iudicium priuatum,
dici potest, si conferatur cum iu-
dicio, quod fiet in die nouissimo;
quod erit publicum & generale,
coram omnibus omnino Angelis,
& hominibus.

Sed reddenda est breuiter na-
tio, cur necesse sit iterum iudi-
cari eos, qui sunt iam non solùm
iudicati, sed etiam pœna, vel præ-
mio affecti. Rationes hæc sunt.
Prima ratio est ex parte Dei: nunc
enim non desunt, qui videntes mul-
tos homines iustos ab impijs non
pau-

paucioribus iniuste affligi; & contra, multos iniquos affluere temporalibus bonis; suspicantur, Deum aut ista non videre, aut non curare. Quare ut totum genus humanum intelligat, mundum à Deo sapientissime gubernari; placuit ipsi Deo in die nouissimo coram omnibus Angelis, & hominibus reddere premia bonis, & supplicia malis: vnde omnes cogantur predicare, & dicere, *Iustus es Domine, vera & iusta iudicia tua.* Apoc. 16

Altera ratio est, ut Christus, qui coram hominibus iniuste iudicatus, & supplicio grauissimo, & indignissimo affectus est; ipse coram toto mundo cernatur in throno sublimi omnes impios iudicare: ut illud impleatur quod scriptum est in libro Iob, *Causa tua quasi impij iudicata est, causam iudiciumq. recipies.* Iob 36. Itaque ignominia passionis filij Dei, iuste compensabitur per gloriam iudicantis in teatro totius mundi: &

220 De arte bene mor.

Phil. 2. tunc implebitur illud Apostoli, *In nomine IESU omne genu flectatur, caelestium, terrestrium, & infernorum.*

Tertia ratio est, ut retributio iustorum integra sit. Merces enim iustitiæ est honor, & gloria. Et quoniam multi homines eximiè iusti, quasi scelesti & impij publicè interfecti sunt; æquum fuit, ut in publico totius orbis teatro iustitia ipsorum prædicaretur. Ad hunc numerum sanctorum Martyres Domini præcipuè pertinent, qui in oculis persecutorum paganorum, vel hæreticorum, Principum, & Regum coronati assistent.

Quarta ratio erit ad confusionem hypocritarum. Non enim defunt, qui cum opinione sanctitatis moriantur, cum verè sint impij; quales sunt hæretici Calviniani, vel Anabaptistæ; & olim erant illi, de quibus scribit sanctus Cyprianus in libro de unitate Ecclesiæ, *Ardeant licet flammis, & ignibus traditi, vel obiecti*

Eti bestijs animas suas ponant; nõ erit illa fidei corona, sed pœna perfidiæ; nec religiosæ virtutis exitus gloriosus, sed desperationis interitus. Itaque necesse est, vt saltem in vniuersali iudicio eorum hypocrisis publicè detegatur.

Quinta ratio illa est, vt animæ simul & corpora iudicentur. Si quidem in iudicio particulari solæ animæ iudicantur, & præmium, vel pœnam accipiunt: sed in iudicio vniuersali integri homines comparebunt. Et quoniam animæ cum corporibus peccauerunt, vel bene egerunt; sic etiam oportet, vt post resurrectionem, animæ cum corporibus præmia, vel pœnas accipiant.

Sexta denique, ac postrema ratio est, vt non solum bona, vel mala, quæ gessimus in vita, præmia, vel pœnas suas habeant; sed etiam bona, vel mala, quæ nascuntur ex operibus bonis, vel malis nostris, & propagantur vsque ad mundi consummationem; in mundi con-

222 De arte bene mor.

summatione laudem, aut vituperationem publicè fortiantur.

Ac vt exemplis rem illustremus, non desunt homines pij, qui xenodochijs extractis, aut monasterijs, aut gymnasijs, in quibus multi vel conualescunt, vel instituuntur ad pietatem, vel erudiuntur in disciplinis; & hæc opera perseuerant in longum tempus: alij scribunt libros vtiles ad sapientiam, vel ad varias artes, vel pietatem, & alia bona opera propaganda: quibus multi singulis ætatibus proficiunt, & adiuuant proximos suos: nec desunt homines improbi, qui scriptis libris lasciuis, vel seditiosis, vel etiam hæreticis, multos homines perdūt; & extractis theatris ad ludos gladiatorum, vel ad comedias obscænas, vel alio modo proximis nocent in longum tempus post obitum suum. Quoniam igitur in fine mundi processus omnes finem accipient, & merita omnium hominum siue bona, siue mala consummabuntur; æquū erit,

erit, vt eo die omnium, qui fluxerunt ab initio mundi, maximè memorabili, Iudicis supremi potentissimi, atque iustissimi sententia proferatur.

Hæ sunt igitur causæ, cur præter iudicium particulare, quod fiet in morte singulorum, expectandum sit iudicium vniuersale in consummatione sæculi. Explicandum igitur breuiter est, quis sit futurus Iudex in hoc tremendo iudicio; vnde veniet; ad quem locum veniet; quos iudicabit; & quæ erit sententia iudicantis. Iudex erit sine vlla dubitatione Dominus noster I E S V S Christus. ipse enim apud sanctum Matthæum sic loquitur. *Cùm venerit Filius* Matt. 25
hominis in maiestate sua, & omnes Angeli eius cum eo; tunc sedebit super sedem maiestatis sue, & congregabuntur ante eum omnes gentes, & quæ sequuntur. Idem confirmant Apostoli Petrus, Paulus, & Ioannes. Petrus in Actis Apostolorum ait, *Ipsè est,* Act. 10.

222 De arte bene mor.

summatione laudem, aut vituperationem publicè fortiantur.

Ac ut exemplis rem illustremus, non desunt homines pij, qui xenodochijs extractis, aut monasterijs, aut gymnasijs, in quibus multi vel conualescunt, vel instituuntur ad pietatem, vel erudiuntur in disciplinis; & hæc opera perseuerant in longum tempus: alij scribunt libros vtiles ad sapientiam, vel ad varias artes, vel pietatem, & alia bona opera propaganda: quibus multi singulis ætatibus proficiunt, & adiuuant proximos suos: nec desunt homines improbi, qui scriptis libris lasciuis, vel seditiosis, vel etiam hæreticis, multos homines perdūt; & extractis theatris ad ludos gladiatorum, vel ad comedias obscænas, vel alio modo proximis nocent in longum tempus post obitum suum. Quoniam igitur in fine mundi processus omnes finem accipient, & merita omnium hominum siue bona, siue mala consummabuntur; æquū erit,

erit, vt eo die omnium, qui fluxerunt ab initio mundi, maximè memorabili, Iudicis supremi potentissimi, atque iustissimi sententia proferatur.

Hæ sunt igitur causæ, cur præter iudicium particulare, quod fiet in morte singulorum, expectandum sit iudicium vniuersale, in consummatione sæculi. Explicandum igitur breuiter est, quis sit futurus Iudex in hoc tremendo iudicio; vnde veniet; ad quem locum veniet; quos iudicabit; & quæ erit sententia iudicantis. Iudex erit sine vlla dubitatione Dominus noster I E S V S Christus. ipse enim apud sanctum Matthæum sic loquitur. *Cum venerit Filius* Matt. 25
hominis in maiestate sua, & omnes Angeli eius cum eo; tunc sedebit super sedem maiestatis sue, & congregabuntur ante eum omnes gentes, & quæ sequuntur. Idem confirmant Apostoli Petrus, Paulus, & Ioannes. Petrus in Actis Apostolorum ait, *Ipse est,* Act. 10.

224 De arte bene mor.

*qui constitutus est Iudex viuo-
rum, & mortuorum.* Apostolus

Act. 17. Paulus in iisdem Actis, *Deus, in-
quit, statuit diem, in quo iudi-
caturus est orbem in equitate, in
viro, in quo statuit, suscitans
eum à mortuis.* Apostolus Ioan-

Io. 5. *nes in Euangelio sic loquitur, De-
dit ei potestatem iudicium facere,
quia filius hominis est. & in eo-
dem loco, Pater non iudicat quem-
quam, sed omne iudiciū dedit filio.*

Veniet autem ad iudicandum
de cælo, & veniet vsque ad aerem
terræ vicinum, vt videri, & audi-
ri possit ab omnibus qui in terra
erunt. Audi Christum ipsum apud

Mat. 26. Matthæum, *Videbitis Filium ho-
minis venientem in nubibus cæli.*

Audi Apostolum Paulum scriben-
tem ad Thessalonicenses, *Rapie-
mur, inquit, cum illis, obuiam
Christo in aera.* & hoc ipsum

Ioel. 3. prædixerat Ioel Propheta, *Con-
gregabo omnes gentes, & dedu-
cam eos in Vallem Iosaphat, &
ibi disceptabo cum eis.* Ex verbis

autem

autem illis, *in Vallem Iosaphat*, rectè intelligitur eo loco futurum esse iudicium omnium maximum; tum quia vox hebraica, Iosaphat, propriè significat, Dei iudicium, tum quia, Vallis Iosaphat, est prope Ierusalem, ad partem Orientalem Templi, vt sanctus Hieronymus testatur in Commentario capitis tertij Ioel. Quo loco nullus esse potest opportunior pro tanto iudicio. Inde enim, conspicitur Ierusalem, vbi Christus prædicauit, & iudicium vltimum futurum esse prædixit: inde etiam conspicitur mons Caluarix, vbi Christus idem pro redemptione generis humani cruci fuit affixus; & mons Oliueti, vnde victor mortis in cælum ascendit.

Ad eum igitur locum in nubibus cæli Christus veniet cum omnibus Angelis, qui sunt, vt minimum, *millia millium, & decies millies centena millia*, vt Daniel scribit. Dixi autem, vt minimum, quoniam sententia sancti Dionysij A-

Dan. 7.
Li de ce
lest hier.
rar.
par. 1 q.
50. ar. 3.

226 De arte bene mor.

reopagitæ, & sancti Thomæ est, numerum Angelorum sanctorum, superare numerum omnium rerum corporalium. Ibi etiam aderit cum Rege Christo omnis multitudo sanctorum hominum, in corporibus gloriosis, de quibus dicitur in Apocalypsi, *Vidi turbam magnam, quam dinumerare nemo poterat, ex omnibus gentibus, tribus, & linguis.*

Apoc. 7.

Erit igitur in hoc iudicio spectaculum, quale non fuit ab initio mundi, neque fiet. Porrò rei mortis æternæ erunt omnes impij, qui resumptis corporibus, nudi, & maesti, maestitia summa, & incredibili, astabunt in terra ab Angelis adducti ex toto orbe terrarum ad Vallem Iosaphat, & loca vicina. Numerus autem eorum erit longè maior numero sanctorum: cum Dominus ipse dixerit, *Multi sunt vocati, pauci electi; & arcta est via, quæ ducit ad vitam, & pauci inueniunt eam; lata est via, quæ ducit ad perditionem.*

Mat. 22.

Matt. 7.

tionem, & multi ingrediuntur per eam. Quod si verum est, ut est Apoc. 7. verissimum, multitudinem sanctorum hominum numerari non posse: quanto minus numerari poterit turba reproborum? His autem adiuncti erunt spiritus maligni, qui sunt etiam in numero maximo,

His ita constitutis antequam sententia Iudicis proferatur, libri rationum aperientur, ut ex Dan. 7. Apoc. 20 Daniele Propheta, & sancto Ioanne intelligi potest. Quid sint hi libri, qui in iudicio aperientur, explicat Apostolus Paulus ad Corinthios dicens, 1. Cor. 4 *Nolite ante tempus iudicare, quoad usque veniat Dominus, qui illuminabit abscondita tenebrarum, & manifestabit consilia cordium.* Effundet enim Deus eiusmodi lumen, ut in eo eernantur conscientiae omnium hominum impiorum. Videbunt igitur omnes, qui in eo theatro erunt conscientias omnium, ac per hoc opera, verba, cogitationes, ap-

228 De arte bene mor.

petitiones . O quale spectaculum erit, videre conscientias hypocritarum, mendacium, proditorum, cauillatorum; qui nihili faciebant, per omnia sacra, peierare . Ex hac publicatione scelerum, & flagitiorum omnium hominum, ex qua sequetur præiudicium futuræ sententiæ; id fiet, quod legitur in

Apoc. 6. *Apocalypsi, Reges terræ, & Principes, & Tribuni, & diuites, & fortes, & omnes serui, & liberi abscondent se in speluncis, & petris montium; & dicent montibus, & petris, cadite super nos, & abscondite nos à facie sedentis super thronum, & ab ira Agni; quoniam venit dies magnus ipsorum, & quis poterit stare? Et hoc idem prædixit Dominus in Euangelio, cùm crucem in humeris deferret, alloquens pias mulieres, *Filia Ierusalem, nolite flere super me, sed super vos, & filios vestros flete; quoniam ecce venient dies, in quibus dicent, Beata Steriles, & ventres, qui non ge-**

genuerunt, & ubera, quæ non
 lactauerunt. Tunc incipient di-
 cere montibus, cadite super nos;
 & collibus, operite nos. Ad extre-
 mum feretur sententia à Iudice
 dicente, *Venite benedicti, ite* Mat. 25.
maledicti. Et ibunt iusti in vitam
 æternam, & iniusti in ignem æter-
 num.

Obsecro ego nunc lectores meos,
 ut cogitent & recogitent sapè, &
 attentè, se quoque futuros in
 hoc theatro; & nunc cum tem-
 pus habent, seriò deliberent, quid
 facto opus sit. Neque obijciant,
 diem iudicij adhuc procul abesse,
 ut non sit opus ante tempus cru-
 ciari, quasi instet dies Domini:
 Nam si fortè distet iudicium ge-
 nerale; iudicium particulare non
 distat, sed instat, & planè præ-
 foribus est: & qualis erit senten-
 tia iudicij particularis, talis erit
 & generalis. Itaque quicumque sa-
 pit, debet omnino ita se compa-
 rare ad sententiam iudicij diuini
 audiendam, ac si hodie, vel cras au-
 dien-

230 De arte bene mor.

dienda esset. non enim magis distat hora iudicij, quam distet hora mortis; & hora mortis ab homine sene, vel graui morbo laborante procul abesse non potest, Ergo in expectatione tanti iudicij, in quo de summa rei agitur, oportet serio implorare aduocatū, qui idem Iudex futurus est. *Aduocatū enim habemus IESVM Christum iustum*, vt Apostolus Ioannes nos docet; & rursus amicos aduocati sollicitare, atque in primis Virginem clementissimam aduocati parentem, & Angelos, atque homines sanctos. Neque solum vocibus, sed etiam muneribus adire nos conuenit tum aduocatum, tum aduocati amicos: non enim recusant Sancti munera, quæ non illis profunt, sed pauperibus IESV Christi: ipsi enim beati in cælo, bonorum nostrorum non indigent.

CAP.

CAP. III.

De tertio præcepto artis bene moriendi, vicina iam morte, quod est de gehenna.

POST mortis, & iudicij considerationem expedit gehennæ quoque cruciatus, & paradisi gaudia attentissimè cogitare. Hæc enim sunt duo nouissima, quorum alterum vnicuique nostrum, Christo iudicante, continget; sed hæc duo sic inter se contraria sunt, vt vnum nos miserrimos, alterum felicissimos reddere debeat. Sed quoniam de vtroque scripsimus in libro de ascensione mentis in Deum, prope finem libri: & rursum de gaudijs paradisi scripsimus in toto libro de æterna felicitate Sanctorum: & de cruciatibus gehennæ in libro secundo de gemitu

232 De arte bene mor.

tu columbæ ; denique de omnibus quatuor nouissimis, in concionibus latinis, quæ nobis tunc in mentem venerunt & diximus ad populum, & scripta reliquimus: visum est hoc loco breuiter summa capita attingere; vt lector habeat, in qua re attentè cogitanda vtiliter exercere se possit, dum mortem expectat, atque ad eam cum gaudio suscipiendam se parat.

Igitur de statu infelicissimo dånatorum ad gehennã tria breuiter considerata suscepimus, locum, tempus, & modum; locus est, profunditas; tempus, æternitas; modus, pœna sine modo. Locus, inquam, est profunditas: siquidem homines reprobi, propter ingentia crimina læsæ maiestatis diuinæ, carcerem obtinebunt in profundissima parte mundi, quæ longissimè distat à Regia domo, quæ est in cælis: hoc enim decebat vt supplicio mulctaretur superbia, Diaboli, & hominum superbiorum.

Dia-

Diabolus enim dicebat, *Ascendam in cælum, super sydera exaltabo solium meum, similis ero Altissimo*: sed responsum est illi, *Ad infernum detraheris ad profundū lacu*. quod idem continget omnibus hominibus superbiæ filijs.

Ex hac autem prima ærumna reproborum sequentur tres aliæ, tenebræ, angustia, & egestas. Nam cum gehenna sit in centro terræ, ad quem locum radij Solis, & Lunæ, & Stellarum penetrare non possunt; nihil in ea luminis esse poterit, nisi quantum ex igne sulphureo exire poterit, qui augetur, non minuet pœnam. Videbunt enim eo lumine dæmones, hostes suos crudelissimos: videbunt quoque homines illos, siue amicos, siue cognatos, qui perditionis eorum causa fuerunt: videbunt denique suam nuditatem, suam mendicitatem, sua vincula, sua tormenta. Quæ omnia cuperent fortasse non videre: aliquid boni, vnde consolationem possent

234 De arte bene mor.

sent accipere, certè nō videbunt.
O tenebras non tenebras: tenebras, ad omnia bona occultanda, non tenebras ad omnia mala manifestanda.

Porro angustia in gehenna tantæ sunt, vt multitudinem corporum damnatorum vix capiant. Nam cum terra sit quasi punctum impartibile, si cum cæli immensitate comparetur; & gehenna non terram totam, neque partem dimidiam, sed centrum solummodo comprehendat, & numerus hominum damnatorum sit amplior, quàm numerus saluandorum, de quibus tamen legimus in Apocalypsi, *Vidi turbam magnam, quam dinumerare nemo poterat: Quis animo comprehendere poterit, quantæ sint angustia in gehenna? Eant nunc Reges magni, Nabuchodonosor, Darius, Alexander, Iulius Cæsar, & alij, quos terrarum orbis vix capere poterat; & dilatent, si possunt, angustias gehennæ, vt paulo commodius iaceant,*

Apoc. 5.

Lib. II. Cap. III. 235

ceant, & paulo mitius torqueantur. O vanitas vanitatum, extendere, & dilatare contendunt mortales ferè omnes agros suos, ditiones suas, Regna sua, vt ad breue tempus de subditorum multitudine gloriantur; & in mentem illis nunquam venit, quantæ illos in gehenna angustia maneat, vbi non ad tempus breue, sed sine vilo fine, velint nolint, habitare cogentur.

Iam verò quid de incredibili egestate perditorum hominum, dicam? Omnium rerum bonarum egeni, sola pœnarum abundantia diuites, sunt omnes illi, qui in inferis habitant. Memores quidem erunt in gehenna homines diuites, quantis delitijs abundauerint in terra dum viuerent; siue in cibo, & potu, siue in vestibus pretiosis, siue in venationibus, & aucupijs, siue in hortis, & vineis, siue in theatris, & ludis varijs. Sed hæc omnis recordatio dolorem augebit, cum se viderint in-

ge-

236 De arte bene mor.

gehenna nudos, iacentes, despectos, rebus, ac fortunis omnibus miserrimè spoliatos. tunc dicent, quod in libro Sapientiae legimus;

Sap. 5. *Quid nobis profuit superbia, aut diuitiarum iactantia quid contulit nobis? transierunt omnia illa, tanquam umbra.*

Veniamus ad secundum caput, quod est, tempus. Quamdiu durabit exilium gehennae? Utinam non diutius, quam duravit incolatus vitae praesentis: sed nulla erit comparatio: tempori enim non tempus, sed aeternitas succedet. Itaque tamdiu durabit habitatio impiorum in tormentis gehennae, quamdiu durabit aeternitas Dei, quae sicut principio caret, ita carebit & fine. Tamdiu torquebuntur damnati, quamdiu laetabuntur beati. Denique tamdiu reprobi morientur, quamdiu Deus ipse viuet. & nisi desinat esse Deus id quod est, non desinent reprobi esse in poenis, in quibus sunt. O vita mortifera, o mors immortalis. si vita

es,

Lib.II.Cap.III. 237

es, quomodo occidis? si mors es, quomodo duras? neque igitur mors, neque vita dicenda es, quoniam vtrumque horum boni aliquid habet, vita quietem, & mors finem: tu verò neque quietem, neque finem habes. Quid igitur te esse dicemus, nisi id totum mali, quod & vita, & mors habet? Magna profectò res esset, si vel mediocriter intelligere possemus, quid sit æternitas pœnarum. Hæc enim sola cogitatio, tanquam frænum quoddam, omnes hominum libidines coerceret; & ita nostram vitam temperaret, vt non christiani modo, sed etiam Anachoretæ sanctissimi omnes esse videremur.

Restat ex tribus rebus propositis, solus modus, quem esse diximus pœnam sine modo: Pœna enim gehennæ non est singularis aliqua pœna, sed pœnarum omnium cumulus: torquentur enim in gehenna omnes potentiæ animæ intelligentis, & omnes sensus
sue

238 De arte bene mor.

siue interni, siue externi; idque non per vices, sed omnes istæ pœnæ, tanquam agmine facto in hominem irruunt. Hic in terris sicut bonum generale beatorum, ita malum istud generale damnatorum nunquam experimur: nam qui oculis dolet, non simul dentibus dolet; & qui dentibus, non simul oculis: & sic de cæteris ad eundem modum. Sed apud inferos dolores atrocissimi in omnibus membris, vno tempore tolerandi sunt; cum ignis gehennæ totum corpus ambiat, & totum vehementissimè torqueat, & nunquam consumat. *Ite, inquit Iudex, in ignem æternum.* & Isaias, *Vermis eorum non moritur, & ignis non extinguitur.* quæ verba Dominus in Euangelio apud Marcum ter in eodem capite repetiuit, vt nobis planè in cordibus imprimeret, pœnam gehennæ esse ignem æterno tempore duraturum, & corpus totum dolore acerrimo, per omnem æternitatem

Mat. 25.

Isa. 66.

Mar. 9.

cru-

Lib. II. Cap. III. 239

crudelissimè vexaturum. Qui viderunt hominem iusto iudicio hic in terris igne cremari, vix potuerunt conspectum eiusmodi supplicij tolerare, cum tamen brevissimo tempore finiatur. Quòd si homo, quantumvis reus, ad integrum diem, in igne perseveraret; certè nullus ferre posset spectaculum tam horrendum. Dicat igitur intra se vnusquisque, si ferre non possum combustionem hominis viuentis, qui nihil ad me pertinet; quo modo ferre potero combustionem corporis mei ad vnam horam, vel diem, vel mensem, vel annum? & si hoc nimis mihi videtur horrendum, vt nec cogitare quidem id possim; qua stultitia ego ipse me tam grandi periculo expono, vt ardeam in æternum? Quòd si ista non credimus, vbi est fides nostra? si credimus, vbi est iudicium? vbi prudentia? si sanæ mentis sumus, & fidem Scripturis sanctis habemus: quo modo fieri potest, vt tam im-

ma-

240 De arte bene mor.

mani periculo imminente, non excitemur? Ingrediatur ergo in cor suum quicumque saluus esse cupit; & rebus omnibus attentissime consideratis, ita se gerat, ut mors eum paratum inueniat, & non eum gehennæ ignis excipiat, sed in gaudium Domini sui feliciter ingredi mereatur.

C A P. IV.

De quarto præcepto artis bene moriendi, viciniam morte, quod est de gloria beatorum.

RESTAT gloria Beatorum, quæ postremum locum inter nouissima tenet. De hoc nouissimo illa tria capita solum breuiter considerabo, quæ in superiori capite de gehennæ supplicijs considerauimus: locum, tempus, & modum. Locus gloriæ beatorum cæle-

Lib. II. Cap. IV. 241

lestis paradifus est ; tempus, æternitas, quæ finem nullum habet ; modus, felicitas excedens omnem modum .

Incipiamus à primo . Paradifi cælestis locus est altiffimus, fupra omnes montes terræ, fupra omnia elementa, fupra omnes ftellas. Inde enim in Scripturis sãctis dicitur Regnum cælorum, *domus Dei, ciuitas Regis magni, ciuitas Dei uiuentis, Ierufalem cælestis* .

Ex hoc fublimiffimo fitu ciuitatis cælestis, facile poffumus intelligere, multa effe priuilegia, fiue prærogatiuas huius loci præ omnibus locis mundi totius. Primum enim, quò locus in hac rerum vniuerfitate eft altior, eò quoque eft maior, atque capacior. Siquidem figura vniuerfitalis rerum creatarum rotunda effe cernitur, fic vt orbis terræ centrũ mundi teneat ; fupremum cælum extremam, fiue fupremam fpheram, latitudinis propemodum infinitæ complexa fuo contineat.

L

Lo-

242 De arte bene mor.

Locus igitur beatorum, ut est altissimus, sic etiam amplissimus est: quemadmodum è contrario locus perditorum, ut est omnium infimus, sic est omnium angustissimus. Deinde locus altissimus, est etiam locus purissimus: certè enim aqua purior est, quàm terra; & aer, quàm aqua; & ignis, quàm aer; & cælum, quàm ignis; & cælum empyreum, quàm cælum sydereum. Denique locus altissimus, tutissimus etiam est, ut nō possit ad eum locum accedere malum vllum, neque flagellum appropinquare tabernaculo eius. Primum igitur sedes beatorum est amplissima, ut possint beati homines de loco ad locum liberè cōmigrare, neque periculum erit, ne fortè fatigentur, cū ex dote agilitatis, momentò possint de loco ad locum pergere. Quanta erit illa voluptas, nunc ab oriente ad occidentem migrare, nunc ab austro ad aquilonem se transferre: nunc orbem totū momentò

cir-

Pl. 90.

Lib. II. Cap. IV. 243

circuire; dum perditī homines in gehēna ligatis manibus, & pedibus Mat. 22
 in omnem æternitatem vno in loco consistent? Sed maior adhuc felicitas erit hominum beatorum, dum aura illa purissima in cælo fruentur, quam neque tenebræ, neque caligines, neque vapores, neque ventorum flatus, neque pestis vlla inquinare poterit: dum vltra omnem modum miserabiles gehennæ incolæ tetra caligine, & fumo æstuantis fornacis, sine vlla spe auræ purioris, in loco illo horro-
 ris plenissimo iacere cogentur.

Quid iam de ciuitate superna dicam propter summam altitudinē ab omni proditione, vel malo quocumque tutissima? *Lauda Ierusalem Dominum*, inquit Sanctus Dauid; *Lauda Deum tuum Sion; quoniam confortauit seras portarum tuarum*. Hæc verò portarum munitio, non id significat, quod verba sonant; dicitur enim in Apocalypsi de ciuitate cælesti, *Et portæ eius non cludentur per* Apoc 21

L 2 diem.

244 De arte bene mor.

diem : nox enim non erit illic .
Itaque *confortauit* Deus *feras portarum* Ierusalem cælestis, quia fecit eam in expugnabilem, ob altitudinem suam . Et si Draco in cælo pugnavit cum Michaelè Archangelo, causa est, non quòd ex inferis in cælum conscenderit, sed quòd in cælo conditus, antequam confirmaretur in gratia, rebellauit à conditore suo; & in superbiam elatus æqualis esse tentauit Altissimo . Sed quia cælestis Ierusalem in pace fundata est, non potuit inimicus pacis in ea consistere, sed continuò *tanquam fulgur de cælo* cecidit : neque deinceps pedem in ea figere potuit : atque ab eo tempore nemo admittitur ad inhabitandam cælestem Ierusalem, nisi in pace perpetua fundatus, & solidissimè confirmatus, atque hæc de loco .

Luc. 10

Nunc de tempore pauca dicemus. Tempus habitandi cælestem Ierusalem, post Diaboli casum, est tempus sine tempore, id est duratio

Lib. I. Cap. XVI. 245

duratio perpetua sine fluxu dierū,
& noctium. sic enim in Apoca-
lypsi iuravit Angelus *per uiuen-* Apoc. 10
tem in secula seculorum, quia
tempus non erit amplius. & Do-
minus in euangelio, completo die
nouissimo dicet, *Sic ibunt hi, vide-* Mat. 22.
licet iniqui, in ignem aeternum;
iusti autem in vitam aeternam.

Hoc tantum erit discrimen, quòd
iniqui æternitatem inuiti patien-
tur, & quærent mortem, & non
inuenient: iusti autem nihil iucū-
dius audient, quàm beatam æter-
nitatem, idest, vitam sine timo-
re moriendi; & standi virtutem
sine timore cadendi.

Reliquum est, vt de modo, quo
se habebunt in paradiso post re-
surrectionem Beati, paucis expli-
cemus. Atque id vnum verissimè
dici posse censeo, omnia bona, quæ
in terris optantur, quamuis ad-
mixta malis plurimis, ea multo
maiora, & sine vlla admixtione
malorum possidenda esse à beatis
in cælo. Quæ in bonis numeran-

246 De arte bene mor.

tur in terris, hæc sunt, honor, potestas, diuitiæ, delitiæ. Honor in cælo hominum beatorum planè videri posset incredibilis, nisi is id affirmaret, qui mentiri non potest. Audi Dominum Christum,

Apoc. 3. Apocalypsi beati Ioannis. *Qui vicerit, dabo ei sedere mecum in throno meo, sicut ego vici, & sedi in throno Patris mei.* Quid obsecro ad hunc honorem addi potest? thronus certè filij Dei in cælo altissimus est, & qui in eo sedet, honorem planè incredibilem consecutus esse existimari potest. Quis plausus, quæ laudes resonabunt in cælo coram Deo, & omnibus Angelis, quando homo aliquis, quondam mortalis, & fragilis, Dei manibus collocabitur in throno filij Dei, qui est *Princeps Regum terre, & Rex Regum, ac Dominus Dominantium*? Certè ad hunc honorem nihil addi potest.

Potestas autem eiusdem hominis beati, tanta erit, quantam

su-

Lib. II. Cap. IV. 247

fuspitari vix possumus. Eiusdem Christi promissio est in Euangelio, de seruo fidei, *Amen dico vobis, quoniam super omnia bona sua constituet eum.* Quæ verba hoc planè significant, seruum fidelem in cælo fore participem potestatis, quam Deus habet super omnes res creatas. Et quanta est potestas Dei in res creatas omnino maxima, & incomparabilis. Itaque dicentur, & verissimè erunt Sancti omnes Reges mundi totius, non ad annos paucos, sed in omnem æternitatem. Atque hæc est sententia, quam Christus Iudex supremus in iudicio nouissimo pronuntiabit, cum dicet Iustis, *Venite benedicti Patris mei, possidete paratum vobis Regnum à constitutione mundi.*

De diuitijs beatorum hoc solum satis esse deberet omnibus hominibus, quòd erunt diuitiæ amplissimæ, & semper duraturæ, dicente Propheta, *Gloria, & diuitia in domo eius.* & *Erit Deus*

248 De arte bene mor.

omnia in omnibus, vt Apostolus
1. Cor. 13 loquitur in Epistola ad Corinth.
Quæ verba sic exponit Theophi-
lactus, & etiam sanctus Anselmus,
vt sensus sit, *Erit Deus omnia in
omnibus*; quia nunc res vna no-
bis est cibus, alia potus, alia ve-
stis, alia domus, alia diuitiæ, alia
voluptas, alia honor, alia pote-
stas: sed in cælo, post resurrectio-
nem, erit Deus beatis omnibus ci-
bus, potus, vestis, domus, diui-
tiæ, voluptas, honor, potestas.
Erunt igitur beatis in cælo omnia
pretiosa, omnia incorruptibilia,
omnia diuina. Addit sanctus Hie-
ronymus in Epistola ad Amandū,
Deum futurum omnibus beatis
omnia non solum corporalia, sed
etiam spiritualia; nunc enim gra-
tiæ diuinæ non dantur omnes om-
nibus; sed vni sapientia, vt Salo-
moni; alteri bonitas, vt Dauidi;
alteri patientia vt Iob; Cùm au-
tem rerum omnium finis aduene-
rit, tunc omnia in omnibus erunt,
vt singuli sanctorum omnes virtu-
tes,

tes, & dona possideant. Quid quæso daret in hoc mundo avarus, ut diuitias omnes omnium possideret? quid luxuriosus, ut voluptates, quas cupit, omnes consequeretur? quid ambitiosus, ut honores, & dignitates, quas ambit, omnes assequi posset? Et tamen ista temporalia sunt, & cito peritura; & quod miserabilius est, breui cum sempiterna egestate, & dolore, & ignominia commutanda. Cur ergo non quærimus Deum, in quo vno bona omnia spiritualia, & corporalia, in omnem æternitatem manfura possidebimus?

Sed quid tandem de gaudio, & voluptate beatorum dicemus? Isaias, & Paulus exclamant, & dicunt, *Oculus non vidit, auris non* Isa. 64
1. Cor. 2.
audiuit, in cor hominis non ascen-
derunt quæ preparauit Deus dili-
gentibus se. Verè enim parauit
Deus iustis diligentibus se in cele-
sti patria gaudium, lætitiã, vo-
luptatem, delicias, dulcedinem,

L 5 sua-

250 De arte bene mor.

suauitatem, qualem nullus mortali-
um neque gustauit, neque cogi-
tatione assequi vnquam potuit.
Tria requiruntur, vt delectatio ge-
neretur, potentia, obiectum, &
vniō potentiaē cum obiecto: &
quo ista maiora sunt, eo maior gi-
gnitur delectatio. Nulla potentia
in rebus creatis maior, & viua-
cior, & delectationis capacior
est rationali voluntate: nullum
obiectum præstantius, & amabi-
lius, & suauius est essentia creato-
ris. *Gustate*, inquit Dauid, &
*videte, quoniam suavis est Domi-
nus*. Et sapiens loquens de Sole,
& Stellis. *Quorum*, inquit, *si spe-
cie delectati, Deos putauerunt,*
*sciant quanto his dominator eorū
speciosior est. Speciei enim gene-
rator hæc omnia constituit.* Nul-
la coniunctio magis intima cogi-
tari potest, quam Dei cum volun-
tate rationali, dicente Apostolo.
*Qui adheret Deo, vnus spiritus
est.* Coniunctio corporum, vt
plurimum in superficie fieri solet,
ad

Pf. 33.

Sap. 13.

1. Cor. 6.

ad interiora non penetrat; & tamen sic afficit homines corporalis voluptas, ut ad insaniam quodam modo redigantur. Quam igitur suauitatem, quam dulcedinem gustabit anima, quando sic intimè coniungetur cum Deo, qui est suauitas infinita, ut vnus spiritus fiat cum eo? Hic mihi planè verba defunt, ut explicare nullo modo queam, quod cogitando mecum ipse reuoluo.

Adde, quòd omnis humana voluptas, quæ ex rebus creatis oritur, aut momentanea, aut certè breuissima est; voluptas autem, quæ ex coniunctione spiritus humani cum Deo, qui est suauitas infinita, nunquam omnino finietur. Et tamen tanta regnat in multis hominibus amèntia, ut malint frui carnalibus voluptatibus, sordidis, & modicis, & ad tempus breuissimum, quam maximis, & purissimis, & in omnem aternitatem sine vilo dubio duraturis. Atque hæc de

quatuor nouissimis hoc loco sufficientiant.

CAP. V.

De quinto præcepto artis bene moriendi, vicina iam morte, quod est de testamento condendo.

PRÆMISSA consideratione mortis appropinquantis, & aliorum nouissimorum; consequens est, vt qui discedere parat ex hoc mundo, disponat domum suam. Sic enim admonuit Isaias Ezechiam dicens, *Dispone domui tue, quia morieris tu, & non viues*. A qua molestia liberi sunt viri regulares, qui cum Apostolis dicere possunt, *Ecce nos reliquimus omnia*. Ex quibus fuit vnus sanctus Augustinus, de quo scribit Possidius in eius vita, *Testamentum, inquit, non fecit, quia*

vn-

unde faceret pauper Christi non habebat: Quamvis enim Episcopus esset, tamen more Regularium nihil proprium retinebat.

Porro testamentum fieri debet ad initium morbi, nisi quis prudenter anteverterit: & non leuiter errant, qui de testamento cōdendo non cogitant, nisi cū ægritudine inualecente à cognatis, vel amicis coguntur; quo tempore vel delirare incipiunt, vel certè res suas non ea prudentia disponunt, qua disposuissent, dum bene valebant.

Oportet autem, vt primum omnium de ære alieno, si quo fortè grauantur, restituendo cogitent. Deinde opes suas illis omnino relinquunt, ad quos de iure pertinere intelligent, neque sināt se trahi ad personas, quas magis diligunt, si quoquo modo repugnet iustitia. In ijs verò, quæ ab arbitrio dependent suo, consulant in primis gloriam Dei, deinde proximorum necessitates. Quòd si for-

254 De arte bene mor.

si fortè abundant diuitijs, quas, vti superuacaneas, pauperibus iã dudum distribuere debuissent; non existiment se conscientiã satisfecisse, si hoc ipsum cum alijs criminibus suis sacerdoti aperuerint, & absolutionem obtinuerint; nisi res illas pauperibus erogari mandauerint, vel ipsi potius continuo erogauerint. Est enim sententia, communis sanctorum Patrum, & præcipuorum Doctorum scholasticorum, res superuacaneas, pauperibus deberi. de qua re scripsimus in libro priore, capite nono, quæ repetenda non sunt. De ijs verò, quæ arbitrio suo donare poterunt, consulant viros pios, quæ sint opéra charitatis magis grata Deo, pro loco & tempore. Alicubi enim magis vrgebit ædificatio Ecclesiæ, vel Cœmeterij; alibi collocatio pauperularum virginum in matrimonio; alibi multitudo ægrotantium in xenodochio; vel pauperum mendicantium in plateis; alibi redemptio captiuorum.

De-

Denique in huiusmodi distributio-
ne nulla est regula melior, quam
*fides sincera, & prouidentia per-
spicax*, vt scribit Sanctus Ambro-
sius. *vel charitas cum prudentia,*
*& prudentia cum charitate con-
iuncta*, vt loquitur Sanctus Gre-
gorius.

Lib. 3. de
offic. c. 48
3. p. past.
admonit.
21.

Illud autem magni momenti ef-
fe videtur, vt eleemosynæ, quæ
fiunt à viuentibus, vel vt fiant man-
dantur à morientibus; tunc potif-
simum aut fiant, aut mandentur,
vt fiant, quando id, qui facit, vel
mandat, est gratus Deo; tunc enim
meritum magnum conciliant lar-
gienti; & eiusmodi boni eleemo-
synarij recipiuntur à bonis amicis
in æterna tabernacula, iuxta pro-
missionem Christi apud Lucam.
Si verò fiant, aut mandentur,
vt fiant, ab homine impio; tunc
eleemosynæ non profunt ad vitam
æternam, quicquid sit de alijs me-
ritis; neque efficiunt, vt largito-
res recipiantur in æterna taber-
nacula. Quare consulendum est
à pru-

Luc. 16

256 De arte bene mor.

à prudenti confessorio, vel amicis, homini, qui sibi conscius est, quòd testamentum condiderit, cum iaceret in cœno lethalis peccati; vt post nouam confessionem integrè, & ritè peractam, confirmet, & approbet, ac ratum habeat id totum, quod in suo testamento disposuerat, ac præsertim de elemosynis post obitum suum, vel Ecclesiæ, vel pauperibus largiēdis.

Addendum est postremò, vt qui in testamento suo multis muneribus affecit proximos suos; non obliuiscatur animæ suæ, præsertim cum facilè fieri possit, vt non recta in cælum euolet, sed ad purgatoria loca deducatur. Itaque prudenter, & piè faciet, si partem elemosynarum iubeat conferri sacerdotibus, qui pro anima ipsius sacrificia Domino offerant.

2. Mac. 12 *Sancta enim, & salubris est cogitatio pro defunctis exorare, vt à peccatis soluantur, vt dicitur in*

Lib. de
cura pro
mortuis
cap. 10.

libris Machabæorum. Ex quo loco colligit sanctus Augustinus, mul

to

to magis iuuari animas defunctorum sacrificio corporis Christi; si iuabantur sacrificijs pecorum in testamento veteri.

C A P. VI.

De sexto præcepto artis bene moriendi, vicina iam morte, quod est de Confessione peccatorum.

P O S T considerationem quatuor nouissimorum, & rebus domesticis expeditis, necesse est, vt homo senex, vel periculoso morbo laborans, seriò animum applicet, reiectis alijs curis, ad sacramentum pœnitentiæ ritè percipiendum. Sæpè enim accidit vt sacramentum pœnitentiæ, quo tempore magis est necessarium, illo ipso tempore minus accuratè suscipiatur. Qui enim graui morbo laborant, vel doloribus impediti,

258 De arte bene mor.

diti, vel debilitate, aut deficiente iudicio, vel horrore propinquæ mortis, vel amore charorum, quos inuiti relinquunt; satis imperfectam confessionem peccatorum faciunt, & valdè ægrè contritionem veram, & perfectam in illis angustijs in se ipsi excitare queunt.

Testis ego possum esse huius difficultatis, quam ægroti vt plurimum patiuntur. Nam cum aliquando inuiserem amicum, virum diuitem, & nobilem, qui ex peccato quodam graui perpetrato in morbum lethalem inciderat, atq; ei dicerem, nihil ei salutarius in eo temporis articulo esse posse, quam veram peccatorum suorum pœnitentiam, & contritionem; quia Deus cor contritum, & humiliatum nunquam despicit. Respondit ille, & quid est contritio? non capio quid à me requiras. Subieci ego, hoc requiro, vt ex vero corde displiceat tibi, quòd in Deum peccaueris; & omnino
sta-

statuas, si diutius vixeris, nunquā
 amplius Deum offendere; idque
 totum procedat ex vero amore
 Dei, qui tibi innumerabilia bene-
 ficia præstitit, cui tu ingrattissimus
 pro beneficijs iniurias reddidisti.
 Respondit ille, non intelligo, non
 sum capax rerum istarum. Ita
 obiit, signa damnationis suæ satis
 aperta nobis relinquens. Hæc, &
 similia exempla nos monent, vt
 cum bene valemus, sic conscien-
 tiam nostram exoneremus, & pœ-
 nitentiam veram agamus, ac si illa
 confessio vitima nobis esset futura.

Sed nihilominus tamen in ipso
 graui morbo confessio sacramen-
 talis quanta fieri potest diligentia
 fieri debet: ac præsertim contri-
 tio excitanda est ex vero dolore
 præteritorum, & proposito firmis-
 simo non amplius peccandi, si vl-
 terius sit viuendum. Neque solum
 de peccatis commissis pœniten-
 tia agenda est, sed etiam de ope-
 ribus bonis omisis, ad quæ ex
 officio, vel ex charitate teneba-
 mur.

260 De arte bene mor.

mur . multi enim satis accuratè peccata in Deum vel proximum admiffa confiderant ; omiffionum autem facilè obliuifcuntur, vel eas non magnifaciunt . Addere poffum etiam hoc loco exemplum, fatis vtile .

Ægrotabat ad mortem Epifcopus valdè doctus, & pius . Accellit ad eum Sacerdos vtrique noftrum amicus , à quo hoc accepi , quod narro . Quæfuit ab Epifcopo communis amicus, an confcientia eius fatis pacata effer : refpondit per gratiam Dei , nihil graue fibi occurrere , quod in Deum fe commiffiffe ab vltima confefione meminiffet . Addidit Sacerdos amicus, an confcientia omiffionum non eum reprehenderet, cum Apoftolus tam follicitè Epifcopum

Timotheum admonuerit dicens,
 2. Tim. 4 *Testificor coram Deo, & Iefu Chrifto, qui iudicaturus effer viuos, & mortuos, per aduentum ipfius, & Regnum eius : prædica verbum, infta opportunè, importunè, argue, cõfe-*

obsecra, increpa in omni patientia, & doctrina. His auditis ingemuit bonus Episcopus, & ait, verè omisiones me non parùm exterrant: & his dictis, cæperunt oculi eius profundere flumina lacrymarum.

Porro ijs, qui ad bene moriendum se parant, præcipuè contritio necessaria est: Confessio enim sine contritione, vel attritione, vera, non sufficit ad salutem: satisfactio quoque, vel sine contritione non prodest, vel ægrè ab ægroto præstari potest. Contritio verò, quæ charitatem includit, etiam sine confessione, & satisfactione, cum illæ præstari non possunt, ad salutem perducit. Nam, ut paulo ante diximus, *Cor contritum* ^{Ps. 50.} *& humiliatum Deus non despiciet.* Contritio igitur ægrotanti sollicitè quærenda nobis esse videtur: cuius rei habemus exemplum egregium sancti Patris Augustini, qui teste Possidio, qui eius vitam scripsit, in ultima ægitudine, ex qua

262 De arte bene mor.

qua defunctus est; describi sibi iussit psalmos Dauidicos, qui ad penitentiam pertinent; ipsosque quaterniones, iacens in lecto, contra parietem positos diebus suæ infirmitatis intuebatur, & legebat, & iugiter ac vbertim flebat. Et ne intentio eius à quoquam impediretur, cauebat. Ante dies fermè decem, quàm exiret de corpore, postulauit à familiaribus suis ne quis ad eum ingrederetur, nisi ijs tantum horis, quibus medici ad inspiciendum intrarent, vel cùm ei inferretur refectio: nam omni reliquo tempore orationi vacabat. O beatissimum, & sapientissimū virum. Post baptismum susceptum, & peccata præteriti temporis ei dimissa, vixit annos tres, & quadraginta, in quibus vsque ad vltimam ægritudinem assiduè prædicauit verbū Dei: scripsit libros innumerabiles, Ecclesiæ vniuersæ vtilissimos: vitam duxit sine querela, innocenter, & sanctissimè: & tamen in
 vlti-

ultima senectute, & morbo, per dies plurimos contritioni, & pœnitentiæ ita vacauit, vt in legendis psalmis pœnitentialibus iugiter, & vbertim fleret. Et planè obseruanda sunt duo illa verba, *iugiter*, & *vbertim*. Non enim vna die vel hora contritioni vacauit, sed per dies plurimos, sæpissimè, & copiosissimè peccata sua defleuit. & cuius generis peccata defleuit vir sanctissimus? opinor, venialia tantum: vt non solum à flammis gehennæ, sed etiam ab igne purgatorio liber recta in cælum cōscenderet. Et si vir sanctus, & prudens delicta venialia per tot dies iugiter, & vbertim defleuit: quid faciendum esset illis, qui non solum pro delictis venialibus, sed etiam pro criminibus lethalibus satisfacere debent Deo?

Igitur ægroti omnes, qui vicinam habent mortem, ita se comparent antequam ægrotent, vt in senectute, vel morbo non sit illis necessarium graui peccata expiare,

264 De arte bene mor.

re, sed pro leuioribus tantum, delictis pœnitentiam agere; & sacra confessione, & communione, & vnctione ita se communire studeant aduersus insidias Diaboli, vt ad patriam cœlestem feliciter Deo duce, & Angelo sancto custode comitante perueniant.

C A P. VII.

De septimo præcepto artis bene moriendi, vicina iam morte, quod est de Sacrosancto viatico.

VET E R E S Christiani in administrando sacro viatico, & sacra vnctione ægrotis, primo loco inungebant ægrotos sacra vnctione, deinde porrigebant iisdem ægrotis Sacratissimum Christi corpus. Ac vt vnum, vel alterum testimonium adferamus, extat apud Laurentium Surium

rium tomo primo, vita sancti Guilielmi Archiepiscopi Bituricensis, qui vixit temporibus Innocentij Tertij Pontificis. In ea sic legitur, *Vnctionis Sacramentum humiliter, ac deuotè suscepit. eo percepto, sacrosanctam Eucharistiam sibi porrigi instantissimè postulauit; ut tanto itineris duce munitus, posset securius hostium cuneos penetrare.* Id ipsum habetur de sancto Malachia, in vita eius à sancto Bernardo conscripta, quòd videlicet Eucharistiæ viaticum post extremam vnctionem accepit.

Præter hæc duo testimonia, quæ demonstrant ordinem inter extremam vnctionem, & Eucharistiam, possunt adferri alia duo, quæ docent viaticum fuisse postremum, quamuis non fiat mētio vnctionis extremæ. In vita sancti Ambrosij, quam scripsit Paulinus, habetur viaticum datum fuisse sancto Ambrosio morte iam imminente; ita vt sumpto viatico:

statim spiritum emiserit . Idem omnino scribit Simeon Metaphrastes de sancto Ioanne Chryso-stomo in vita ipsius . Itaque perspicuum est , apud veteres vltimum sacramentum fuisse viaticum corporis Domini .

Nos hoc tempore primum aegrotos munimus sacro viatico , deinde post aliquot dies morbo crescente inungimus oleo sancto . Vterque ritus habet suas rationes . Veteres considerabant , olei sancti venerabile sacramentum institutum fuisse tum ad bonam valetudinem recuperandam , tum ad peccata , siue peccatorum reliquias expellendas . Sic enim

Iac 5.

loquitur sanctus Iacobus , *Infirmatur quis in vobis? inducat presbyteros Ecclesiae , & orent super eum , ungentes eum oleo in nomine Domini ; & oratio fidei saluabit infirmum , & alleuiabit eum Dominus ; & si in peccatis sit , remittentur ei.* Veteres igitur sperantes ex hac sacra vnctione sa-

ni-

nitatem corporalem ægroti; non differabant hoc sacramentum ad illud tempus, in quo desperata est salus, medicorum iudicio; sed cùm morbus incipiebat à medicis periculosus iudicari, continuò ad sacram vnctionem confugiebant. Id quod etiam potest intelligi ex eo, quod sanctus Bernardus scribit in vita sancti Malachię Episcopi: eundem sanctum virum ægrotantem, ex cubiculo quod erat in parte superiore domus, descendisse pedibus suis ad Ecclesiam, vt vnctionem extremam primùm, deinde viaticum acciperet; & his sacramentis susceptis, rediisse etiã pedibus suis nullo adiumento ad cubiculum, & lectum suum. Nostro tempore ægroti cùm audiunt mentionem fieri extremæ vnctionis, arbitrantur iam actum esse de vita sua; eaque de causa cognati, vel amici ne ægrotos terreant, differunt hoc sacramentum quamdiu possunt.

Est etiam alia ratio, quæ vete-

res mouebat, vt primo loco inungerent ægrotos, deinde viaticum eis præberent; quia videlicet in sacramento vnctionis remittuntur peccata, vt iam ex Apostolo Iacobo audiuius: & ideo vocatur à nonnullis veterum extrema vnctio, *Pœnitentia infirmorum*. Peccatorum autem remissio & pœnitentia, rectissimè præponitur, tanquam præparatio, siue dispositio ad altissimum sacramentum Eucharistiæ, quod puritatem maximam requirit.

Denique sacramenta omnia cōcluduntur, & quasi consignantur sacramento corporis Domini. Sic enim qui baptizantur adulti, vt Hebræi, vel Turcæ, post baptismum continuò confirmantur, & admittuntur ad sacrificium Missæ, & sacrâ eucharistiam percipiunt: sic etiam qui pœnitentiã agebant, pœnitentia peracta ad eucharistiam, saltem more veteri, semper accedebant. Illi etiam qui ordines minores, vel maiores accipiunt,

piunt, susceptis ordinibus, ad sacram communionem accedunt. Denique qui matrimonio iunguntur, sacramentum coniugij sacramento Eucharistiæ muniunt, & confirmant. Nostro tempore inuertitur ordo, non sine causa rationabili. Sæpè enim accidit, vt extrema vnctio, ne terreatur egroti, differatur in longum tempus; & periculum est, ne interim ægrotus, vel vsum rationis amittat, vel alia de causa reddatur inhabilis ad sacrosanctam eucharistiã ritè percipiendam. Ideo igitur viaticum nostro tempore præmittitur. Melius enim est, vt inuerso ordine sacramenta ista ministrètur ægrotis, quàm vt altero, eoque saluberrimo careant. Vnctio enim extrema conferri potest ægroto etiam in agone posito, & non intelligenti, vel sentienti quid circa se agatur, modò tamen in viuis sit: defuncti enim nullius sacramenti capaces sunt. Atque hæc de ordine sacramenta egro-

270 De arte bene mor.
tis conferendi .

Venio nunc ad pretiosum Christi corpus ægrotis vtiliter conferendum . Ac primum breuiter exponam , quid agendum sit ægrotis , antequam sacramentum ad eum deferatur : deinde quid agere debeat idem ægrotus , Christi corpore presente : denique quomodo se gerat , diuinissimo cibo recreatus .

Quod attinet ad primum , ego consulerem , nisi Patri spirituali aliquid vtilius suggerendum occurrerit ; vt diligenter ægrotus consideraret verba illa Sancti Thomæ , *O sacrum conuiuium , in quo Christus sumitur , recolitur memoria passionis eius , mens impletur gratia , & futura glorie nobis pignus datur .* Primum igitur attentè considerabit , sacrosanctam eucharistiã præberi nobis viatoribus , per modum cibi , vt non deficiamus in via ad patriam , præsertim eo tempore , quo longo itinere fatigati vires minui solent . Dicitur autem

autem hic cibus, *conuiuium*, & *sacrum conuiuium*; quia licet detur in specie solius panis, tamen est integrum, magnumque conuiuium; & conuiuium, non prophanum, sed sacrum; non corporis, sed animæ: ideo additur, *In quo Christus sumitur*. est enim, sub illis speciebus, siue accidentibus panis, verum Christi corpus, non separatum ab anima, & diuinitate; ac per hoc res maxîma, & pretiosissima, & ingens, dulcissimumque conuiuium, omnem, saporem suauitatis exuperans: sed animæ nutriendæ, & delectandæ, non corpori accommodatum.

Qui sint autem fructus, siue utilitas huius cibi, additur, cum dicitur, *Recolitur memoria passionis eius, mens impletur gratia, & futura gloria nobis pignus datur*. Primus igitur fructus huius conuiuij est, memoria passionis Christi: ideo enim in duplici specie, panis, & vini; corpus, & sanguis Domini consecratur, vt spe-

272 De arte bene mor.

cies panis repræsentet corpus à sanguine separatum, ac per hoc mortuum; & species vini repræsentet sanguinem separatum à corpore, quamvis sub vtraque specie Christus totus, & viuens existat. Voluit enim Dominus, vt per hæc mysteria, iugis, & quotidiana memoria apud nos extaret veneranda passionis suæ, per quam omnia mala euasimus, & omnia bona consequuti sumus. Hinc enim Dominus ipse dixit Apostolis suis, de hoc sacramento loquens, *Hoc*

LUC. 22. *facite in meam commemorationem.*

& Apostolus Paulus hæc Domini

1. COR. 11 *verba exponens ait, Quotiescumque manducabitis panem hunc, & calicem bibetis, mortem Domini annuntiabitis, donec veniat.* hoc

est, quotiescumque ad hoc sacrosanctum mysterium accesseritis, memores eritis, Christum Dominum vitam posuisse pro vobis; & hæc commemoratio durabit vsque ad secundum aduentum Domini, id est, vsque ad mundi consumma-

summationem . Voluit autem Dominus , nos assidue memores esse passionis , & mortis suæ ; quia sciebat , hanc memoriam nobis vtilissimam fore ; vt memores tam admirabilis charitatis suæ erga nos omnem spem nostram in illo poneremus , tum in vita , tum in morte . Quid enim negare poterit illis , pro quibus vitam ipse suam tam alacriter posuit ?

Alter fructus huius cælestis cœniuij notatur in verbis illis , *Mens impletur gratia* : quod est privilegium sacramenti Eucharistiæ singulare , quando cum debita præparatione suscipitur . Nam quemadmodum cibus corporalis , res vna est , & per manducationem ad stomachum traicitur : tamen omnia membra corporis reficit , nutrit , roborat , exhilarat : contra verò nimia cibi abstinentia non stomachum solum inanem reddit , sed omnia membra debilitat , extenuat , deformia , & languida reddit , ac tandem occidit : sic ci-

274 De arte bene mor.

bus iste diuinus omnes animæ spirituales potentias reficit, nutrit, roborat. Memoria, hoc sacro alimento, impletur gratia dulcissimæ recordationis beneficiorum Dei, ac præcipuè passionis Dominicæ, per quam liberati, & saluati sumus. Intelligentia, hoc eodem alimento, repletur gratia fidei, non habitualis tantum, sed etiam actualis; fides autem purificat corda ab erroribus plurimis, & replet mentem intelligentia rerum diuinarum, quæ incredibile gaudium parit. Denique voluntas, hoc ipso alimento, repletur gratia spei certissimæ, & charitatis ardentissimæ: quæ cum sit regina virtutū, omnes virtutes ad se trahit; quarum possessione homo ditissimus cælestium opum euadit. Sic igitur per hoc diuinissimum sacramentum mens repletur gratia.

Denique *futura gloriæ nobis pignus datur*, per hoc idem salu-
tiferum sacramentum. Sumpta
est autem metaphora pignoris,

ab

Act 15.

Lib. II. Cap. VII. 275

ab eo quòd inter homines non potest negari id, quod promissum est, quando in fidem seruandæ promissionis relictum est pignus. Reliquit autem Dominus corpus suum in Eucharistia, vt pignus cælestis beatitudinis; proinde qui moritur suscepto corpore dominico, cum debita puritate, & reuerentia; is pignus ostendet, & à cælesti felicitate excludi non poterit. Ostendit autem pignus, qui moritur vnitus Christo per veram charitatem, quam reliquit in anima digna perceptio huius saluti-feri sacramenti. Tunc enim egreditur anima de corpore, vt sponsa innixa super dilectum suum.

Atque hoc est, quod scribit sanctus Ioannes in Apocalypsi, cum dicit, *Beati mortui, qui in Domino moriuntur*; id est, beati morientes, qui moriuntur coniuncti Domino, vt membra capiti. *Nemo enim ascendit in calum, nisi qui descendit de calo, Filius hominis, qui est in calo.* Filius au-

Apoc. 14

Io. 3.

276 De arte bene mor.

tem hominis Christus non ascendit sine corpore suo, cui ipse est caput. Proinde soli illi moriuntur in Domino, qui dum moriuntur, adhærent Domino, ut membra capiti: quod illi omnes obtinent, qui paulo ante mortem Christum in Eucharistia dignè percipiunt.

Atque hæcenus de præparatione ægroti ad viaticum percipiendum, antequam viaticum ipsum sit præsens. Nam statim atque sacrum viaticum allatum est, debet ægrotus eo modo quo potest, assurgere, & Dominum suum vel in genua prouolutus, vel certè inclinato capite adorare. Sæpè autem Dominus vires præbet, ut homines, etiam moribundi, in illa hora consurgant, & genua flectant. Sic enim legimus de sancto Guilielmo Archiepiscopo Bituticensi, *Vt autem Dominum, & Creatorem suum ad se venisse cognouerat, illicò resumptis viribus de strato profiliens, tanquam iam febris omnis abcessisset, non sine stupore*

re

re circumstantium, maximè quòd iam ferè in supremo spiritu positus videretur, concito gradu procedit obuiam saluatori suo, vires subministrante charitate; flexisque genibus, totus lacrymis diffluens, illum adorat: utque sæpius genua possit flectere, crebrò prostratus erigitur; illique suum agonem tota deuotione commendat; orans ut quicquid purgandū superest, ipse purgare dignetur, ne quid funestus possit inuenire inimicus.

Videtur autem mihi optimum factū, ut ægrotus antequam Domini corpus accipiat, recitet, vel recitari audiat versiculos illos sancti Thomæ Aquinatis, qui simul fidem protestantur, & spem erigunt, & charitatem accendunt. Sunt autem hi.

*Adoro te deuotè latens Deitas:
Quæ sub his figuris verè latitas.
Tibi se cor meū totum subijcit,
Quia te contemplans totum deficit.*

278 De arte bene mor.

Visus, gustus, tactus in te fallitur,

Sed auditui soli tutò creditur.

Credo quicquid dixit Dei Filius,

Nihil veritatis hoc verbo verius.

In cruce latebat sola Deitas,

Sed hic latet simul & humanitas.

Ambo tamen credens, atque confitens,

Peto quod petiuit latro pœnitens.

Plagas, sicut Thomas, non intueor,

Deum tamen meum te confiteor.

Fac me tibi semper magis credere,

In te spem habere, & diligere.

O memoriale mortis Domini

Panis verus vitam præstans homini,

Præsta meæ menti de te viuere,

Et te illi semper dulce sapere.

Pie pelicane I E S V Domine

Me

Lib. II. Cap. VII. 279

*Me immundum munda tuo san-
guine,*

*Cuius una stilla saluum fa-
cere*

*Totum mundum posset omni
scelere :*

*I E S U , quem velatum nunc
aspicio ,*

*Quando fiet illud , quod tam-
sitio ,*

Vt te reuelata cernens facie ,

Visu sim beatus tuæ gloriæ ?

His versiculis deuotissimè recita-
tis , vel auditis , præmissa confes-
sione ordinaria , *Confiteor Deo ,*
&c. & accepta sacerdotis absolu-
tione , & benedictione ; & dicto,
Domine non sum dignus ; sum-
ma qua potest humilitate , & de-
uotione adiungat , *In manus tuas
Domine ,* &c. & sacrosanctum ac
cælestem cibum securè accipiat .

Sumpto viatico restat gratiarū
actio pro tam eximio Dei benefi-
cio . Et præter orationes voca-
les , quæ ex pijs libellis recitari so-
lent , valde vtile esset , vt qui via-

ti-

280 De arte bene mor.

Apoc. 3. *ticum accepit, ingrederetur cubiculum cordis sui, & tacitus intra se meditaretur verba illa dulcissima Domini I E S V, quæ habentur in Apocalypsi, Ego sto ad ostium, & pulso; si quis aperuerit mihi, intrabo ad eum, & cœnabo cum illo, & ipse mecum.*

Hæc enim propriè conueniunt illis, qui à sacra communione recedunt. Dominus enim, qui hoc sacramentum instituit in specie conuiuij, nihil aliud magis cupit, quàm vt Christiani ad conuiuium istud accedant: & hoc significatur illis verbis, *Ego sto ad ostium, & pulso;* idest, ego me ipse inuito, ad commune conuiuium, vt simul pascar. *Si quis mihi aperuerit,* assentiens bono desiderio à me illi inspirato, vt simul conuiuiamus; *intrabo ad eum,* per sacrosancti cõuiuij communicationem: *& cœnabo cum illo, & ipse mecum.* Deus enim cœnare dicitur nobiscum, quando delectatur de nostro spirituali profectu, iux-

ta

ta illud Prophetæ, *Letabitur Dominus in operibus suis*. Et in eodem loco, *Iucundum sit ei eloquium meum, ego verò delectabor in Domino*. Quibus verbis exprimitur mutua delectatio, & quasi dulce conuiuium Dei cum anima, & animæ cum Deo. Deus enim delectatur de profectu spirituali animæ; & anima delectatur de acceptis à Deo beneficijs, quorum præcipuum est, quod ipse idem per hoc magnificentissimum sacramentum cum anima quodam modo conglutinari dignetur.

Cogitet igitur anima fidelis, post acceptum viaticum, quam dulce, & quam fructuosum sit habere hospitem Christum, dum sacræ illæ species durant, non solum ut Deum, sed etiam ut hominem; & posse cum illo cum fiducia agere, & pericula, atque angustias suas, in exitu de corpore, cum illo communicare; seque illi ex toto corde commendare, atque ab eo petere, ut tentato-

rem

282 De arte bene mor.

rem reprimat; Angelum sanctum comitem sibi adiungat, atque ad portum salutis se perducatur.

C A P. VIII.

De octauo præcepto artis bene moriendi, viciniam morte, quod est de Vnctione extrema.

VLTIMVM Sacramentum est Sacra vnctio, quæ magnam consolationem ægroto adferre potest, si virtus eius intelligatur, & ipsum Sacramentum opportuno tempore percipiatur. Duo sunt effectus huius Sacramenti, vt capite superiori dicebamus: sanitas corporalis, & remissio peccatorum. De utroque effectum paucis disseremus. De primo sic loquitur Sanctus Iacobus,

Iac. 5.

Infirmatur quis in vobis? inducat presbyteros Ecclesie, & orent super

Lib. II. Cap. VIII. 283

per eum, ungentes eum oleo in nomine Domini; & oratio fidei salvabit infirmum. Hæc sanè satis aperta, & certe promissio est.

Cur autem rarissimè nostro tēpore, conualescant ægroti, hac vnctione suscepta; duæ sunt causæ: vna est quia nostro tempore, ferius quàm oporteret, hoc Sacramentum exhibetur ægrotis: neque enim per hoc Sacramentum miracula expectanda sunt, quale miraculum esset, si is, qui agit animam, continuò conualesceret: Verùm si hoc Sacramentum conferretur ægrotis, quando periculosè ægrotare incipiunt, sæpè videremus effectum sanitatis, quæ non quidem in momento, sed tēpore suo succederet. quæ causa est cur extrèma vnctio non conferatur ijs, qui propter commissa crimina à carnifice interficiuntur. Isti enim non nisi apertissimo miraculo à mortis periculo liberari possunt. Altera causa est, quia non semper expedit ægrotò à morbo

284 De arte bene mor.

bo suo liberari, sed expedit potius mori; & oratio Ecclesiæ, qualis est, quæ funditur in hac vñctione, non petit absolutè sanitatem ægroti; sed si vtile illi sit ad salutem æternam, eo tempore conualescere.

Alter effectus huius sacramenti est remissio peccatorum. Sic enim loquitur sanctus Iacobus, *Et si in peccatis fuerit, remittentur ei.* Sed quoniam remissio peccati originalis propriè pertinet ad baptismũ; remissio peccati actualis, tum ad baptismum, si baptizentur adulti; tum ad sacramentum pœnitentiæ: ideo Theologi docent, peccata, quæ remittuntur in sacramento vñctionis extremæ, esse reliquias peccatorum. Sunt autem duo genera eiusmodi reliquiarum: aliquando enim reliquię peccatorum dicuntur peccata ipsa lethalia, aut venialia, quæ post sacramentum pœnitentiæ iam susceptum, commissa sunt, & non sunt postea confessa-

rio

Lib. II. Cap. VIII. 285

rio manifestata ; vel ex ignorantia, quia non sciebat pœnitens illa esse peccata lethalia ; vel ex obliuione, quia memoriæ non occurrerunt ; & ideo non quasiuit ægrotus confessarium, cui illa confiteretur. Has igitur reliquias peccatorū sacra vnctio delet. Et de hoc genere peccatorum dicit sanctus Iacobus, *Si in peccatis fuerit, remittentur ei.* Quod etiam satis aperte docent Concilium Florentinum, & Tridentinum sess. 14. can. 2.

Aliud genus reliquiarum peccatorum est quidam horror, & torpor, siue tristitia, & mæror, quæ inuadunt ægrotos: & huc respicit illa promissio Sancti Iacobi, *Et alleuiabit eum Dominus.* Exhilarat enim hoc Sacramentum, ægrotos, quando attendunt ad promissiones diuinas, quæ in hoc venerabili Sacramento exprimuntur: atque ea de causa, non deberet differri ad extremum illud tempus, quo ægrotus nihil audit, vel

286 De arte bene mor.
vel nihil intelligit .

Quanta verò sit vtilitas huius Sacramenti, ex ipsa forma verborum intelligi potest . Inunguitur enim Sacro oleo præcipuè quinque loca corporis, in quibus sedes sunt quinque sensuum, videlicet sensus videndi, sensus audiendi, sensus olfaciendi, sensus gustandi, & sensus tangendi; & interim Sacerdos dicit, *Indulgeat tibi Dominus quicquid deliquisti per visum, auditum, & sic de alijs* . Et quoniam oratio illa est forma Sacramenti; sine dubitatione vlla efficaciter operatur id, quod verba sonant, nisi aliquid impediatur ex parte suscipientis .

Quanta verò sit in hoc Sacramento liberalitas, & benignitas Dei nostri; facillè intelliget, qui cogitauerit, quanta multitudo peccatorum profluat ex his quinque fontibus peccatorum . Atque hæc causa est, cur Sanctus Malachias Episcopus Hibernus, cuius vitam scripsit Sanctus Bernardus, cum

Lib.II.Cap.VIII. 287

cùm distulisset ad aliquot horas ministrare Sacramentum vnctionis extremæ cuidam nobili feminae ægrotanti, & illa interim vitam cum morte commutasset: tanto dolore correptus sit, vt in cubiculo mulieris defunctæ cum suis presbyteris tota nocte iacuerit orans, & lugens; culpæ suæ deputans, quod illa pia mulier per Sacramentum extremæ vnctionis, vel non conualuisset, vel tam largam indulgentiam peccatorum, de Domini liberalitate non percepisset. Quia verò Sanctus ille Episcopus, amicus Dei erat, à Domino suo precibus & lacrymis obtinuit, vt mulier illa resurgeret, & ab eodem Sancto viro cum ingenti deuotione inuncta, vtrunque effectum Sacræ vnctionis acciperet. nam & planè conualuit, & ad multos annos superuixit, & indulgentiam peccatorum, vt piè credimus, non amisit. Hoc exemplum tanti viri, & ab alio Sanctissimo viro fideliter literis com-
men-

288 De arte bene mor.

mendatum; potest omnibus facile persuadere, quanti fieri debeat hoc venerabile Sacramentum.

C A P. IX.

De nono præcepto artis bene moriendi, vicina iam morte, quod est de prima tentatione Diaboli, idest, de hæresi.

PROPINQUANTE morte, diabolus aduersarius noster, *tanquã leo rugiens* non deest sibi, sed tãquam ad prædã velox accurrit, & totis viribus in extrema illa lucta, moribundum aggreditur. Primum verò prælium inchoare solet à tentatione circa fidem. Nam & res quas credimus, non solùm supra sensum, sed etiam supra rationem naturalem ascendunt; & ipsa eadem fides, fundamentum,

iustificationis nostræ est; & eo fundamento euerso omnis ædificatio bonorum operum corrumpitur. Est autem hæc tentatio facile omnium grauiissima, quia prælium nobis est cum aduersario, non solum doctissimo, & acutissimo, sed etiam eiusmodi prælijs assueto ab exordio mundi. Ipse omnes Principes hæreticorum seduxit, quorum non pauci, viri optimi, & sapientissimi fuerant. Rectè igitur Apostolus nos admonet dicens, *Non est nobis colluctatio aduersus carnem, & sanguinem, id est, aduersus homines; sed aduersus spiritualia nequitie in caelestibus; id est, aduersus demones, qui spiritus sunt: & spiritus nequissimi, & astutissimi, & ex caelo aereo nos omnes vident. Arma nostra in hoc prælio non sunt disputationes, sed simplex veritatis fides. Sic enim Principes Apostolorum nos docent. Apostolus Petrus, Aduersarius, inquit, vester diabolus, tanquam leo rugiens cir-*

Eph. 6.

1. Pet. 5

N cuit

290 De arte bene mor.

cuit quarens quem deuoret ; cui resistite fortes in fide . & Apo-
 Ephel. 6 *stolus Paulus , In omnibus , inquit , sumentes scutum fidei , in quo possitis omnia tela nequissimi igne a*
extinguere . Itaque ex doctrina Apostolorum non oportet cum
Diabolo disputare , sed clypeo fidei excipere , & retorquere omnia
tela ipsius quantumuis ignita , & ardentia , id est , efficacia , & subtilia esse videantur .

Habemus exemplum valdè tremendum apud Petrum Barocium , Episc. Patauinum , qui scripsit libros tres de ratione bene moriēdi . Is in libro secundo sic loquitur , *Fuere , quemadmodum audiui , duo quondam viri eruditissimi , & omnium , qui ex eodem gymnasio essent , in disputando facile principes : ac ijdem benemorati , maximèque religiosi . E quibus vnus cum excessisset è viuis , ei qui superstes erat , in sua fortè bibliotheca , scripturæ sacræ studijs incumbenti , totus ardēs ap-*
 pa-

paruit ; territoque, ac quæ nam ei tam grandis pœnæ causa foret, interroganti ; gemens, dolensque respondit: Cùm essem migraturus è vita, venit ad me hostis antiquus ; & quoniam apprime eruditum nouerat, sciscitari cœpit, de fide quid crederem. Ego, quæ in Apostolorum symbolo sunt, credere me respondi. Ille exponi sibi quedam, quæ minus lucida viderentur, rogauit. Exposui, ut in Symbolo Athanasij legeram. Neque enim lucidius, aut verius exponi posse putabam. Tum ille, non est, ait, ut putas: sed quæ ad Patrem pertinent, partim aperta, & vera ; partim obscura & falsa sunt. Nam ipse quidem æternus est ; non tamen ut semper Deus, sic semper & Pater: sed prius Deus postea Pater. Ad hæc cùm ego exclamarem hæreticum esse documentum, doctrinamque diabolicam: non est, inquit ille, clamoribus differendum, sed rationibus, si veritatis indagandæ studio duci-

292 De arte bene mor.

mur. Ego quid pro mea sententia sit dicere facile possum: tu quid pro tua sit, explicare si poteris, ab errore me grandi liberaueris. Ipse miser, qui ingenio, & doctrina mea magis, quam equum erat, considerem, cum eo tanquam cum uno quolibet hominum ceterorum disputare cœpi; tandemque rationibus, quas mihi ex aduerso plurimas ingerebat, & quod magis admiratus sum, scripturæ sacræ testimonijs in errorem me paulatim tam nefarium misit, ut iam neque Filium, neque Spiritum sanctum Deum putarem. Interim rapuit animam mors, & qualenq; reperit, Iudici obtulit. Ab eo discedere in hunc ignem sum iussus: quem, & si maximus est, tolerabilem tamen utcumque putarem, si post mille annorum millia finiendus foret. Sed æternus est, idemque tantus, quantum nulla apud nos vidit ætas: ut me in singulas fermè horas scientiæ meæ pœniteat, quæ
in

*in tam immane præcipitium me
deiecit; & hæc dicens euanuit.*

*At ille tum rei nouitate, tum verò
amici damno permotus, ut in se
primum reuersus est, cum ijs, qui
sibi amicissimi erant, quod uide-
rat contulit; petijtque quid nam
aduersus eiusmodi rem factu
optimum ducerent. Decretum
in commune est, ut ad eam se
quisque fidem referret, quam
Catholica seruat Ecclesia. Paulo
post in agrotationem, ex qua
mortuus est, incidit. Et ecce ad
eum itidem antiquus hostis, prio-
ris disputationis successu animo-
sior venit; querit de fide, quid
credat. Respondet credere se, quæ
Mater Ecclesia credit. Rursus an-
tiquus hostis, quid nam credat
Mater Ecclesia, sciscitatur. Et il-
le, quod ego, inquit; atque in
hunc modum, audientibus his, qui
astabant, veluti ab aliquo inter-
rogatus, credo, quæ credit Eccle-
sia; & Ecclesia credit, quæ ego
credo, tantisper dicere non cessa-*

294 De arte bene mor.

uit, dum animam redderet. Ita factum est, ut delusa inimici ver-
suta, ipse in celum migraret. Et
post paucos dies amicis, quos, quid
nam in huiusmodi re factu opti-
mum videretur consuluerat, lon-
gè alio habitu corporis apparens,
gratias egit, quòd eorum consilio
ad caeleste Regnum ascenderat.

Quæ nos uti sunt gesta describe-
re superfluum arbitrati non su-
mus, ut horum vel infortunio,
vel successu discere unusquisque
posset, de fide cum Diabolo dispu-
tari non oportere: sed satis es-

se, si ad eam unusquis-
que se referat fidẽ,

quam Catho-

lica ser-

uat.

Ecclesia. Hæc Baro-
cius, cui nihil est,
quod adda-
mus.

CAP.

C A P. X.

De decimo præcepto artis bene moriendi, vicina iam morte, quod est de secundatentatione, idest, de desperatione.

ALTERA tentatio solet esse de desperatione, qua tentatione Diabolus solet non solum improbos homines, sed etiam valdè pios aliquando vexare. Et quidem homines valde improbos satis facile, imminente morte in desperationis barathrum detru- dit. Subijcit enim ante oculos mē- tis omnia omnino crimina, quæ dum viuerent, gesserunt: vt de quodam milite scribit venerabilis Beda in libro quinto historiae gen- tis suæ, cuius hæc sunt verba.

Fuit quidam temporibus Coenre- Lib. 5. c.
di, qui post Edilredum regnavit, 14.

296 De arte bene mor.

vir in laico habitu, atque officio militari positus: sed quantum pro industria exteriori Regi placens, tantum pro interna suum negligentia displicens. Admonebat ergo illum sedulo, ut confiteretur, & emendaret, ac relinqueret scelera sua, priusquam subito mortis superuentu, tempus omne poenitendi, & emendandi perderet. Verum ille, licet frequenter admonitus, spernebat verba salutis; se seque tempore sequenti poenitentiam acturum esse promittebat. Inter hac tactus infirmitate cecidit in lectum, atque acri cepit dolore torqueri. Ad quem ingressus Rex (diligebat enim eum) multum hortabatur, ut vel tunc antequam moreretur, poenitentiam ageret commissorum. At ille responderebat, non se tunc velle confiteri peccata sua, sed cum ab infirmitate resurgeret; ne forte exprobrarent sibi sodales quod timore mortis faceret ea, quae sospes facere noluerat. Fortiter quidem,

ut

ut sibi videbatur locutus, sed miserabiliter, ut postea patuit, demoniaca fraude seductus est. Cumque morbo ingrauescente, denuò ad eum inuisendum, ac docendum Rex intraret, clamauit statim miserabili voce, Quid vis modò? quid huc venisti? non enim mihi aliquid utilitatis, aut salutis potes ultra conferre. At Rex, noli, inquit, ita loqui, vide ut sanum sapias. Non, inquit, insanio, sed pessimam mihi conscientiam certus præ oculis habeo. Paulo ante intrauerunt ad me duo pulcherrimi iuuenes, & resederunt circa me, vnus ad caput, & vnus ad pedes: protulitque vnus libellum perpulchrum, sed valde modicum, ac mihi ad legendum dedit, in quo omnia, quaecunque bona feceram intuens scripta reperi: & hæc erant nimis pauca & modica. Tunc subito superuenit exercitus malignorum, & horrendorum spirituum. Tunc ille, qui obscuritate tenebrose faciei,

298 De arte bene mor.

& primatu sedis maior esse vide-
 batur, proferens codicem horren-
 da visionis, & magnitudinis enor-
 mis, & ponderis penè importabi-
 lis, iussit vni ex satellitibus suis
 mihi ad legendum deferri. Quem
 cum legissem, inueni omnia scele-
 ra, non solum quæ opere, vel ver-
 bo, sed etiam quæ tenuissima cogi-
 tatione peccavi, manifestissime in
 eo tetris esse descripta litteris. Sic
 loquebatur miser desperans; & non
 multo post defunctus, pœniten-
 tiam, quam ad breue tempus cum
 fructu veniæ facere supersedit, in
 æternum sine fructu pœnis subdi-
 tus facit. hæc venerabilis Beda.
 Vbi manifestè videmus, hostem
 nostrum Diabolum, primum egis-
 se cum isto miserabili milite, vt
 non ageret pœnitentiam, spe vi-
 tæ longioris; deinde ad egisse eum
 ad desperationem.

Lib. 5. c.
 15. hist.

Alterū exemplū habetur apud
 eundem auctorem in sequenti ca-
 pite, vbi sic loquitur, *Novi*, in-
 quit, *ipse fratrem, quem utinam*
 non

non nossem, cuius etiam nomen, si hoc aliquid prodesset, dicere possem, positum in monasterio nobili, sed ipsum ignobiliter viuentem. Hic percussus languore, atque ad extrema perductus, vocauit fratres, & multum mœrens, ac damnato similis cœpit narrare, quia videret inferos apertos, & satanam immersum in profundum tartari. Caipham quoque cum cæteris qui occiderunt Dominum iuxta eum flammis ultricibus contraditum; in quorum vicinia, inquit, beu misero mihi locum aspicio æternæ perditionis esse preparatum. Audientes hæc fratres, cœperunt diligenter hortari, ut vel tunc adhuc positus in corpore pœnitentiã ageret. Respondebat ille desperans, Non est mihi modò tempus vitam mutandi, cum ipse viderim iudicium meum iam esse completum. Talia dicens sine viatico abiit, & corpus eius in ultimis est monasterij locis humatum. hæc Beda. Quod autem hic miserabilis mo-

300 De arte bene mor.

Ezech.
18. & 33

nachus dicit, non fuisse tunc sibi tempus vitam mutandi; non ex veritate, sed ex Diaboli persuasione dicit. Spiritus enim sanctus apertissimè clamat per Ezechielem Prophetam, Deum semper esse paratum amplecti eos, qui conuertuntur à peccato ad pœnitentiam. quod apertius docet sanctus Leo Papa in epistola ad Theodorum Foroiulensem Episcopum his verbis, *Misericordiae Dei nec mensuras possumus ponere, nec tempora definire; ad quem nullas patitur venire moras cõuersio, dicente Spiritu Dei per Prophetam, Cum conuersus ingemueris, tunc saluus eris.*

Tom. 5.
ad diem
27. Sept.

Addam exemplum vnum, vel alterum, quibus demonstratur, à Dæmone tentari etiam piissimos viros in exitu de hac vita, de peccato desperationis. Extat apud Laurentium Surium Vita B. Comitum Elzearij, qui vixit in virginitate cum coniuge sua Dalphina, & post sanctissimam mortem multis

multis signis, & miraculis claruit. Istamen in exitu de hac vita tentationes grauissimas tolerauit. Sic enim scribit auctor in ultimo capite. *Ad extremam in agone positus vultum prætulit valde terribilem, unde colligi liceret, eum in magno versari labore ob quædam illi obiecta: atque sub eiusmodi conflictu exclamauit, magna est Dæmonum vis: sed eam penitus eneruarunt virtus, & merita sacrosanctæ incarnationis, & passionis IESV Christi. Post paululum rursus exclamans ait, planè vici: post aliquantulum temporis spatium, cum ingenti clamore dixit, totum me diuino iudicio committo. Atque bis dictis reparatus est vultus eius, & quodam rubore, atque splendore, multaque elegantia perfusus reddidit spiritum.*

Alterum exemplum multo adhuc terribilius, extat apud Ioannem Climacum, qui refert, monachum quemdam valde venerabi-

302 De arte bene mor.

bilem, nomine Stephanum, cum annos circiter quadraginta in eremo vixisset ieiunijs, vigilijs, lacrymis, precibus, alijsque virtutibus exornatus; ad exitum tandem, peruenisse. Cum autem in extremo illo agone constitutus, à Dæmonibus multorum criminū reus fieret, vt ad desperationem impelleretur; repente obstupuisse, animo, & apertis oculis clara voce respondere cœpisse, aliquando quidem, *Ita sanè re vera ita est, sed pœnitentia, & lacrymis crimen dilui.* aliquando verò, *non est ita, mentimini.* Deinde rursum, *Verum loquimini, sed fleui, sed ministravi.* In quibusdam tamen, *verè me accusatis, & quid respondeam non habeo.* Atque ita obiit ambiguum relinquēs, saluus ne, an reprobus esset. Hæc igitur & alia eiusdem generis exempla nos moneant, vt ante horam illam sollicitè conscientiam nostram expurgemus, & nunquam de misericordia Domini diffidamus.

CAP.

CAP. XI.

De vndecimo præcepto artis bene moriendi, vicina iam morte, quod est de tertia tentatione, id est odio Dei.

ADVERSARIUS noster Diabolus non solum nititur quantum potest, ut moribundos spoliaret fide, & spe, & inducat in hæresim, & desperationem; sed etiã contendit, amicos Dei ab amicitia eius separare, & inducere in odiũ Dei, & blasphemias, & magicas artes. Isti ut plurimum non timent mortem, nec pœnas gehennæ. Sperant enim se apud inferos felicem vitam acturos, vtpotè socios dæmonum, quos in inferis regnare arbitrantur. Scribunt de hac re Grillandus in libro de sortilegis quæstione nona, num. 2. &

ex

304 De arte bene mor.

ex eo Martinus del Rio libro sexto disquisitionum magicarum, capite primo, sectione tertia. Sic igitur loquuntur hi auctores. Postquam captæ sunt maleficæ, ut ipsæ met sæpè factæ sunt, tunc Diabolus nihil aliud satagit, nec laborat in alio, nisi in persuadendo, ut persistant in sententia usque ad mortem. Adducantur licet in supplicij locum, ignisque succendatur; se illorum corpora, & laqueo, & flammis palam erepturū, facturumque, ut ex flammarum contactu nullum dolorem percipiant. Quòd si mori illas contingat incendio, mortem illam cruciatus expertem fore; migraturas ex huius vitæ miserijs absque supplicij sensu, ut in futuræ vitæ beatitudinem transferantur, illic eas dæmonibus similes fore, eodem robore, scientia, diuitijs, potentia, voluptate, quibus ipse dæmon potitur ac pollet, fore donandas; sic diabolus mendax fallit.

Sunt præterea quidam alij, qui
quam-

quamuis malefici, vel magi propriè non sint; tamen sic ab auaritia excoëcati sunt; vt parum omnino ab infidelibus absint. Neque enim sine causa beatus Apostolus auaritiam appellauit, idolorum seruitutem.

Ephes 5.
Colos 3

Ego ipse inuisens aliquando ægrotum morti propinquum; cum inciperem loqui de præparatione ad exitum de præsentì vita: respondit constanti animo, & sine vllò metu, ac dixit, *Ego Domine cupiui alloqui te, non pro me, sed pro coniuge mea, & filijs meis. Ego enim propero ad inferos; neque est quod aliquid pro me agas.* hæc verò protulit animo tranquillo, ac si de itinere ad villam, vel oppidum aliquod loqueretur. Ita nimirum Diabolus animam eius sibi subiecerat, vt non cuperet, nec vellet ab eo diuelli. Nec tamen magus, aut necromanticus erat, sed artem exercebat valde periculosam; & intentus lucro per fas, & nefas, oblitus videbatur non

306 De arte bene mor.

non solum Dei, sed etiam animæ suæ. Summa est, cum multis verbis illum ad meliorem mentem reuocare tentassem, nihil efficere potui. Cupiet fortasse aliquis nosse, quam ille artem exerceret. dicam ut eius interitus alijs hominibus eiusdem artis, si qui sunt ei similes, resipiscant. Procurator causarum erat, ex illorum numero, qui non multum laborant, vtrum causam iustam, an iniustam defendendam suscipiant. Atque interrim vtrique parti iniuriã faciunt, modò ipsi marsupium impleant.

Addam vnum, quando in hunc sermonem incidi. Vir quidam, apprimè doctus cum mecum ageret, & merita causæ cuiusdam exponeret: ego sermonem eius interrumpens aio, videris mihi causam iniustam fouere: ille assentiens respondit, ego non sum aduocatus veritatis, aut iustitiæ, sed clientis mei: meum est exponere merita causæ, quam defendendam suscepi: Iudex viderit, pro qua
par-

parte sententiam ferat. At ego, nolo, inquam, mihi fidem habeas, sed sancto Thomæ Aquinatis, Doctori summo & sanctissimo. is enim in secunda parte summæ Theologicæ sic loquitur, *Respondeo, dicendum, quòd illicitum est alicui cooperari ad malum faciendum, siue consulendo, siue adiuuando, siue qualitercunque consentiendo. quia consilians, & coadiuuans quodam modo est faciens: & Apostolus dicit ad Romanos scribens, quòd digni sunt Rom. 1. morte non solum qui faciunt peccatum, sed etiam qui consentiunt facientibus. unde, ut supra dictum est, omnes tales ad restitutionem tenentur. Manifestum est autem, quòd Aduocatus auxilium, & consilium præstat ei, cuius causæ patrocinator. unde si scienter iniustam causam defendit, absque dubio grauiter peccat, & ad restitutionem tenetur eius damni, quod contra iustitiam per eius auxilium altera pars incurrit.*

22 q. 71.
art. 3.

Rom. 1.

rit. si autem ignoranter iniustam causam defendit, putans esse iustam; excusatur secundum modum, quo ignorantia excusari potest. hæc Sanctus Thomas: explicat autem Caietanus Cardinalis ultima verba Sancti Thomæ, dicens, Qui omnino defendisset, siue iustam, siue iniustam causam, quamvis nesciat iniustam esse, non ex ignorantia, sed cum ignorantia, que non excusat; patrocinetur iniuste. qui etiam non curat discernere, & penetrare, an iustam, vel iniustam causam suscipiant; manifestè negligunt scire id, quod tenentur scire. hæc ille.

Ad has tentationes addi potest alia, quæ non tam nocet, quam prodest, quamvis diabolus ea utatur, ut noceat. Solet enim ipse hostis generis humani plerunque adesse, seque terribili facie ostendere morituris; ut eos si decipere non potest, saltem impediat ab alacritate, & studio orationis. Sic de B. Martino scribit Seuerns Sulpi-

pi.

pitius , morienti apparuisse diabolum , eique à Sancto Martino dictum, *quid hic astas cruenta bestia? nihil in me funeste reperies.* Scribit quoque venerabilis Petrus Damiani in vita Sancti Odilonis ; apparuisse prædicto Odiloni paulo ante mortem diabolum teterrima specie , de quo sic ipse B. Odilo locutus dicitur, *In ipsa mea decessionis hora, in illo angulo (ostendebat enim quasi digito locum) vidi figuram quamdam truce[m] nimis atque terribilem, quæ mihi teterrima sue visionis horrorem, atque formidinem tentavit, incutere: sed Christi confortante virtute, nulla me potuit infestatione nocere.* Scribit etiam sanctus Adelinus Sagiensis Episcopus apud Laurentium Surium in vita Sanctæ Opportunæ virginis, morienti S. Opportunæ apparuisse diabolum in specie nigerrimi Æthiopis , cuius capilli , & barba distillabant quasi picem calidam, & liquidam , oculi eius erant quasi ferrum ignitum, quod

22. Aprilis.

310 De arte bene mor.

quod de fornace multis scintillis emicans producitur: de ore & naribus eius flamma exibat, & vapor sulphureus.

Cur autem Deus permittat, sanctos viros eiusmodi visionibus exerceri; docet Angelus Domini in vita Sancti Aicardi, quæ extat apud Laurentium Surium, ad diem quintumdecimum Septembris. Nam cum diabolus esset in quodam monasterio intentus ad prædam, Angelus sanctus eius monasterij custos, dixit ad diabolum, *Habebis hic ministerium monachis quidem fructuosum, sed non tibi proficuum: illis ad expiationem, sed tibi ad confusionem.* & respondente diabolo, *Numquid ego his, aut ullis christicolis debitor sum ad salutem?* respondit Angelus, *In hoc, inquit, his debitor es; quia si quid in eis est, quod refecari debeat, horrore visionis tuæ purgabitur.* Deinde paulo post idem Angelus Sancto Aicardo, de diabolo dixit, *Ne verearis à facie*

cie eius : nulla ei in hac Christi familia ad nocendum data potestas est, præterquam quod animabus à corpore exituris visio illius expiabilem terrorem incutiet : ut si in eis aliquid est, quod reseruari debeat, horrendæ illius visionis terror e expietur.

CAP. XII.

De duodecimo præcepto artis bene moriendi, vicina iam morte, quod est de remedio primo aduersus tentationes diaboli.

EXPOSUIMVS capitibus superioribus tentationes quatuor, quæ moribundos grauitè vexare solent. aduersus eas tentationes duo remediorum genera adhiberi possunt. Vnum est pro
ijs

312 De arte bene mor.

ijs, qui compotes sunt rationis, & audire, & intelligere possunt quæ ipsis dicuntur. Alterum est generale pro omnibus, idque vtilissimum atque tutissimum.

Quod ad primum attinet, si tentatio fidem catholicã impugnat, nullo modo expedit, vt supra diximus cum diabolo disputare. Sed generatim admonendi sunt, qui tentantur, vt si tentatio versatur circa naturam Dei, qui vnus in essentia, & trinus in personis credendus est: docendus est ægrotus, vt cogitet quàm multa ignoramus de rebus creatis, non solùm spiritualibus, sed etiam corporalibus: siquidem magna pars hominum non facilè credere potest, stellas firmamenti singulas maiores esse toto orbe terrarum: & tamen hoc ipsum Mathematici facilè demonstrant esse verissimum. Quod si res ista, quæ corporalis est, non intelligitur à plurimis, qui tamen fidem habent hominibus doctis: cur non credent de natura

Dei

Dei, id quod ipse Deus per Apostolos, & Prophetas reuelauit, & signis, ac miraculis plurimis, & maximis confirmauit?

Quod si tentatio ad ea pertineat, quæ Deum fecisse, & in dies facere credimus, quale in primis est transmutatio panis, & vini in corpus, & sanguinem Christi, remanentibus accidentibus panis, & vini; adhibenda sunt exempla rerum innumerabilium, quas credimus Deum fecisse, cum earum nullam rationem reddere possimus. Quis capiat, mundum uniuersum solo Dei nutu ex nihilo fieri potuisse? & tamen multi id credunt, qui mysterium Eucharistiæ adduci non possunt, ut credant. Quis itidem crederet, corpora omnium defunctorum redacta in cineres, vel in pulueres, aut à bestijs vorata, vel in herbas conuersa; iussu Domini in momento resurrectura? Et tamen hoc omnes Catholici facillè credunt, & in symbolo confitentur, & credidit

O hoc

314 De arte bene mor.

Iob 19

hoc ipsum Iob ante aliquot annorum millia . ait enim, *Scio quod redemptor meus uiuit, & in nouissimo die de terra surrecturus sum; & rursum circumdabor pelle mea.* Ex his igitur, & alijs idgenus mirandis operibus Dei, quæ superant captum nostrum; facile credi possunt alia, quæ nobis Ecclesia Catholica credenda proponit; cum sit Ecclesia, Apostolo teste, columna & firmamentum veritatis. Hæc & similia proponi possunt ijs, qui tentantur circa fidem.

1. Tim. 3

Qui verò tentationes patiuntur circa spem, ijs proponenda est magnitudo planè infinita misericordiæ Dei, quæ longe superat numerum, & molem omnium peccatorum. Sic enim loquitur Spiritus sanctus per Dauidem in psalmo 144. *Miserator, & misericors Dominus, patiens & multum misericors. Subiis Dominus uniuersis, & miserationes eius super omnia opera eius.* Item pro-

po-

ponenda est propitiatio mediato-

ris, de qua sanctus Ioannes dicit, *Ipse est propitiatio pro peccatis no-* 1. Io. 1.

stris; non pro nostris autem tan-

tum, sed etiam pro totius mundi.

Proponenda quoque est virtus pe-

nitentiæ, quæ si ex corde verè Ps 50.

contrito procedat; nunquam apud

Deum repulsam accipiet: veris-

simè enim scripsit Propheta, *Cor* Luc. 15.

contritum, & humiliatum Deus

non despiciet. Proponendum etiã

est exemplum filij prodigi, qui vix

illa verba protulerat, *Pater pecca-*

ui in calum & coram te: cum sta-

tim patris viscera commota sunt,

& in complexum filij ruit; & ius-

sit indui tunica pretiosa, & impo-

ni annulum in digitum eius, & pa-

rari conuiuium solemne, quia,

filius eius perierat, & inuentus

erat.

Denique proponendū est exem-

plum Sancti Pauli, qui dum adhuc

Ecclesiam persequeretur, præuen-

tus à gratia Dei mutatus est de

persecutore in prædicatorem.

316 De arte bene mor.

Id quod ipse idem scribit factum, esse, vt omnes peccatores eius exemplo conuerterentur, & nemo, quantumuis scelestus, desperaret de misericordia Dei. *1. Tim. 1.* *Fidelis, inquit, sermo, & omni acceptione dignus, quòd Christus IESVS venit in hunc mundum peccatores saluos facere; quorum primus ego sum: sed ideo misericordiam consecutus sum, vt in me primo ostenderet Christus IESVS omnem patientiam, ad informationem eorum, qui credituri sunt illi in vitam aeternam.*

Qui autem tentantur à dæmone tentatione grauißima contra charitatem Dei, & incitantur ad odiũ Dei, & amorem Diaboli; docendi sunt primo loco, Diabolum esse mendacem, dicente Domino, *Io. 8.* *Cum loquitur Diabolus, mendacium, ex proprijs loquitur, quia mendax est, & pater eius.* Vbi illud, *& pater eius*, significat, diabolum esse patrem mendacij, vt sanctus Augustinus, & sanctus Ioãnes

nes

Lib. II. Cap. XII. 317

nes; Chriftostomus docent. Diabolus enim primum omnium, Tract. 4^{us}
in Ioan.
Hom. 42
in Ioan. mentiri cœpit, cùm ait Eux, & per illam Adamo, *Nequaquam moriemini.* Gen. 3. Deus enim dixerat Adamo, vt non comederet de ligno vetito, si vellet nunquam mori: Diabolus autem contra, dixit vt comederent, quia non morerentur. Itaque diabolo nulla fides haberi debet, cùm sit mendax, & pater mendacij. Deinde Diabolus iam iudicatus est ad ignem æternum, cum omnibus, qui illum sequuntur. Sic enim Dominus dicit in die Iudicij, *Ite maledicti in ignem æternum, qui paratus est Diabolo, & Angelis eius.* Mat. 25. Errant igitur quicũque Diabolo se subiiciunt, sperantes, se cum Diabolo post mortem apud inferos regnatos, & opes, ac voluptates maximas habituros. Denique experimento constat, omnia Diaboli promissa esse fallacia; nemo enim ex ijs, qui ad notitiam nostram venire potuerunt, adhuc inuentus

318 De arte bene mor.

est, qui thesauros ingentes à Diabolo promissos acceperit; neque qui ad iudicium ad carceres, vel triremes, vel ad ipsam mortem à legitima potestate, per Diabolum eripi potuerint.

Hæc tria si à cupidis hominibus serio cogitarentur, fortasse pauci, aut nulli essent, qui à Deo vero, verèque omnipotente, & sapientissimo, & optimo, ad Diabolum mendacissimum, & mendicissimum, nec non miserrimum deficere auderent.

De quarta tentatione nihil est quod dicamus, cum iam satis abundè constiterit, eam tentationem non tam noxiam, quam salutarem morientibus esse. Si quis tamen velit remedium ex scripturis, ad eam facilius tolerandam; legat ipse, vel iubeat sibi legi, dum horribilis illa visio durat, psalmum vigesimum sextum, qui incipit, *Dominus illuminatio mea, & salus mea.*

CAP.

CAP. XIII.

De tertio decimo præcepto
artis bene moriendi, vi-
cina iam morte, quod est
de secundo remedio aduer-
sus tentationes diaboli.

EXPLICAVIMUS remedium
primum aduersus singulas
tentationes Diaboli; nunc expli-
cabis remedium secundum,
quod erit commune omnibus ten-
tationibus. Hoc magnum, & sa-
lutare remedium in oratione po-
situm est, siue ipse pro se ægro-
tus orare possit, siue alij pro ip-
so orent, siue ipsius ægroti, &
astantium oratio coniungatur. Id
enim constat, multum valere ora-
tionem timentium Deum; præser-
tim cum pro cõperto habeamus,
non posse Diabolum tentare, nisi
quantum Dominus illi permittit.

320 De arte bene mor.

Est enim quasi leo rugiens, vel canis rabidus cathena ferrea alligatus, qui non potest pro arbitrio mordere, sed quantum Deus, qui cathenam manu sua potentissima regit, illum mordere finit. Hoc docet in primis sanctus Augustinus exponens verba illa psalmi,

Pf. 34.

Dic anima mea, salus tua ego sum. Et adferens exemplum sancti Iob. Ostendit, inquit, hoc Deus in causa vera illius sancti Iob, quia et ipse Diabolus auferendi haec temporalia non habet potestatem, nisi cum acceperit à summa illa potestate. Inuidere potuit sancto: nunquid nocere potuit? accusare potuit, damnare nunquid potuit? nunquid valuit aliquid tollere? nunquid vel unguem? nunquid vel capillum ledere, nisi Deo diceret, mitte manum tuam? quid est, mitte manum tuam? Da potestatem. accepit. ille tentavit, ille tentatus est: tentatus tamen vicit, tentator victus est. Deus enim, qui
Dia-

Diabolo permiserat, ut illa tolleretur, ille seruum suum interius non deseruerat, & ad ipsum Diabolum superandum, animam serui sui frameam sibi fecerat. Quantum valet hoc? de homine dico. Victus in Paradiso, vicit in stercore. Ibi victus est à Diabolo per mulierem; hic vicit Diabolum, & mulierem.

Hoc ipsum, quod sanctus Augustinus docet, nihil posse Diabolum, nisi quantum permittit Deus: exéplo suo docuerunt sanctus Antonius, & sanctus Franciscus. De sancto Antonio sic loquitur sanctus Athanasius, qui eius vitam scripsit, Antonius multitudine demoniorum vallatus, quasi de inimicis luderet, dicebat, Si virium aliquid haberetis, sufficeret unus ad prælium. Sed quoniam Domino vos eneruante frangimini, multitudine tentatis inferre terrores; cum hoc ipsum infirmitatis indicium sit, quòd irrationalium induitis formas bestiarum.

322 De arte bene mor.

Rursumque confidens aiebat, Si quid valetis, si vobis in me potestatem Dominus dedit, deuorate concessum: si verò non potestis, cur frustra nitimini? signum enim crucis, & fides ad Dominum inexpugnabilis nobis murus est.

S. Bon in
vita S. Fr̃.
c. 10

De sancto Francisco eadem ferè narrat sanctus Bonaventura. Loca, inquit, solitaria querens ad solitudines, & Ecclesias derelictas oraturus nocte pergebat: ubi demonum pugnas horribiles frequenter sustinuit, qui secum sensibilter configentes, nitebantur ipsum ab orationis studio perturbare. Ipse verò armis munitus celestibus, quanto vehementius impetebatur ab hostibus, tanto fortior in virtute, & feruentior reddebatur in opere, fidenter dicens ad Christum, Sub umbra alarum tuarum protege me, à facie impiorum, qui me afflixerunt. Ad demones autem, facite quicquid in me valetis maligni spiritus, & fallaces. Non enim potestis, nisi quantum

Lib. II. Cap. XIII. 323

vos manus superna relaxat. & ego ad perferendum omnia quæ ille infligenda decreuerit, cum omni succunditate paratus assisto. Quam mentis constantiam superbi demones non ferentes, abscedebant confusi. Hoc igitur iacto solidissimo fundamento, quod Diabolus nihil possit, nisi quantum ei Deus permittit; dubitari non potest, quin oratio feruens ad Deum, siue ægroti, siue adstantium, multum omnino valeat, præsertim si ij, qui orant, sint amici Dei.

Habemus huius rei præclarissimum exemplum apud sanctum Gregorium in libro quarto dialogorū, qui etiam hoc ipsum exemplum in monasterio suo contigisse, & inter concionandum narrasse, se dicit. Hæc sunt eius verba. Is, inquit, de quo in homilyis corā populo me narrasse iā memini, inquietus valde puer fuit, Theodorus nomine, qui in monasterium meum fratrem suum necessitate magis, quam voluntate sequutus est. Cui

Li. 4. c. 37
diab.

324 De arte bene mor.

nimirum graue erat, si quis pro salute sua aliquid loqueretur. Bonae enim non solum facere, sed etiam audire non poterat. nunquam se ad sanctae conuersationis habitum venire, iurando, irascendo, deridendo testabatur. In hac autem pestilentia, quae nuper huius urbis populum magna ex parte consumpsit, percussus in inguine, est perductus ad mortem. Cumque extremum spiritum ageret, conuenerunt fratres, ut egressum illius orando protegerent. Iam corpus eius ab extrema parte fuerat premortuum. in solo tantum pectore vitalis adhuc calor anhelabat. Cuncti autem fratres tanto coeperunt pro eo enixius orare, quanto eum iam videbant sub celeritate discedere. Tunc repente coepit eisdem fratribus assistentibus clamare, atque cum magnis vocibus orationes eorum interrumpere, dicens, recedite, recedite, Ecce draconi ad deuorandum datus sum, qui propter

ve-

vestram presentiam deuorare me
 non potest. caput meum iam suo
 ore absorbit: date locum ut me
 non amplius cruciet, sed faciat
 quod facturum est. Si ei ad deuorandum datus sum, quare propter
 vos moras patior? tunc fratres cœperunt ei dicere, quid est quod loqueris frater? signum tibi sanctæ crucis imprime. Respondit ille, dicens, volo me signare, sed non possum, qui a squamis huius Draconis premor. Cùmque hoc fratres audirent, prostrati in terram cū lacrymis cœperunt pro ereptione illius uehementius orare. Et ecce subito cœpit ager clamare dicens, Gratias Deo, ecce Draco ille, qui me ad deuorandum acceperat, fugit, orationibus uestris expulsus stare non potuit. pro peccatis meis modò intercedite, quia conuerti paratus sum, & secularem vitam funditus relinquere. Homo ergo, qui iam, sicut dictum est, ab extrema corporis parte fuerat præmortuus, reseruatus ad vitam,

tam,

326 De arte bene mor.

tam, toto corde ad Deum conuersus est: & postquã mutatus mente, diu est flagellis adstrictus, tum eius anima carne soluta est. Hæc sanctus Gregorius.

Discant igitur qui morientibus assistunt, non tam cum ægroto loqui, quàm Deum pro eo ardentè orare. Neque quoscunque homines ad visendum ægrotum, in extremis constitutum admittere, sed viros pios, & probos, qui suffragijs suis multum valeant apud Deum. Multum enim valet oratio iusti assidua, & feruens. Et quemadmodum Diabolus, quia modicum tempus habet, omnem mouet lapidem in eo temporis articulo: sic etiam, & multo amplius debent fideles amici iuuare precibus, & lacrymis fratres suos de præsentis sæculo exeuntes.

CAP.

CAP. XIV.

De quartodecimo præcepto artis bene moriendi, vicina iam morte, quod est de ijs, qui non ex consueto morbo, sed ex alia causa moriuntur.

DO C V I M V S haecenus, quæ ratione comparare se debeant ad mortem, qui ex morbo diuturno decumbunt. Nunc addere visum est, quid illis faciendum sit, qui non ex morbo diuturno, sed aliunde in periculo mortis versantur. Sunt autem tria hominum genera, quibus extra morbum consuetum imminet mortis discrimen. Alijs enim adest mors propinqua, improvisa & certa, quales sunt, qui corripuntur apoplexia, vel feriuntur caelesti

328 De arte bene mor.

sti fulmine. Alijs adest mors propinqua, nec improuisa, nec certa, sed valde probabilis, quales sunt, qui vel bellum gerunt cum hostibus; vel in alto mari cum fluctibus, & ventorum flatibus pugnant. Alijs denique propinqua mors est nec improuisa, nec incerta, quales sunt, qui decreto Iudicis à carnifice feriuntur.

Primi generis homines nullum aliud remedium habent, nisi quotidianam, vel potius continuam mortis memoriam. Atque ad hos propriè pertinet grauissima illa Domini Saluatoris admonitio, *Vigilate, quia nescitis diem, neque horam*. Grauis quidem, sed pretiosa necessitas, quæ ad optima, & utilissima compellit. Si diceret Dominus, *vigilate nudi in aere frigidissimo, donec congeletis, & disruptis vndique carnibus extingamini, vt quadraginta martyres olim vigilauerunt: non ne id faciendum esset, vt securi ad æternam felicitatem lati*
per-

Mat 25

Lib. II. Cap. XIV. 329

perueniremus? & si diceret, Vigilate nudi, & craticulæ alligati, donec à subiecto igne ardenti cū intimo, & acerrimo dolore cōsumpti de vita recedatis, vt quōdam cum sancto Laurentio actum fuisse legimus: non ne id quoque alacri animo faciendum esset, vt gehennam ignis æterni euaderemus? At non hoc iubet Dominus Deus non ster omnibus nobis; sed vt vigilemus, ne dormientibus nobis, fur nocturnus adueniat, & aurum charitatis, vel gemmas pretiosissimæ castitatis, vel thesaurum fidei, aut alia veræ virtutis bona nobis in peccato dormiētibus eripiat: & somno peccati lethalis oppressi, & morte præoccupati, regni cælestis iacturam faciamus, & in gehennam igne inextinguibili ardentem projiciamur. At pauci sunt, qui sic repente moriantur, vt nullum eis remedium afferri queat. Esto pauci sint, vnde nosti, te non futurum vnum ex illis? & si de illis paucis vnus eris, quid pro-

330 De arte bene mor.

proderit tibi multitudo eorum, qui eiusmodi periculum euaserunt?

Audi ergo, quando licet tibi tam horrendum malum euadere, consilium Patris nostri Dei clamantis, & dicentis, *Vigilate, vigilate, quia nescitis diem neque horam.*

Alteri generi hominum, qui vel in bello repente mortui cadunt, vel in mari vi tempestatis ab undis absorpti extinguuntur: tria videntur esse necessaria vt feliciter moriantur. Primum est, vt ad bellum non accedant, nisi constet eis, bellum esse iustum, aut si non sponte, sed coacti à proprio Principe arma capiunt, saltem non sciant, bellum esse iniustum. Sic enim docet sanctus Augustinus in libris contra Faustum Manichæum.

Li. 22. c.
75.

Scribit enim, aliam esse rationem Principis imperantis, aliam militis obsequentis. Ac principem non posse bellare docet, nisi sciat bellum esse iustum: militem autem posse, modo non sciat, bellum esse iniustum. Alterum est, vt in

bel

Lib. II. Cap. XIV. 331

bello leges obseruent sancti Ioannis Baptistæ, qui interrogatus à militibus, quid agendum illis esset, vt salui fierent; respondet, *Neminem concutiatis, neque calumniam faciatis, & contenti estote stipendijs vestris.* Postremum est, vt non patiantur peccatum lethale in corde suo vnquam hæ- rere: alioqui facile erit, vt mors quæ in prælijs multos de medio tollit, illos imparatos inuadat, & ad mortem æternâ perpetuo cruciandos amandet. Itaque milites in castris positi, in periculo maximo versantur amittendæ vitæ sem- pternæ, nisi perpetuo vigilent, & pugnent non minus aduersus dæ- mones têtantes ad peccata, quam aduersus hostes mortales pro tem- porali gloria dimicantes.

Hæc eadem dici possunt ad eos, qui non sine periculo nauigant mare. Primum enim, cauere de- bent, ne ad malum finem nauiga- re incipiant, vt ad capiendos, & spoliandos quoscunque obuios, vt

332 De arte bene mor.

piratæ faciunt. Deinde si bellandi causa suscipitur nauigatio, obseruent etiam ipsi leges acceptas à sanctissimo Præcurfore Domini. Denique vt ipsi quoque non audeant lethali crimine Deum offendere, cum non longius distent à morte, quàm nauis eorū ab aquis.

Tertij generis homines felices dici posse videntur, si bona sua nouerint. Nam vel occiduntur iure damnati, vel iniuria: si iure, mors illis ad satisfactionē coram Deo prodesse poterit, modò seriò peccatum suum detestentur, & libenter mortem ad peccata sua expianda suscipiant. Si iniuste occidantur, & ignoscant ex animo ijs, qui causa exitij illis fuerunt; imitatores Redemptoris erunt, qui pro crucifixoribus suis Patrem orauit, dicens, *Pater ignosce illis, quia nesciunt quid faciant*. Adde quòd isti longè minus patiuntur in morte, quàm ij, qui graui, & diuturno morbo laborant. Deinde isti integris sensibus, & cerebro

Lib.II.Cap.XIV. 333

bro non vitiato cum sint, facilius
possunt sacrae confessioni, & sa-
cramento corporis Domini susci-
piendo, & orationibus operam
dare, quam ij, qui detinentur in
lecto doloribus varijs tolerandis
occupati, & virtute naturali vt
plurimum debilitata, vel etiam
prostrata. Denique non desunt mul-
tis in locis homines docti, & pij,
qui summa diligentia, & sollicitu-
dine assistunt eiusmodi hominibus
supplicio extremo afficiendis, eosq.
docent, quo modo se compa-
rare debeant ad mortem
pie suscipiendam;
vt cum mori
incipiunt
vitae
mortali, viuere in-
cipiant beatam
immortali-
tati.

CAP.

CAP. XV.

De felici morte eorum, qui
artem bene moriendi
didicerunt.

EXPLICATIS præceptis
artis bene moriendi, illud
vnum superesse videtur, vt breui-
ter explicemus, quæ sit utilitas in
arte bene moriendi. Res est fa-
cilis, & tamen maxima: qui enim
bene moritur, feliciter moritur.
Neque quomodocunque feliciter
moritur, qui bene moritur, neque
quomodocunque infeliciter mo-
ritur, qui malè moritur. Sed qui
bene moritur, transit à vita mor-
tali, & misera ad vitam æternam,
& omni ex parte beatissimam. Et
contra qui malè moritur, transit
à vita, quæ videtur diuturna, & fe-
lix, ad vitam omni labore, & do-
lore plenissimam, quæque finem
laboris, & doloris nullum inue-
niet,

niet, vt inde mors æterna sit potius dicenda, quàm vita; erunt enim homines reprobi, mortui ad omnem lætitiã, & voluptatem: sed viui ad omnem laborem, & dolorem.

Rem ita se habere Scripturæ sanctæ apertè nos docent. De illis, qui bene moriuntur, loquitur Sanctus Ioannes in Apocalypsi dicens. *Audiuì vocem de cælo dicentem*, Apoc. 14. *mibi, scribe, Beati mortui qui in Domino moriuntur. Amodò iam dicit spiritus, vt requiescant à laboribus suis. opera enim illorum sequuntur illos.* Hanc sententiam non desunt ex scriptoribus, qui ad solos martyres pertinere existiment: sed communior, & verior explicatio, ad omnes sanctos, qui piè moriuntur in Christo, verba sancti Ioannis pertinere docet. Certè sanctus Bernardus in Epistola quadam, quæ inscribitur de Machabæis, sic loquitur, *Beati* Epist. 98. *mortui, qui in Domino moriuntur: non soli, qui pro Domino, sicut*

336 De arte bene mor.

sicut martyres; sed qui in Domino moriuntur, sicut confessores, profecto beati sunt. Dux proinde res mihi videntur mortem facere pretiosam, vita, & causa, sed amplius causa, quam vita; porro illa erit pretiosissima, quam & causa commendat, & vita. hæc ille.

Huc accedit, quod Ecclesia, quæ optima interpretes est Scripturarum, ex hoc loco Apocalypsis, lectionem legi iubet in Missa pro defunctis omnibus. Ait igitur sanctus Ioannes, *Beati mortui, qui in Domino moriuntur*. hoc est, beati sunt illis omnes, qui cum moriuntur, inveniuntur in Domino: id est, inveniuntur coniuncti Domino per veram charitatem, ut membra viua capitis, quod est Christus. Sic de Sancto Stephano moriente scripsit Sanctus Lucas, *Obdormiuit in Domino*; id est, coniunctus Domino, ut membrum capiti.

Luc. 7.

Cur autem sint beati, qui moriuntur in Domino, explicat San-

ctus

Etus Ioannes dicens, *Amodo iam dicit spiritus, ut requiescant à laboribus suis.* Spiritus enim sanctus aperte declarat, in morte sanctorum, finem imponi laboriosis operibus omnibus, & inchoari requiem sempiternam; nec solum cessare labores omnes, sed etiam inchoari vitam felicissimam, plenam omni genere voluptatis: quia opera illorum sequuntur illos. Opera enim bona, & meritoria, omnis consolationis, & voluptatis, non temporaria, sed æternæ, non remanent in terra, sed sanctos operarios sequuntur in cælum, iuxta illud Prophetæ, *Dispersit, dedit pauperibus, iustitiae eius manet in seculum seculi.* Opes quidem sancti viri relinquuntur in terra, vel potius consumuntur in terra; sed *iustitia*, liberalitas, misericordia, qua opes terrenæ communicatæ sunt pauperibus, *manet in seculum seculi*; nec solum manet, sed ditissimum facit eum, qui diuitias perituras in egenos di-

338 De arte bene mor.

tribuit super terram. Nec solum
opera liberalitatis sequuntur eos,
sed etiam opera sapientia, opera
fidei, opera spei, opera charitatis,
opera timoris Domini, opera
temperantia, opera fortitudinis,
opera castitatis, opera religionis;
denique opera omnia bona se-
quuntur eos, & praemia amplissi-
ma, & perpetua illis acquirunt.
Verè igitur felicissimus est, qui be-
ne moritur; cum & requiem à la-
boribus, & summam omnium bo-
norum in æternum acquirat.
Accedunt ad hoc Scripturae verif-
simum testimonium, visitationes
sanctorum, qui adesse solent mo-
rientibus pijs hominibus, ut eos
in exitu de corpore consolentur,
& adiuent; & daemona quæ ter-
rorem ipso tempore incutere so-
lent, compescant: quæ visitatio in-
ter felicitates piè morientium non
modica est.

Possem hoc loco historias plu-
rimas recensere, sed contentus ero
exemplis, quæ extant in dialo-
gis,

gis sancti Gregorij. Igitur in quarto libro, sic ipse Beatus Gregorius de Ursino presbytero loquitur.

Ursinus presbyter vicinus morti, cum magna cœpit letitia clamare, dicens, Bene veniant Domini mei, quid ad tantillum seruulum vestrum estis dignitati conuenire? venio, venio, gratias ago. Cùmque hoc iterata crebro voce repeteret, quibus hoc diceret, qui illum circumsteterant, requirebant. quibus ille admirando respondit dicens, Nunquid hic conuenisse sanctos Apostolos non videtis? B. Petrum, & B. Paulum primos Apostolorum non aspicitis? Ad quos iterum conuersus dicebat, Ecce venio, ecce venio. atque inter hæc verba animam reddidit. Et quia veraciter sanctos Apostolos viderit, eos etiam sequendo testatus est. Quod plerunque contingit iustis, ut in morte sua sanctorum præcellentium visiones aspiciant; ne ipsam mortis suæ poenalem sententiam pertimescant: sed

Li. 4 dia-
log. c. 11.

340 De arte bene mor.

*dum eorum menti supernorum ci-
uium societas ostenditur; à carnis
sua copula sine doloris, & formi-
dinis fatigatione soluantur.*

Idem sanctus Gregorius in eo-
dem libro capite sequenti narrat,
ad Probum Reatinæ Ecclesiæ Epi-
scopum moribundum venisse san-
ctum Iuvenalem, & sanctum Eleu-
therium martyres cum ingenti
splendore; & mox venerabilem
Probum carne solutum cum illis,
qui ad eum venerant, in cælum
abiisse. Idem capite sequenti,
refert sanctæ Gallæ ancillæ Dei
ægotanti, & morti proximæ ap-
paruisse sanctum Petrum; eique
significasse, dimissa illi fuisse om-
nia peccata, vt securè de mundo
recederet. Idem sequenti capite
refert, moriente Seruulo paralyti-
co, audita fuisse in cælo cantica
Angelorum, & odorem mirificum
effusum. Idem sequenti capite
narrat de Romula ancilla Dei, in-
gentem numerum animarum san-
ctarum de cælo ad eam venisse
cum

Lib. II. Cap. XV. 341

eum inæstimabili claritate luminis, & suauissimi odoris fragrantia. In sequenti capite refert de amita sua Tharsilla, quòd primùm viderit apparentem sibi Felicem Pontificem, affinem suum, dicentem, *Veni, quia in hac te lucis mansione recipio*. Deinde mox feбри correpta, & ad extrema deueniens, IESUM ad se venientem viderit, & in eum intendens expirauerit. Tantam autem odoris fragrantiam in eo loco relictam fuisse, vt ipsa quoque suauitas ostenderet, illic auctorem suauitatis fuisse. Idem in sequenti capite scribit, Musæ puellæ B. Virginem Dei matrem cum Virginum choro apparuisse, eamque morientem ad Regna cælorum, secum duxisse. Denique in sequenti capite scribit, morienti Stephano Angelos sanctos adfuisse.

Habemus igitur teste sancto Gregorio, viris, aut mulieribus pijs de hac vita migrantibus assistere solitos, non solum Angelos,

342 De arte bene mor.

sed etiam martyres iam defunctos, vel Apostolorum Principes, vel ipsam Reginam cælorum, vel denique Christum ipsum, Regem æternæ gloriæ. Quanta autem hæc sit felicitas, quanta gloria, quanta cordis lætitia ijs, qui bene viuere, & feliciter mori didicerunt; ij soli explicare possunt, quibus datum est, hæc tam ingentia Dei beneficia experiri.

C A P. XVI.

De infelici morte eorum, qui artem bene moriendi discere neglexerunt.

DE Iuda proditore Dominus ait, *Bonum erat ei, si natus non fuisset homo ille.* Nihil enim infelicius cogitari potest homine, qui à fine suo, ad quem creatus erat, culpa sua aberrat. Res enim cæteræ, siue animantia, siue planta, siue res inani-

Lib. II. Cap. XVI. 343

nimæ, si finem suum non consequantur, nihil tamen molestiæ patiuntur, cum esse desinunt: homo verò si à fine suo aberret, qui est vita beata, & sempiterna, non desinit esse, & viuere, sed vitam ducit omni morte deteriore, ut perpetuò quærat mortem, & nunquam inueniat. Proinde omni stulto stultior est, & omni insipiente insipientior, qui non contendit omnibus viribus ad felicitatem æternam peruenire: cum nemo possit ab æterna felicitate exciderè, quin incidat in æternæ damnationis abyssum.

Ad hoc ipsum summi momenti negocium verè capiendum, operæ pretium esse duxi verba illa Apostoli Pauli breuiter considerare, quæ habentur in epistola posteriore ad Corinthios: *Id enim quod* 2. Cor. 4. *in presenti est momentaneum,* & *leue tribulationis nostræ; supra modum in sublimitate æternæ gloriæ pondus operatur in nobis: non contemplantibus nobis*

344 De arte bene mor.

qua videntur, sed qua non videntur; qua enim videntur, temporalia sunt; qua non videntur, aeterna. Hæc Apostolica, & planè aurea verba homini spirituali apertissima sunt; & ex ijs potissimum spiritualis homo discit facillimo negotio artem bene viuendi, & artem bene moriendi; sed homini carnali, vel animali, verba ista sunt meræ tenebræ, eæque cimmeriæ, ac si homini latino, vel græco hebraica, vel arabica essent.

Homo spiritualis ex his verbis colligit, tribulationes, quamuis grauissimas, pro Deo susceptas, esse leuissimas, & breuissimas, etiâsi per multos annos tolerandæ essent: quia omne quod finem habet, non potest esse diuturnum. Easdem, verò tribulationes efficere apud Deum meritum tanti pretij, vt inde ematur immensus, & sempiternus gloriæ, & bonorum omnium thesaurus. Ex quo intelligunt homines sapientes, non esse

ti-

Lib. II. Cap. XVII. 348

timendas tribulationes, sed timenda esse peccata, neque esse magnificiēda bona temporalia, sed aeterna. Ex quo sequitur, ut bene viuant in terris, ut feliciter regnent in cælo; & per hoc pie viuant, & feliciter moriantur.

Sed homines animales, & spiritum non habentes, qui verbis dicunt, se credere verbis scripturæ diuinæ, *factis autem negant*; et prorsus inuertunt verba Apostolica, & dicunt, si non voce, saltem corde, egestatem, ignominiam, iniurias, tribulationes esse grauissimas, & omni animi pro uisione cauendas, & propulsandas, etiamsi oporteat mentiri, fraudare, homicidia perpetrare, Deum offendere, & gehennā post obitū tolerare. Quis enim scit, inquit, an sit vsquam gehenna? & quis nam vidit aeternū glorię pondus? At egestatem, ignominiam, iniurias esse malas, experimur, certò scimus, manibus palpamus. Hæc mundus, & qui de mundo sunt, nō

346 De arte bene mor.

quidem ore pronunciant, sed operibus testantur. & ea causa est, cur magna pars hominum male viuat, & infelicissime moriatur.

Ac vt exemplum vnum, vel alterum mortis infelicissimæ hominis perditæ afferamus: extat apud sanctum Gregoriũ in libro quarto dialogorum, exemplum cuiusdã Crisforij, qui cum esset vnus de illis, quos paulò ante descripsi, homo politicus, prudens, & ad res mundi, vt sanctus Gregorius loquitur, valde idoneus, superbus tamen, & auarus. Hic ad extrema vitæ cum venisset, apertis oculis, vidit teterrimos spiritus coram se assistere, & vehementer imminere, vt ad inferni claustra eum raperet. Cœpit tremere, pallefcere, sudare, & magnis vocibus inducias petere. Clamans, & dicens, *inducias, vel vsque mane; inducias vel vsq; mane*. Sed eum hæc clamaret, in ipsis vocibus, de habitaculo suæ carnis euulsus est. De quo nimirum constat, quia pro nobis ista,

non

non pro se viderit, vt eius visio nobis proficiat. Ita nimirum accidere solet ijs, qui conuersionem suam ad extremam vitæ horâ differre volunt; & de illorum numero sunt, qui, vt idem sanctus Gregorius initio quarti libri docet, quæ non vident, non facillè credunt; vel si credunt, non ita credunt, vt eos ad vitam probè agendam inducant.

Alterum exemplum in eodem loco idem sanctus Gregorius narrat de monacho quodam hypocrita, qui ieiunare credebatur, cū interim secretò comederet, & biberet. Hunc enim ad inferos dānatum fuisse scribit sanctus Gregorius, ipso confitente peccatum suum, nec tamen pœnitentiam agente. Voluit enim Deus, vt appareret hypocrisis eius; nec tamen gratiam pœnitentiæ illi concessit, vt alij discerent non differre confessionem, & pœnitentiam vsque ad finem.

Sed his dimissis, qui culpa sua

348 De arte bene mor.

artem bene viuendi non didicerunt, & ideo felicem de hac vita exitum non habuerunt: Redeo ad verba sancti Apostoli Pauli, quæ grauida sunt mysterijs, & saluber-
rimis documentis.

Primum igitur obseruare par est, quàm vehementer extenuet Apostolus merita sua, idest, labores pro Christo susceptos; & extollat gloriam Regni cælorū, quæ merces est meritorum. *Quod, inquit, est momentaneum, & leue tribulationis nostræ.* Hæc est me-

ritorum suorum extenuatio. Laborauit Apostolus totis viribus ad annos circiter quadraginta. Nam cum accessit, vocatus à Christo, ad obsequium, adolescens erat. Sic enim scribitur in Actis Apostolo-

rum, *Deposuerunt vestimenta sua* (lapidatores sancti Stephani) *secus pedes adolescentis, qui vocabatur Saulus.* Vixit autem in obsequio Christi vsque ad senectutem, ipso scribente de se ad Philemonem, *Cum sis, sicut Paulus,*

se-

senex. Itaque consumpsit Apostolus Paulus in obsequio Christi annos omnes iuuentutis, & virilis ætatis, & partem senectutis; & tamen dicit, tribulationes suas, quæ perpetuæ illi fuerunt, à conuersione sua vsque ad martyrium, fuisse momentaneas. Et verum dicit, si comparentur ad æternitatem sempiternæ felicitatis: tamen absolute longo tempore durauerunt.

11 103.c

Adiungit breuitati leuitatem, dicens, *Momentaneum, & leue tribulationis nostræ. Quam autem fuerint crudeles, & asperæ tribulationes, ipse indicat, cum ait in priore epistola ad Corinthios, Usque in hanc horam esurimus, & sitimus, & nudi sumus, & colaphis cadimur, & instabiles sumus, & laboramus operantes manibus nostris. maledicimur, & benedicimus; persecutionem patimur, & sustinemus; blasphemamur, & obsecramus, tanquam purgamenta huius mundi facti sumus, omnium*

1. Cor. 4.

350 De arte bene mor.

2. Cor. 11 *nium peripsēma usque adhuc. Idem ipse in posteriore epistola ad eodem Corinthios, hæc addit, In laboribus plurimis, in carceribus abundantius, in plagis supra modum, in mortibus frequenter. à Iudeis quinquies quadragenas, una minus, accepi: ter virgis cesus sum, semel lapidatus sum. Ter naufragium feci, nocte & die in profundo maris fui. In itineribus sæpè, periculis fluminum, periculis latronum, periculis ex genere, periculis ex gētibus, periculi in ciuitate, periculis in solitudine, periculis in mari, periculis in falsis fratribus: in labore & erumna, in vigilijs multis, in fame & siti: in ieiunijs multis, in frigore & nuditate. Hæ sunt tribulationes, quas appellauit leues, quæ quamuis in se grauissimæ sint; tamen amor Christi, & magnitudo præmij non sine causa fecit videri leuissimas.*

- Adiungit Apostolus magnitudinem præmij dicens, *Supra modum*

Lib. II. Cap. XVI. 351

*dum in sublimitate eternam glori-
æ pondus operatur in nobis.* Vbi
more scripturarum sanctarum,
quæ se nostræ capacitati accom-
modare solent, describit Apосто-
lus præmium laborum ad similitu-
dinem magnitudinis rei corpora-
lis. Res enim corporalium ma-
gna esse dicitur, cum est sublimis,
diuturna, ampla, & profunda. De
sublimitate felicitatis Beatorum
dicit, *Supra modum in sublimitate*,
id est, præmium laborum no-
strorum, erit sublime supra mo-
dum, id est, celsissimum, sic, ut nul-
lus honor, nulla dignitas, nulla
sublimitas cogitari possit maior.
De longitudine, dicit, *eternum*,
quod videlicet, finem nullum ha-
bebit, ad cuius comparationem
omnis duratio brevissima, & mo-
mentanea dici poterat. De lati-
tudine, & profunditate dicit, *glori-
æ pondus*. Nomen, gloriæ, signi-
ficat, beatitudinem similem fore
splendori, vel lumini, quod ubi-
que diffunditur, & omnia replet.

No-

352 De arte bene mor.

Nomen, ponderis, designat profunditatem rei solidæ, & plenæ, quæ non est superficialis, & inanis, sed solidissima, atque plenissima. Erit igitur beatitudo Sanctorum res quædam supra omnem modum & mensuram sublimis, æterna, solidissima, atque plenissima.

Quia verò ista non capiunt homines animales, quales sunt ciues mundi huius, addidit, *Non contemplantibus nobis, quæ videntur, sed quæ non videtur. Quæ enim videntur, temporalia sunt; quæ non videntur, æterna.* Hæc est tota, & vera ratio, cur tam pauci discant artem bene, & feliciter viuendi, & moriendi. Quia vel non cogitant, vel non seriò cogitant ea, quæ non videntur, & æterna sunt; sed toti sunt occupati in consideranda pulchritudine, & utilitate rerum corporaliū, & transeuntium, quæ videntur. Itaque hoc solum interest inter animantia bruta, & homines animales spiritum non ha-

habentes; quòd illa non confide-
rant, nisi præsentia; quia non ha-
bent mentem rationis capacem,
qua sola considerari possunt res
futuræ & sempiternæ: homines au-
tem carnales, & animales non co-
gitant, neque considerant res fu-
turas, & sempiternas; quia visco
concupiscentiæ carnalis capti, non
volunt mentem auertere à rebus
præsentibus, & conuertere ad res
futuras, quæ solæ sunt verè ma-
gnæ, pretiosæ, & sempiternæ. At-
que hæc de prima consideratione
sententiæ Paulinæ.

Altera consideratio non minus
utilis, & salutaris, ad illos perti-
net, qui ad inferos descenderunt;
illi enim, quibus pœna iam oculo-
los mentis aperuit, quos in hoc
sæculo culpa clauferat; illi, in-
quam, iam apertissimè intelligunt,
bona mundi huius, diuitias, ho-
nores, delicias, Regna, & Impe-
ria fuisse pro ipsis momentanea,
& leuia; & tamen propter illa ami-
sisse se bona eminentissima, & per-
pe-

354 De arte bene mor.

petuò duratura. Vnde perpetuò gement, & consolationem nullam inuenient, quòd cum in terris essent, tam stulti fuerint, vt propter bona fragilia, & peritura, & non tam bona, quàm vmbra bonorù; amiserint bona cælestia, supra modum in sublimitate æternum gloriæ pondus habentia.

Audiamus voces eorum ex libro Sapiëntiæ: placuit enim Spiritui sancto in lib. Sapiëntiæ nobis referre voces insipiëtium illorum, quæ illis quidē inutiles sunt; nobis autē fructuosæ esse poterunt, si velimus. *Ergo errauimus, inquit, à via veritatis, & iustitiæ lumen nō luxit nobis: & Sol intelligentiæ non est ortus nobis. Laxati sumus in via iniquitatis, & perditionis, & ambulauimus vias difficiles, viam autem Domini ignorauimus. Quid nobis profuit superbia, aut diuitiarum iactantia quid contulit nobis? transierunt omnia illa tanquã vmbra; & tanquam nuncius præcurrēs; & tanquam nauis, quæ pertransit,*
su-

*fluctuantem aquam, cuius cum
præterierit, non est vestigium,
inuenire; aut tanquam vis, quæ
transuolat in aere, cuius nullum
inuenitur argumentum itineris.*

hæc Sapiens. Ex quibus non so-
lùm intelligimus, animales homi-
nes in inferno pœnitentiam actu-
ros, quòd propter bona exigua,
& temporalia amiserint magna,
& æterna: sed etiam quòd multum
laborauerint vsque ad magnam
defatigationem in bonis perituris
acquirendis, vel conseruandis.
Quod planè verissimum est. & sæ-
pè accidit, vt contemptores tem-
poralium bonorum viuant hila-
riores & latiores, quàm ij, qui
diuitijs, & honoribus abundant.

Certè Apostolus Paulus, cuius
verba explicanda suscepimus, de
se ipse dicit, *Repletus sum conso-* 2. Cor. 7
*latione, superabundo gaudio in
omni tribulatione nostra.* De san-
cto Antonio, qui temporalia bo-
na omnia dimiserat, sanctus Atha-
nasius in eius vita refert, eum nun-

356 De arte bene mor.

quam visum fuisse tristem . Quod idem de sanctis omnibus dici potest , quamuis pauperrimis , & laborantibus perpetuò in oratione , & ieiunio , & carnis propriæ mortificatione . Itaque qui propter bona temporalia comparanda , vel conseruanda , vel augenda non timent amittere bona sempiterna : ij non solum sempiterna bona penitus amittunt , sed magna ex parte propter ipsa temporalia , lætitiæ , & consolationis internæ iacturam faciunt ; & dum felicitatem terrenam quærunt , felicitatem terrenam , & cælestem perdunt .

An non igitur æquum esset , vt nos qui adhuc in via sumus , exemplo eorum , qui nos præcesserunt , sapere inciperemus . Certè si dum iter facimus , admoneret nos aliquis viam , quam ingressi sumus , non ducere ad locum , ad quem peruenire desideramus , sed ad præcipitium , vel ad speluncam latronum : nemo nostrum esset , qui nõ cum gratiarum actione acciperet admo-

Lib. II. Cap. XVI. 357

admonitionē, & dicto citius aliud iter arriperet. Quòd si in corporali, & temporali periculo facimus; æquum profecto est, vt multo libentius, & alacrius id faciamus in periculo spirituali simul & corporali, temporali, & sempiterno.

Postremò restat consideratio pro illis hominibus, qui vsque adeo carnales, & animales sunt, vt detrimentum æternæ vitæ, & gloriæ cælestis exuperantis omnē sensum, non magnifaciant. Isti verò admonendi sunt, vt si non magnifaciunt gloriam cælestem, quā nunquam viderunt; saltem non despiciant ignem, & sulphur, & alias corporales pœnas, quas noverunt, quæque in gehenna atrocissimæ inveniuntur. Verè enim *quod est in presenti momentaneum & leue voluptatis carnalis; supra modum in profunda gehenna æternum miseriæ pondus operatur in impijs.* Et quidem Dominus Christus in die nouissima, paucis verbis

358 De arte benemor.

Mat. 25. aperiet hoc ipsum dicens, *Ite maledicti in ignem eternum, qui preparatus est Diabolo, & Angelis eius.*

Sed Beatus Ioannes in Apocalypsi copiosius explicauit, qualia sint tormenta parata Diabolo, & Angelis eius, & hominibus ab ipso circumuentis, & seductis. De Diabolo principe impiorum, sic legimus in Apocalypsi, *Et Diabolus, qui seducebat eos, missus est in stagnum ignis & sulphuris, ubi & bestia, & pseudopropheta cruciabuntur die ac nocte in secula seculorum.* & capite sequenti de reliquis ad inferos damnatis dicitur, *Timidis, & incredulis, & execratis, & homicidis, & fornicatoribus, & ueneficis, & idololatriis, & omnibus mendacibus, pars illorum erit in stagno ardenti igne, & sulphure, quod est mars secunda.* Ex quibus verbis, primum solum indiget explanatione, reliqua enim manifesta peccata sunt. Timidos igitur vocat sanctus Ioannes,

nes,

Lib. II. Cap. XVI. 359

nes, eos, qui non audent resistere tentatori, siue Diabolo, siue homini; sed continuo dant manus, & consentiunt tentatori. Quibus sanctus Iacobus ait, *Resistite diabolo, & fugiet à vobis.* Sunt autem non pauci, sed ferè innumera- biles, qui non didicerunt bella Domini; sed absque vlla resistentia suscipiunt vulnera Diaboli, & moriuntur morte prima, quæ est peccatum lethale: & quia timidi sunt etiam in agenda pœnitentia, cum non audeant castigare, & in seruitutem redigere corpus suum: ideo incidunt in mortem secundam, quæ est gehenna. Itaque rectè posuit Ioannes primo loco timidos; quia timiditas infinitos homines ad inferos perducit.

Iac. 4.

Quid igitur hic dicent homines carnales? momentanea, & leuia esse bona temporalia, experimento aliorum, & nostro omnes didicimus: grauiissima, & sine fine duratura esse tormenta gehennæ scri-

360 De arte bene mor.

scriptura diuina, in qua falsitas esse non potest, aperte testatur. Ex quibus sequitur, vt summa totius artis bene moriendi, sit ea, quæ tribus sequentibus propositionibus continetur; siue quæ sequenti ratiocinatione cõcluditur.

CAP. XVII.

Summa totius artis bene moriendi.

MOMENTANEA, & modica est tam consolatio, quam tribulatio vitæ præsentis: sempiterna & maxima est tam consolatio, quam tribulatio vitæ futuræ: Igitur stulti sunt, qui consolationem, vel tribulationem vitæ futuræ contemnunt. Huius argumentationis propositio prima nota est per experimentum: secunda notissima est per scripturam Spiritus sancti; tertia sequitur ex duabus præcedentibus. Si quis

quis igitur velit artem bene moriendi facile & cito perdiscere, non sit contentus lectione libri huius, aut aliorum similium: sed attentè consideret; non semel, sed sæpius; non animo discendi, sed intentione bene viuendi, & feliciter moriendi; quantum distent à momentaneis sempiterna, & à grauiissimis leuissima. Et si in hac utilissima veritate solidissimè confirmari cupit; consideret exempla eorum, qui fuerunt ante nos, siue sapientes, siue stulti illi fuerint; hoc est, siue bene viuendo feliciter mortui sint, siue malè viuendo perierint in æternum. Ac vt laborem quærendi exempla, lectoribus demam, adferam ego tria paria exemplorum, vnum Regū, alterum hominum priuatorum, tertium ecclesiasticorum; & omnia ex diuinis literis deprompta proponam.

Primum erit Saulis, & Davidis. Saul primus Rex hebræorum, cum esset homo priuatus, & pauper,

Q

vsque

362 De arte bene mor.

1 Reg. 9
vsque adeo probus erat, vt scriptura testante, non esset inter filios Israel melior illo. Creatus Rex, mutauit vitam, & mores, vt iam non inueniretur illo deterior. Persequutus est Dauidem, innocentem vsque ad mortem, nō alia de causa, nisi quia suspicabatur, eum post se Regem futurum. Tandem cū regnauisset annis viginti occisus in bello ad gehennam descendit. Dauid fidelis, & pius post diuturnam persecutionem Saulis, Rex declaratus, Regnum annis quadraginta iustissimè gubernauit, in quibus multas tribulationes perpeffus, tandem in pace quieuit.

Conferamus nunc vtriusque consolationes, & tribulationes; & videamus, vter artem bene viuendi, & feliciter moriendi melius didicerit. Saul dum vixit, voluptatem imperandi, quæ maxima esse solet, non liquidam, nec solidam habuit, propter odium, quo Dauidem prosequabatur. Itaque vi-

ginti

ginti annis regnandi dulcedinem, non sine felle inuidentiæ; degustauit. Annis illis euolutis fugit ab eo omnis vitæ iucunditas, & successit pura, & sempiterna calamitas; & nunc usque ad annos circiter bis mille, & septuaginta, viuit pars eius nobilior, id est, animus, in doloribus maximis, & quod miserabilius est, sine fine vllò duraturis.

David contra, vixit annis septuaginta, quadraginta regnavit. Et quâuis tribulationes non exiguas, nec paucas gustauerit; tamen consolationes etiam maximas, & frequentissimas expertus est ex reuelationibus diuinis, quas in psalmis suis dulcissimis expressit; & post obitum non ad pœnas, sed ad refrigerium, in sinum Abrahæ cū sanctis Patribus concessit: & post Christi Domini resurrectionem, cum ipso Christo ad regna cælorum sempiterna conscendit.

Iudicet nunc lector, an non sit infelicissimus exitus de corpore hominum iniquorum, quamuis

364 De arte bene mor.

Regum, vel Imperatorum; & felicissimus exitus iustorum, etiamsi Regum vel Imperatorum. Saul, ut dixi, annis viginti regnavit, post obitum annorum duobus millibus, & eo amplius in igne gehennæ absque vlllo refrigerio mansit. Quæ comparatio est annorum viginti cum duobus millibus annorum? Quis optaret viginti annos summæ & liquidissimæ voluptatis, si certò sciret, ob eam voluptatem in ardentissima fornace mansurū se ad annos bis mille, & amplius? Et esset ne vllus homo tam vecors, qui tormentum omnium maximū subire vellet ad annos, non dicam, bis mille, sed bis centum, ut postea ad annos viginti voluptate quantumvis maxima potiretur? Quid si nunc addamus, tormentum gehennæ non annos bis mille duraturum, sed finem nullum habiturum? Hæc certè sola tormentorum æternitas sine vlla cessatione, & sine vlllo refrigerio duratura, eiusmodi est, ut cor ferreū, & pe-

Lib. II. Cap. XVII. 365

& pectus æneum ad pœnitentiam flectere possit. Eandem considerationem lector per se adiungere poterit de tribulatione Davidis momentanea, & leui, cum glôria, & voluptate maxima, & sempiterna, quam post obitum is ipse David in cœlesti regno consequutus est; quamuis magis nos moueant tormenta gehennæ, quam gaudia paradisi.

Alterum exemplum erit Epulonis, & Lazari ex euangelio sancti Lucae. Diues Epulo ad modicum tempus lætatus est cū amicis suis, quippe qui *induebatur purpura, & bysso, & epulabatur quotidie splendide*: Lazarus è contrario mendicus, & æger iacebat ad fores Epulonis *ulceribus plenus, & cupiebat saturari de micis, quæ cadebant de mensa diuitis, & nemo illi dabat*. Sed paulo post mutata sunt omnia. Diues Epulo mortuus est, atque ad gehennam descendit: mortuus est etiam Lazarus, & ab Angelis in locum refri-

366 De arte bene mor.

gerij, & sinum Abrahamæ delatus est. Et quidem Epulo post breuissimam consolationem, in flamma ignis æterni cruciari cœpit, & nunc etiam cruciatur, & sine vlllo refrigerio, vel cessatione cruciabitur in sæcula sæculorum. Lazarus pius, & patiens post breuem tribulationem ad quietem in sinu Abrahamæ concessit; deinde post Christi resurrectionem ad cœlestia, & felicissima regna migravit, vbi beatus sine fine erit. Certè quidem, si tempore illo nos quoq. fuissetus in viuis, pauci, aut nulli ex nobis similes Lazari; sed omnes, aut pluri ex nobis similes esse cupissetus Epulonis. Et nunc tamen omnes Lazarum felicissimum; & Epulonem miserrimū iudicamus. Cur igitur nunc, cū nobis optio detur, non eligimus virtutem Lazari potius, quā vitia Epulonis? neque enim vituperanda sunt diuitiæ, cū Abraham, & Dauid, & alij multi sanctorum, ditissimi fuerint: sed damnanda est crapula,

la, luxus, vanitas, immisericordia, & alia vitia, quæ Epulonem ad gehennam perduxerunt. Neque in Lazaro solam pauperiem, & vlcera consideramus, sed patientiam, & pietatem extollimus. Illud autem est valde mirandū, quòd cū ista omnia nouerimus, & Epulonē stultissimum, & Lazarum sapientissimum iudicemus; tamen adhuc non pauci reperiuntur, qui uiuendo, Epulonem imitari non desināt, cū certissimi esse possint, similes illi se futuros esse in pœnis, cuius similitudinem in vitijs exprimere voluerunt.

Restat exemplum tertium Iudæ proditoris, & sancti Matthiæ, qui Iudæ in Apostolatu successit. Iudas prorsus infelix in hoc mundo, & infelicissimus in alio, tribus annis Dominum Salvatorem sequutus, ex furto sacrilego marsupium implere satagens, non contentus ijs pecunijs, quas ex communi elemosyna sibi accipiebat; auaritiæ morbo stimulante, eò peruenit, vt

Do-

368 De arte bene mor.

Dominum & Magistrum venderet. Sed paulo post à Diabolo in desperationem adductus, pecunias restituit, & se ipse suspendio necavit, vitamq; temporalem, & sempiternam simul amisit. Itaque Dominus de Iuda horribilem illam, **Mat. 26** sententiam protulit, *Bonum erat ei, si natus non fuisset.* Sanctus Matthias, qui Iudæ successit, id est, in locum eius electus, momentaneum laborem, & dolorem, non sine affluentia cælestium deliciarū, sustinuit: nunc verò omni labore, & dolore finito, cum Christo felix regnat in cælis; cui fidelissimè serviuit in terris.

Hæc Iudæ cum Matthia collatio ad Episcopos, & Regulares pertinet. Fuit enim Iudas Christi Apostolus, ac per hoc Episcopus designatus. Nam de Iuda, & Matthia sanctus Petrus illa verba psalmi **Pf. 109.** *Episcopatum eius accipiat alter.* Et idem Iudas inter viros regulares numerabatur, cum de Apostolis omnibus sanctus Petrus

trus

Lib. II. Cap. XVII. 369

Petrus dixerit, *Ecce nos reliquimus omnia, & sequuti sumus te. quid ergo erit nobis?* Iudas ergo omnium hominum infelicissimus, ex altissimo perfectionis statu cū cecidisset, id parum lucri, quod male acquisierat, restituendo, amisit; & sibi ipse carnifex factus, ad pœnas sempiternas damnatus; exēplo esse potest ecclesiasticis, & regularibus omnibus, vt videant, quomodo ambulent, & quale periculū illis immineat; nisi perfectioni status sui, sanctè viuendo, respondeant. Nam Saul, & Epulo de felicitate temporali ad ærumnam sempiternam moriendo venerunt: Iudas verò temporalem felicitatem nullam habuit, sed vmbra solum, siue spem felicitatis; & tamen ad sempiternum exitium, & quidem horribilius, quàm Saulis, & Epulonis exitium fuerit, semet ipsum occidendo, descendit. Sed etiam si Iudas ditescendo diuitias omnium mortalium superasset, & postea tamen ad æternam pauperiem, & sup-

370 De arte bene mor.

supplicia gehennæ sine fine duratura venisset. vt re ipsa iam venit: quid illi diuitiarum cumulus profuisset?

Maneat ergo stabilis, & vera ratiocinatio, quam initio capitis posuimus, & quam nunc verbis Apostolicis repetimus, **QVOD IN PRÆSENTI EST MOMENTANEVM, ET LEVE TRIBVLATIONIS NOSTRÆ, SVPRAMODVM IN SVBLIMITATE ÆTERNVM GLORIÆ PONDVS OPERATVR IN NOBIS: NON CONTEMPLANTIBVS NOBIS QVÆ VIDENTVR, SED QVÆ NON VIDENTVR: QVÆ ENIM VIDENTVR, TEMPORALIA SVNT; QVÆ NON VIDENTVR, ÆTERNA SVNT**



F I N I S.

ERRATA CORRIGE.

Pag.30.lin.13.	còm	cùm
ibid.	15	præcingebūt,præcingebant
<u>276</u>	<u>penult.</u>	<u>strata strato</u>
283	4	certe certa
306	9	resipiscât, profit vt re- sifiscant



